

## **Luk Ebë Lale Anebo Gali Kënëgebëye Jisame Gali nene, Luk Yahî tle**

### *Luk bu kë lale gali Tiofilusme yahî tletle*

<sup>1</sup> O letitabo ho, Tiofilus. Ębame feilawa ho bu, Jisas wesibi sebobë li mëta, melë kë totometë nabë yahî mëtla. Kwe bu iniwa gali yahî hana mëtla.

<sup>2</sup> Fli enëne, bu iniwa wesibi Jisas kë totomebë bubë nabana hwi motloma. Na bu kë gali boname na fli enënename të mëtëtatëna. Na kë enëne bu kë aholokwane motlolabë gali yahî mëtla.

<sup>3</sup> Këme nëgeme, bo metole nanelë, bo mata kë lale gali yahî nelëme na jume nelëbakëme. Bo iniwa wesibi, Jisas melë kë totomebë, onehome itaita takune latlokwe fëmë. Na bo kë wesibibëme walowene sle nëletemë. Na bo ëje kë wesibi, yahî sle nelë.

<sup>4</sup> Ju bobë yahî hwi sle eglomena, na melowene sle naegletëmeme, “Kë gali bu jume ëbame kë okokwe mëtëglëyobë, nëgali gali mu.”

### *Ensel Sekaraïame megali latlole, “Jubë mëse Elisabet nëba fu egotleme”*

<sup>5</sup> Herot bu Judia provins mago eso home tafa tëglena, na lotu lome wege lëglebë ho li këme tëtabe. Bubë weniji Sekaraïa. Bu Abiyabë ilawa mago ho. Abiyabë ilawa mago ho, bu lotu lome wege mëtkefëya. Bu na bubë mëse mata, lotu

lome wege lëglebë letitabo ho Aronbë bosemle.  
Bubë nobë weniji Elisabet.

<sup>6</sup> Nona, bohena, Gotobë naba lime lale tafamu lamëtelo. Na bu Gotobë galiwa lowene sle mëtletelo. Na bu këme fëye wesibiha hana mëtelo.

<sup>7</sup> Kwe bu nëba jwa mëtëtabo. Elisabet layame tlibeme nëgeme. Na bohe hoti tle na no mëseti tle.

<sup>8</sup> Li olëna, Sekaraiabë ilawa mago enëne, Gotobë tako lotu lo mëta, Gotobë wege fa mëtëtatla. Na Sekaraia mata, Gotobë wege fa tëtätle.

<sup>9</sup> Ètani home fene aniji motlokwe fëma, kë fenene Sekaraiame aniji motlola, lale lëkaluna wesibi Gotome ahojume nalëgletleme, Goto bubë lale ahëya lëkalu hëhë nalëgleme. Bu Sekaraiame melëna aniji motlola bu satu salë mëtla na Sekaraiabë weniji fata tletle. Na bu Gotobë tako lotu lowa tëkaklu, lale lëkaluna wesibi Gotome ahojume nalëgeluletleme.

<sup>10</sup> Na Sekaraia lale lëkaluna wesibi Gotome kë ahojume tletlebë olëna, feilawa oneho Gotobë tako lotu lo li mëta loko mëtletlëya na Gotome mana gëgali motlokwe fla.

<sup>11</sup> Sekaraia lale lëkaluna wesibi Gotome mana ahojume lëgletlebë, na kwe Gotobë ensel bume mana olafa tletle na lale lëkaluna wesibi këme ahojumbë masei li mëta, tobamu elëme tlibetle.

<sup>12</sup> Sekaraia, enselme hwi tlole na klikina metletlemu na ulina metletle.

<sup>13</sup> Na këme ensel bume gali tlole, “Sekaraia, ju uli asa ele. Goto jubë mëse nëba egehlebë gali waaholokwane tolë. Këme nëgeme jubë mëse Elisabet nëba fu egotleme. Na ju bubë weniji me fë saetle, ‘Jon.’

14 Kë nëba fu egotlena, jubë lowene lalowamu nalëbetëme na fleflesuna etabeme. Feilawa oneho mata fleflesuna mëtabëyame.

15 Tokwafe Goto bume mehwi nalogloleme nëgeme, lale homu. Bu wain taba liji tu na bia tu na hana hi lëgmemu. Bu botabë imo mëta manane na Gotobë Amtëtomba bu mëta mana lelutabetleme.

16 Na bu, Israelbë afenëbome lowene hihijika mëglabëme laitameme na ita bubë Gotome esogo melelëleme.

17 Gotobë lowene mago gali të totokweflebë ëtanifu ho, Elaija fenene, bu këha lakalena kalëlegona tafa nalëgleme. Na Tako Home leoutatleme. Bu bolijaya name, nëbale name melë logotomeme, yonane lowene mëta fwa tafa mlame. Na bu Gotobë gali kë momata mëgëtatlabë enëneme sle lotomeme na bu metafa namëglame, lale lowenena enënebë lowene fene lëbetëme. Na bu onehome sagli lëlelëmeme na Gotobë kalëlegona ho ligisibë olëme mana hwi namëgletlame.”

18 Na Sekaraia enselme gali tlole, “Bo habëna lowene nëgletelëmene, kë gali nëgali gali mu? Ju hwi ele! Bo wahoti nelë na bobë mëse mata wamëseti ebefe.”

19 Na ensel Sekaraiame gali metafufë tëtatlë, “Bo Gebriel. Bo Gotobë li mëta kë niglibekefëbë ho. Goto bu jine lelefakënë, jume gali nanoglëme na ebë lale gali të nanëtatëme.

20 Te! Ju aholokwane ele. Ju bobë gali lowene sle jwa egletleme nëgeme, elë ju gali mumu egëbeme. Ju gali mumu tabo tafa eglebëë, na jubë

mëse nëba mana fu totleme. Bobë gali olafa lëglebë olë, Goto waaniji lolole.”

<sup>21</sup> Oneho Sekaraiame yafe hwi mëtletla na metutune lamëtletla, “Bu lotu lo mëta tako tafa fëyeme lekulene, wesibi liha fata lekulene?”

<sup>22</sup> Tokwafe tekaklina, gëgali lëgleme fene kwe bu hana gëgali tle. Bu tobanawa lëlekuju tëbebokwaketëme. Bu gali wamumu tëbe. Oneho bume yafe hwi motlola na melowene lamëtletla, “Gotobë tako lotu lo mëta, Gotobë klelegowa wesibi hwi lelujelëfe.”

<sup>23</sup> Tokwafe, Sekaraia, Gotobë tako lotu lo mëta kë wege tëglebë wege yawe tle na bubë lifatewa mana tuju.

<sup>24</sup> Na tokwafe bubë mëse Elisabet nëba imona tètabe. Na bubë lo mëta fwa tobali yeme tafa tle. Na bu megali tle,

<sup>25</sup> “Goto maninibo tletënë. Bome kë fata lëgletënëbë wesibi, ebë Gotobë wesibi. Bo onehobë naba lime, layame kë tiglibebë tiniji, Goto wasle totle.”

### *Ensel Mariame megali tolë, “Jisame egehole naegleme”*

<sup>26</sup> Elisabet bu nëba imona tobali ita jowa yeme tafa tle na Goto, bubë ensel Gebrielme, Galili provinsbë tokwëfo lifate Nasaretwa mana jine tlële.

<sup>27</sup> Na bu layo mëse belë tujutë, bubë weniji Maria. Kë mëseme, eso ho Devitbë afenëbo mago ho, Josep sei lëglebëme wafi aniji motlëya.

<sup>28</sup> Na Gebriel gali tolë, “Bo nisiyo. Goto juna etabo na jume lataita na tako tole latletë.”

29 Maria kë gali aholokwane tlole na klelego metletle na tutune tle na melowene tle, “Kë habëtabo galine?”

30 Na ensel gali tolë, “Maria, ju uli asa ele. Goto jume fleflesumu lalëletë.

31 Aholokwane ele. Ju nëba egeholeme. Na ju iko nëba fu egotleme. Na ju bubë weniji mefë egotleme, ‘Jisas.’

32 Na bu flesu hoha lëgëtabeme. Na bu mefë namogotlame, ‘Tako kalëlegona Gotobë nëba mu.’ Na Goto bume eso home aniji loglome, bosome Devit fene tafa tle.

33 Na bu Jekopbë ilawa mago enënebë eso home unaunalëme lëtabetëme nalëgleme. Na bu eso home iniwa olë metafa lokoukëfeme.”

34 Na Maria enselme gali tlole, “Euowe. Bo nëba habëna nëgeholëmene? Bo ho sei hana nëlëlfë.”

35 Na ensel bubë gali metafu tëtätë, “Gotobë Amtëtomba jume ligisi tëme na kalëlegona Gotobë afutuku jume lamu lëgëtame. Këme nëgëme, kë nëba ju tokwafe fu egotlena bu Gotobë lale homu lëgëtabeme. Na bu mefë namogotlame, ‘Gotobë nëba.’

36 Ju aholo bo eta! Binabi Elisabet bu mësetimu kwe bu mata nëba ehole. Oneho megali kë mëtlekëfëtëyabë, ‘Bu layame eliboo,’ kwe aona yeme neme na bu nëba mana tafa egleme.

37 Goto bu Elisabetme nëba melë lëlë na jume mata nëba lëglëme. Gotome li wesibiha hana lëkle logotleme, bu lalowa iniwa wesibi melë logotomeme.”

38 Na Maria bume gali tlole, “Aholokwane ele. Bo Gotome wege nëgletelëbë mëse. Bu bome melë

malëtanë, ju fene gali ele.” Na kwe ensel bume kile tëta.

### *Maria Elisabetme hwime tujutë*

<sup>39</sup> Kë nalëwa, Maria bu hokweinawa fatini mëta kë tëgëbebë lifatewa tokwale, Judia provins mëta, Elisabetme hwi naegwelëme.

<sup>40</sup> Na bu Sekaraiabë lowa tëkaklu na Elisabetme gali tole, “Bo nisiyo.”

<sup>41</sup> Elisabet kë gali aholokwane tolë na nëba imo mago klikinamu metletë. Na Gotobë Amtëtomba Elisabet belë tisi të na buna mëtëtabo.

<sup>42</sup> Na bu Mariame anisasana gali tolë, “Goto jume fleflesumu lalëletë na jume tako lëgaitamë lalële kwe fli oneme, melëgaitame hana lële. Na kë nëba jubë imo mëta kë nëgebë, Goto bume mata tako lëgaitale lëgmememu.

<sup>43</sup> Bo lale mëse nane na bobë Tako Hobë bota, bo belë kë egisibë.

<sup>44</sup> Aholokwane ele! Bo jubë gali meaholokwane noglëna, ‘Bo nisiyo,’ kwe bobë nëba fleflesu lalëlule na klikinamu meleluletënë.

<sup>45</sup> Ju Gotome melowene sle tletle, ‘Goto kë wesibi jume kë gali toglëbë, melë lëgleme, këme nëgeme ju fleflesu këme egleme.’”

### *Maria Gotome kë fleflesu tëgletlebë sawa*

<sup>46</sup> Maria gali tle,  
 “Bobë lowene mago lowenena  
 Gotome fleflesu nëlekefëtelë,  
 na bibita notokweflë, ‘Goto bu lale mu.’

<sup>47</sup> Na bo Gotome fleflesu nëletelë.  
 Bu bome lëgaitanë ho,  
 bo tafa sle këme nelë,  
 bu melë lëgëtanëme nëgeme.

- 48 Bo bubë wege mëse,  
bo lale mëse nane.  
Kwe bu bome hwi tlonë  
na maninibo tletenë.  
Elina, unina mata,  
iniwa oneho megali mokoukefëtëname,  
'Goto bume tako fleflesu latletë.'
- 49 Na Tako Afutukuna Goto, bome lale  
wesibimume laitanë.  
Ebë kë nëgebë Goto,  
tëbo lowene hanane,  
lale lowene nawa lëtabe.
- 50 Bubë gali momata jwa kë mogotlabë onehome,  
Goto bume maninibo lëglekefëtëmeme.  
Bu itaita melë lotokefëmeme,  
ebë olëna kë tafa mëglabë onehome  
na tokwafe fu onehome mata  
itaita melë lotokwefëmeme.
- 51 Goto bubë afutukuna melë totome.  
Oneho bu melowene mëtlana,  
'Sebo kwe lale enënefe.  
Fli enëne bu seboha nane. Weye.'  
Na bume fwa fleflesu mëtletëma  
na bibita mototoma,  
bu këha enëneme hehë tletëme,  
na bu mitliwaya.
- 52 Bu kalëlegona eso home boblo totome,  
kwe atwati home taitame.
- 53 Bu foneme gigli mëtlabë onehome,  
lale wesibi tlëme  
na bubë imo sosolo memëtëtaya.  
Kwe feilawa wesibina onehome hehë tletëme  
na bu alujawa mitliwaya.
- 54-55 Bu bubë wege enëne,  
Israelbë ilawa mago enëneme taitame.

Na bu Abraham name, sebobë semlenino  
 name,  
 gali kë sle tētātēmebë gali  
 aholokwana hana ti tle.  
 Bu bume megali sle tle,  
 bume na bubë tokwafe fu afenëbome  
 itaita memaninibo lëkoukefētēmeme.”

<sup>56</sup> Maria bu Elisabetna aona yeme mētētabo na  
 bubë lifatewa tuju.

### *Elisabet Jonme fu totle*

<sup>57</sup> Elisabetbë nëba fu olë fata tletë, na bu iko  
 nëba mana fu totle.

<sup>58</sup> Bubë life mago oneho na weife mago enëne,  
 Goto bume kë maninibo tégletëbë gali  
 aholokwane mëtla na buna iniwa fleflesu  
 mëtletëya.

<sup>59</sup> Nëba tobali ita aona olë këniji tētabe, na bu  
 loko mëtletëya, kë nëbabë ato jibo tlë namëtatlame.  
 Na bu metole lamëtla, bolijaya Sekaraiabë  
 wenijina lëtabeme.

<sup>60</sup> Kwe bota gali tlome, “Matëbe. Bubë weniji  
 Jon.”

<sup>61</sup> Na bume gali motlëya, “Ju kë weniji fëyeme fë  
 etlene? Jubë afenëbo mago hobë weniji li këha  
 hana lëbe.”

<sup>62</sup> Na bu kë nëbabë bolijayame tobana lëlekujū  
 mëtletla, “Weniji habelë fë egotlemene?”

<sup>63</sup> Na bu yahi laba mëglëlabëme, tobanawa  
 lëlekujū tletëme. Na bu mëtletla na bu kë laba mëta  
 meyahi latle, “Bubë weniji Jon.” Na bu kë weniji  
 hwi motlola na klelego memëtla.

64 Na Goto Sekaraiabë gali laslewa têtatle na bu ita mana gali tle na Gotome fleflesu latletle na bibita totle.

65 Na bubë life mago oneho kë wesibi hwi motlola na klelego memëtletla. Na kë gali, Judia provinsbë fatini mëta kë tégëbagubë lifatewa fifiji mëtlagula.

66 Na bu kë gali aholokwane motokouja na tako tutune memotokouja na takune mëtla, “Tokwafe kë nëba habëtabo hoha lëgëtabemene?” Bu melowene mëtlame nëgeme, “Gotobë kalëlego bu mëta lëtabetle.”

### *Sekaraia Gotobë lowene mago gali të totle*

67 Gotobë Amtëtomba, kë nëbabë bolijaya, Sekaraia belë tisi tle na buna mëtëtabo. Na bu Gotobë lowene mago gali metë totle,

68 “Sebo Israelbë Gotome fleflesu manëletla na bibita manotla.

Bu seme, bubë onehome, lëgaitana nalëgleme tisi tëna,  
na seme nëno nalëgleme tisi tëna.

69 Goto, bubë wege ho Devitbë afenëbo mago, kalëlegona ho seme jine tlëtëna,  
seme lëgaitana nalëgleme, na nëno nalëgleme.

70 Ètani anebomu, Goto bu kë galime gali sle latlona.

Na bubë lowene mago gali të mototkweflabë ho,  
bu kë gali sle toglomebë gali të mototla.

71 Bu wagali sle tle, seme lëgaitana nalëgleme.  
Na seme kë wame moglonabë enëne magome na gëglë kë moglonabë enëne magome nëno lëgleme,

bu seme tëbo hana mëgëtaname.

- 72 Bu ëbaime sebobë semleninome megali sle  
latlome,  
'Bo some maninibo nëgletëyome na nëgaitome.'  
Na bume kë gali sle toglomebë gali,  
mana lowene tlekefëtëme,  
aholokwana hana ti tle.
- 73 Bu sebobë semle Abrahamme gali wasle tëtatlë.  
Na ebë olë, Goto bu metole lalëletëna,  
kë wesibi seme mefata lëgletëname,  
bu ëtani fene gali sle tle.
- 74 Bu metole lalële,  
bu seme kë wame moglonabë enënebë  
magome  
nëno lëgleme.  
Na sebo Gotome esogo sle nanëglelëlame  
na wame home uli jwa nanëletëmame.
- 75 Këme nëgëme, sebo ebë life mëta mana  
nëtabëyame,  
sebo bubë li mëta lalë lowene mëta natafa  
nëglame.  
Na sebobë lowene mëta  
bubë lalë lowenewamu lëbetëname.
- 76 Na ju, bobë nëba, tokwafe jume mefë mëgëtome,  
'Tako kalëlegona Gotobë lowene mago gali të  
totokweflebë ho.'  
Ju Gotobë kalëlegona hobëme eoutatleme  
na bubë alëge fu naegetatleme.
- 77-78 Ju Gotobë onehome okokwe  
na bu melowene namëglame,  
'Goto bume tako maninibo lalëletëme,  
na bubë tëbo lowene sle nalëtatëmeme  
na bume laitameme.'

Na bu heven life mago elulego seme  
lëglëname.

<sup>79</sup> Na oneho bu tëbo lowene mëta kë tafa mëglabë,  
kë elulego bume lale lowene olafa  
lëtatëmeme.

Bu lale tafa lowene seme olafa lëtatëname  
na sebobë lowene lalowa nalëbetëname.”

<sup>80</sup> Tokwafe, Jon, sigli lëleme na bubë lowene  
lalemu lëbetleme. Bu ho jwa tabo elë lutabeme.  
Bu lutabebë na mana Israelbë afenëbobë naba li  
mëta, bubë wege mana fa lotleme.

## 2

### *Maria Jisame fu totle*

<sup>1</sup> Elisabet bu Jonme wafu totle, na kë nalëwa,  
Rom lifate mago eso ho Ogastus, bu kë tafa  
lëglelëmebë onehome tabëi mëglabëme wasle totle.

<sup>2</sup> Gavman ëbame onehome hana tabëi tle.  
Ebënawa tabëi lëgleme. Na kë nalëwa, Kwirinius bu  
Siria provins magobë eso ho tëtabetëme.

<sup>3</sup> Këme nëgeme iniwa oneho bubë lifekuwa  
këme mitliwaya, Gavman bubë weniji gogwa  
nalëgletëmeme.

<sup>4</sup> Na Josep Mariana Galili provinsbë tokwëfo  
lifeku Nasaret kile mëtelo na Judia provinsbë  
tokwëfo lifeku Betlehemwa mitimo, bubë  
bosemlebë life nëgeme. Josepbë bosemlebë weniji  
Devit, Israelbë ëtanifu eso ho.

<sup>5</sup> Na bume sei lëglëbëme, kë aniji mototlabë  
Mariana mitimo, weniji bubëna iniwa sle  
namogotometëmame. Na kwe Maria nëba imona.

<sup>6-7</sup> Betlehem lifewa fwa mutulo. Na kë lifeku  
mago ni lobë ke mëtlame nëgeme na bulmakaubë

ni lo mëta këme ni mëtebo. Na bu kë lo mëta mana mëtëtabo na Maria amlebo mana fale tëta. Na bu abwa nëba mana fu totle. Na ëhona lei totle na bulmakaubë hi wesibi iseku mëta tuku tle.

*Gotobë ensel, sipsip kleli kë mëglëmabë home gali mëtehitëma*

<sup>8</sup> Na kwe Betlehem life li mëta, sipsip kleli mëtlëmabë ho mana tafa mëtla. Na bu klabëna bubë sipsip kleli këme mëtlëkefëma.

<sup>9</sup> Mëtlëmabëë, na Gotobë ensel fata tletëme na Gotobë elulego klijiha sisigli tëtagule na bume hwagënë totome. Na bu tako ulimu memëtla.

<sup>10</sup> Kwe Gotobë ensel gali tlome, “Sobo uli asa elo. Aholokwane elo! Bo some lale galimu nehityo. Iniwa oneho bu ebë lale gali aholokwane mëglana, kwe bu tako fleflesu mëglame.

<sup>11</sup> Ebë gali melë lëgëbelalële, ebë olëna, Devitbë lifeku mëta, mëse li nëba fu etle. Kë nëba bu some lëgaito nalëgleme, tëbo lowene mago nëno nalëgleme. Bu tako ho, na Goto bume wafi aniji tole, onehome lëgaitame nalëgleme, tëbo lowene mago nëno nalëgleme.

<sup>12</sup> Sobo mehwi eglolome. Ëhona leitabo nëba bulmakaubë hi wesibi iseku mëta ni lëbe.”

<sup>13</sup> Ensel wagali tlome na feilawa ensel lafatawa mëtletëme. Na bu Gotome fleflesu mëtletla na bibita mototla, na Gotobë sawa mefë lamëtëtatla,

<sup>14</sup> “Goto bu heven life mëta kë tafa lëglebë bu lale na tako mu. Oneho Goto kë fleflesu lëgletëmebë, bubë lowene lëgëbetëme sle malëletëme.”

*Sipsip kleli kë mëtlëmabë ho, Jisasme hwime mutujutla*

<sup>15</sup> Na kwe ensel bume hune mototoma na heven lifewa motokwala. Na sipsip kleli kë mëtlëmabë ho mana gali mëtla, “Te, mana manuja, Betlehem lifekuwa. Goto seme kë gali toglonabë wesibi hwi nanugujelërame.”

<sup>16</sup> Na bu hokweinawa mutuja. Na bume hohwi mëtëtagutla. Na Josep na Maria name mana hwi motloma. Na bulmakaubë hi wesibi iseku mëta kë ni tègebëbë nëbame mata hwi motlola.

<sup>17</sup> Bu hwi motlola na bu ensel kë gali toglobebë gali të mëtëtatëma.

<sup>18</sup> Na iniwa oneho, bu sipsip kleli kë mëglëmabë hobë gali aholokwane motloma, na klelego memëtla.

<sup>19</sup> Kwe Maria kë wesibi aholokwana hana ti tle na itaita lowene tlekefëtle.

<sup>20</sup> Na sipsip kleli kë mëtlëmabë ho, kë aholokwane mëtlabë gali na kë hwi motlomabë wesibime Gotome fleflesu motokoutla. Iniwa wesibi melë mëtleme nëgeme, Gotobë ensel fene gali tlome.

*Bu kë nëbabë weniji mefë mototla, “Jisas”*

<sup>21</sup> Tobali ita aona olë tètabe na bubë ato jibo mana tlë mëtëtatla, na bubë weniji mana fë mototla, “Jisas.” Maria kë nëba tehole jwa nëgena kwe Gotobë ensel këbë wenijibëme mana gali tolë.

*Simeonna Anana Jisasme tako lotu lo mëta hwi mëtelujelëlo*

<sup>22</sup> Na kë olë fotokoke tëme, Josep Mariame Jerusalem lifatewa tleouli, toba mago sasu ko, Gotobë naba li mëta sle naegotomeme, Mosesbë

gali fene tëbetle. Mëse bu nëba tafa eglena, toba sasu kowa egehona, kwe Gotobë naba li mëta tëbo lalëta. Na kwe bu nëba Jerusalem lifatewa mëtletlulo, Gotome mëglëlo namëgelome.

<sup>23</sup> Tlemalë bu metole lamëtelo, Gotobë gali kë lëgëbebë, kë galiwa esogo mëtletëtelo. Kë gali melë lëgëbelalële, “Sobo abwa mago iko nëba kë nëgebë, Gotome eglëlome.”

<sup>24</sup> Na Gotobë tafa sle gali mata melë lëgëbetlelalële, “Sobo tële seuneni o tële yolime nëbale, Gotome egehotelome, Gotobë naba li mëta, toba mago sasu ko këna sle naegotomeme.” Na bu fole këme mëtehoujo, lotu lome wege lëglebë ho, kë fole Gotome ahojume nalëgletleme.

<sup>25</sup> Na kë nalë, ho li Jerusalem lifate mëta tètabe. Bubë weniji Simeon. Kë ho kë nëgebë bu lalë lowenewa esogo tlelële na bu Gotome fwa lowene slemu tletle. Na Gotobë Amtëtomba bu mëta telutabetle. Simeon bu Goto kë jine lëglelebë hobëme hwi tletle. Israelbë ilawa mago onehome lëgaitame nalëgleme.

<sup>26</sup> Gotobë Amtëtomba bume megali sle latlole, “Ju ilawa hana gli egleme. Ëtani Goto bu megali slemu latle, ‘Bo ho jine nëglëlëme, onehome tëbo lowene mago nëno lëgleme.’ Ju kë home afina hwi eloleme na ju mana gli elëme.”

<sup>27</sup> Na kwe Gotobë Amtëtomba Simeonme tisi tle na bu Gotobë tako lotu lowa këme təkaklu. Na Jisabë botana bolijaya name, Jisame Gotobë lowa mëtletlulo, kë nëbame melë namogotlame, Gotobë gali fene lëbetle.

<sup>28</sup> Na Simeon kë nëbame hwi tlole na fa totle. Na bu Gotome fleflesu tletle na bibita totle na megali

tle,

29 “Tako ho, jubë gali sle gali watëbetë,  
na bo, jubë wege ho, bo maninibona wasle  
nelë,  
bo mana lalowa gli nelë.

30 Seme nëno lëglebë home,  
ju kë jine tëglëlebë ho,  
bo nabana wahwi nololë.

31 Ju kë home,  
iniwa onehome ekë lebotane etatëme.

32 Na kliji elulegoha, bu Gotobë lowene,  
Israelbë afenëboni mëtabëya jwa mëglabë  
enëneme  
olafa lëgëtatëmeme.  
Na bu Israelbë afenëbome,  
lëgaitame nalëgleme  
jubë lowene esogo mëglëlabë.  
Kë oneho ebë jubë.”

33 Jisasbë botana, bolijayana, Simeon nëbame kë  
gali toglobë gali aholokwane mëtelo na klelego  
memëtletelo.

34 Na Simeon Gotome gëgali tlelële, bume  
lëgaitame nalëgleme. Na bu kë nëbabë bota,  
Mariame, gali tolë, “Aholokwane ele! Goto ebë  
nëbame meaniji latlole, Israelbë lebutako  
afenëbome melë logotomeme. Lebutako oneho  
bume kë lowene sle mëgletlabë lowene, kile  
mlame na lebutako oneho bume kë lowene  
mëgletlabë lowene esogo sle meletlëame. Ebë nëba  
kë nëgebëye, Gotobë lale lowene, onehome  
lebotane lëtatëmebë ho. Kwe feilawa oneho bume  
tëbo gali moglolame,

<sup>35</sup> na bubë lowene mago tëbo lowenebë olafa lëgletëmeme. Na tokwafe ju tako hobota egleme, sêfa yo sle eglëbë fenene.”

<sup>36</sup> Na Gotobë lowene mago gali të egotlebë mëse li kë mëta tafa tle. Bubë weniji Ana. Bu Aserbë afenëbo magobë mëse, Fenuelbë nëba. Ètani bu ho sei tlële na bu kë hona tobali ita tële tlibutu këniji tafa mëtelo

<sup>37</sup> na bohe mana gli tletë. Na bu sei ju tètabe. Na èje bu 84 tlibutu këniji etabe. Bu Gotobë tako lotu lo kile hana tletle. Bu hi wesibi itaita yo tlekëfe, Gotome lowene sle naegletleme. Na bu Gotome mana gëgali tlelëkefle. Kljina, klabëna Gotome fwa lowene tlekefëtletle.

<sup>38</sup> Na kë nalë, Ana bu nëba loliwa tisi tle na Gotome mana gali tlole, “Ebë nëba, yaha fëyeme enënane.” Na feilawa oneho bu mehwi kë mëtkefëfëyabë, Goto bu Jerusalem lifate mago onehome nëno lëgleme. Na bu kë nëbabë gali kë onehome të tëtatëme.

*Josep, nona, Jisasna, Nasaret lifewa ita mutuja*

<sup>39</sup> Bu iniwa wesibi, Gotobë gali fene tëbe, melë wamototoma. Na kwe bu Galili provinsbë tokwëfo lifeku Nasaret lifekuwa ita mutuja. Ebë bubë life.

<sup>40</sup> Na kë nëba sigli lëleme na lolokwëne lëgleme. Na lale lowene bubë lowene mëta lëbetleme na Goto bume tako tole lëletleme na bume laitaleme.

*Jisas, falake tokwëfo nëgena, na botana bolijayana tako lotu lowa bume iniwa mëtletlulo*

<sup>41</sup> Iniwa tlibutuna, Jisas bolijayana, botana, Jerusalem lifatewa itaita lamëtëyeoukefo, Gotobë tako lotu olë lowene mëtletelome nëgeme. Israelbë

ilawa mago oneho, bu kë tako lotu olë, Goto ëtani bosemlenime kë tëgaitamebë olë na Isip lifate këna kile mëtëglabë olë, lowene mëtlegefëtle.

<sup>42</sup> Jisas bu we ita tële tlibutu kënjiji watle. Na kwe bu Jerusalem lifatewa ita mutuja bu ëbame fene mutujukefëya, Gotobë tako lotu olë lowene mëgletlame nëgeme.

<sup>43</sup> Kë tako lotu olë yawe motlola, na kwe bu Jerusalem lifate kile mëtla na bubë lifekuwa mutuja. Kwe falake tokwëfo Jisas, Jerusalem lifate mëta mana tafa tle. Botana bolijayana melowene hana mëtletelo, “Jisas mana tafa lële.”

<sup>44</sup> Weye, bu meweniji lamëtelo, fli enënena mana asë melawa. Këme nëgeme olë jowa buwa mëtëyeu. Tokwafe, bubë ilawa mago onehome na bubë yabe home, tëtakune mëtlagumo.

<sup>45</sup> Bu yafe tëtakune mëtlagumo, kwe hana hwi motlolo. Këme nëgeme bu lu mëtelo na Jerusalem lifatewa ita mëtëyeu, hohwi namogutatelome.

<sup>46</sup> Bume aona olë yafe hohwi mëtëtatelo. Na tokwafe bume tako lotu lo mëta hwi motlolo. Bu Gotobë gali okokwe moglomabë hobë ku mëta tafa tletëme. Na bubë gali mana aholokwane tlagukefëme na bume tëtakune tlokefëme.

<sup>47</sup> Iniwa oneho, bubë lowene yafe hwi motlotla na bubë tafu gali yafe aholokwane motlotla, klelegomu memëtletla.

<sup>48</sup> Botana bolijayana hwi motlolo, na klelego memëtletelo. Na bota bume gali tlole, “O hëyai, ju seme melë fëyeme etanone? Sebo blijayana jume yafe hohwi nëtatëyo na maninibona tëbo menëletëyo.”

<sup>49</sup> Kwe bubë gali tafu tëtatëme, “Sobo bome

fëyeme hohwi etatenone? Sobo bome melowene hana eletënëane, ‘Bo bobë ayabë lo mëta tafa manelë?’”

<sup>50</sup> Kwe bubë gali lowene hana mëtletelo bu yaya lamëtletelo.

<sup>51</sup> Na kwe buna Nasaret lifewa ita mutuja. Na bubë lowenewa esogo esogo tlelëkefëtëme. Kwe Maria bowene meta kë hwi toglometlebë wesibi, bubë lowene mëta mana tehotle.

<sup>52</sup> Na Jisas sigli tle na bubë lowene lalemu lëbetleme. Na Goto bume fleflesu lëletleme na iniwa oneho mata bume tole mëgletlame.

### 3

*Tu mëta baptais logotomebë ho, Jon, gali të tëtätëme*

<sup>1</sup> Eso ho Taiberius, bu we ita tobali tlibutu kënji, Rom life enënebë tako eso home tafa tletëme. Kë nalëwa, Pontius Pailat Judia provins enënebë eso home tafa tletëme. Na Herot Galili provins enënebë eso home tafa tletëme. Na bolijamo Filip bu Ituria na Trakonitis provins enënebë eso home tafa tletëme. Na Lisantias, bu Abilene provins enënebë eso home tafa tletëme.

<sup>2</sup> Na Anas na Kaiafas bu lotu lo mëta wege mëglabë enënebë eso ho mëtëtabo. Kë nalëwa, Sekaraia bowene Jon, ho jwa tabo mëta tafa tle na Gotobë gali bubë lowene mëta mana fata tletle.

<sup>3</sup> Këme nëgeme, Jon bu Jordan tu lime kë tafa mëtlabë lifekuwa tuju na gali metë tëtagutëme, “Sobo tëbo lowene aholokwana ti elome na lala lowenewa esogo elelëleme na baptais elome. Na Goto bu sobobë tëbo lowene aholokwana ti lëgletëyome na hana lëgeholeme.”

<sup>4</sup> Kë wesibi mefata latle, Gotobë lowene mago gali të totokweflebë ho, Aisaia, fene yahi tle. Bu meyahi latle, “Tokwafe, li ho, ho jwa tabo mëta mewe lëgleme, ‘Sobo tako hobë alëge fu etatelo, alëge sle etometelo.

<sup>5</sup> Bu iniwa klukulego tabobë na iniwa fofu tabobë sle motomame. Na iniwa alëge, ekekë mëglebë sasle mëtaguma. Na iniwa alëge tëbo mëglebë, sasle motoma.

<sup>6</sup> Na iniwa oneho, Goto onehome kë nëno lëglebë wege hwi moglotlame.”

<sup>7</sup> Feilawa oneho Jon belë mitisitla, bume baptais nalogotomeme. Kwe Jon bume gali tlome, “Sobo tëbo taijuha. Sobo tëbo enëne. Goto tako wame loglëyome na tëbo lëgëtome. Sobo melowene lalone hee! Bo some baptais nëgëtona kwe Gotobë wame some hana tëbo lëgëtomene? Weyewa.

<sup>8</sup> Sobo tëbo lowene aholokwana ti egelona na Gotobë lale lowenewa esogo eglelëlona, ta kë lowene saolafa etlo, bu melowene namëgletëyome, ‘Bubë tëbo lowene aholokwana wati mëlafa na Gotobë lale lowenewa esogo meletëlafa.’ Na sobolalo megëgali asa elo, ‘Sebo Abrahambë afenëbo, këme nëgeme Goto bu seme hana tëbo lëgëtaname.’ Weye. Bo some gali nolëyo, Abrahambë afenëbo ebë tokwëfo wesibi. Goto ebë anijime, Abrahambë afenëbome lalewa fata lotomeme.

<sup>9</sup> Gotobë wame bu onehome fata lëgletëmeme nounou lalëletëmemu, yasi ti wayome wafi lëbe. Na iniwa ti, lale liji mogwalë hana mëglëna, kwe Goto kë ti tëtëka lëgleme na ahojume sike lëleme.”

<sup>10</sup> Oneho bu Jonbë gali aholokwane motlola, na bume metakune motlola, “Sebo habelë nëglamene na Goto seme tëbo jwa nalëgëtaname?”

<sup>11</sup> Na bume megali tlome, “Fli enëne bu gelowa ëho tële tële nëgena, bu fli alujawa kë nëgebë enëneme sa mëlëma. Na fli enëne hi wesibina nëgena, bu hi wesibi jwa kë nëgebë enëneme sa mëlëma.”

<sup>12</sup> Takis baliti glo mëglabë ho fli, bu belë mitisiya, bume mata baptais nalogotomeme. Na bu takune motlola, “Tisa, sebo habelë nëglamene?”

<sup>13</sup> Na bume megali tlome, “Sobo takis baliti meglo egletemome, gavman fene gali tlëyo. Sobo fli baliti manawa asa glo eletemo.”

<sup>14</sup> Na wame home boblo mogotomabë enëne fli, bu mata takune motlola, “Na sebowa, sebo habelë nëglamene?” Na bume gali metafu tëtatëme, “Sobo fli enëneme gëglë asa elelëmo na bubë baliti toklime glo elome. Na sobo fli onehome gavmanbë naba lime blawa asa so etatemo na bubë baliti blawa glo eletemome. Na gavman some wege baliti kë lëglëyobë, këme fwa fleflesu egelome. Fli baliti glome asa tole elo.”

<sup>15</sup> Na oneho Jonme hwi motlola, na bubë lowene fotokoke tëme na bubë lowene nawa melowene mëtla, “Jon bu kë ho nawa, seme na nëno lëglebë ho nawa. Goto kë aniji toglolebë ho nawa.”

<sup>16</sup> Këme nëgеме Jon bubë gali metafu tëtatëme, “Bo some tu mëta fwa baptais nëlelëyo. Kwe tokwafe bobë nagi ho li ligisime. Na kë ho kë ligisibë bubë afutuku takomu kwe bobë afutuku tokwëfomu. Bo lale ho nane kë ligisi home kë

nëgaitalëme, manawa wege ho fene laitale. Weye. Bo bubë jiteho hana titika nëgletelëme. Bu letitabo homu nëgeme na bo atwati homu. Bu some Gotobë Amtëtombana, ahojuna baptais lëglelëyome.

<sup>17</sup> Na kë ho kë ligisibë bu tëbo lowenenabë enëneme na lale lowenenabë enëneme lëselokwame, nuju bolijaya hwetikina witi liji mago fene lëselokwa. Na bu lale lowene enëneme heven life elë sei lëlëmeme, nuju bolijaya bu witi liji, lale lo mëta fene gogwa lële. Kwe bu tëbo lowene enëne lële jwa ahoju life elëme sike lëgleme, nuju bolijaya witi liji mago hwetiki ahojume fene sike lële.”

<sup>18</sup> Jon bu feilawa gali të tëtatëme, onehobë lowene huju tëtatëme, lowene sle namëglame. Na kë esome fwa, Gotobë lale gali këme të tëtatëme.

### *Herot bu Jonme kalabusu lowa tuku tle*

<sup>19</sup> Herot, Galili provinsbë eso ho, bu bolijamobë mëseme, Herodiasme, hijika totle na sei tlë. Na Jon bume këme wame gali tlole. Na iniwa fli tëbo lowene Herot bu kë tëglebëmeha bume wame gali tlokwefle.

<sup>20</sup> Na Herot bu li tëbo lowene tle. Bu melëme, Jonme kalabusu lowa tuku tle.

### *Jon Jisame baptais totle*

<sup>21</sup> Kë nalëwa, Jon kalabusu lome tafa jwa tëglena. Bu iniwa onehome wabaptais totome, na bu Jisame mana baptais totle na Jisas Gotome mana gëgali tlole. Bu Gotome mana gëgali tlelëlebëë, na heven inoha latikawa tle.

22 Na Gotobë Amtëtomba seuneni foleha ji tètëkeketle. Na bu matafa mëta gali tle, “Ju bobë lale nëba. Bo jume tako tole nanëletë, tako fleflesu nanëletë.”

*Jisasbë bosemlembë weniji*

23 Jisas bubë aowafewe tlibutu mutuju tle na bubë wege mana fa totle. Na kwe oneho bume meweniji lamëtletla, Josepbë bowenefe.

24 Josep Helibë bowene. Na Heli Matatbë bowene. Na Matat Livaibë bowene. Na Livai Melkibë bowene. Na Melki Janaibë bowene. Na Janai Josepbë bowene.

25 Na Josep Matatiasbë bowene. Na Matatias Amosbë bowene. Na Amos Nahumbë bowene. Na Nahum Eslibë bowene. Na Esli Nagaibë bowene.

26 Na Nagai Matbë bowene. Na Mat Matatiasbë bowene. Na Matatias Semembë bowene. Na Semen Josekbë bowene. Na Josek Jodabë bowene.

27 Na Joda Joananbë bowene. Na Joanan Resabë bowene. Na Resa Serubabelbë bowene. Na Serubabel Sealtielbë bowene. Na Sealtiel Neribë bowene.

28 Na Neri Melkibë bowene. Na Melki Adibë bowene. Na Adi Kosambë bowene. Na Kosam Elmadambë bowene. Na Elmadam Erbë bowene.

29 Na Er Josuabë bowene. Na Josua Elieserbë bowene. Na Elieser Jorimbë bowene. Na Jorim Matatbë bowene. Na Matat Livaibë bowene.

30 Na Livai Simeonbë bowene. Na Simeon Judabë bowene. Na Juda Josepbë bowene. Na Josep Jonambë bowene. Na Jonam Eliakimbë bowene.

31 Na Eliakim Meleabë bowene. Na Melea Menabë bowene. Na Mena Matatabë bowene. Na

Matata Natanbë bowene. Na Natan Devitbë bowene.

<sup>32</sup> Na Devit Jesibë bowene. Na Jesi Obetbë bowene. Na Obet Boasbë bowene. Na Boas Salmonbë bowene. Na Salmon Nasonbë bowene.

<sup>33</sup> Na Nason Aminadapbë bowene. Na Aminadap Atminbë bowene. Na Atmin Arnibë bowene. Na Arni Hesronbë bowene. Na Hesron Peresbë bowene. Na Peres Judabë bowene.

<sup>34</sup> Na Juda Jekopbë bowene. Na Jekop Aisakbë bowene. Na Aisak Abrahambë bowene. Na Abraham Terabë bowene. Na Tera Nahorbë bowene.

<sup>35</sup> Na Nahor Serukbë bowene. Na Seruk Reubë bowene. Na Reu Pelekbë bowene. Na Pelek Eherbë bowene. Na Eher Selabë bowene.

<sup>36</sup> Na Sela Kainanbë bowene. Na Kainan Arpaksatbë bowene. Na Arpaksat Siembë bowene. Na Siem Noabë bowene. Na Noa Lamekbë bowene.

<sup>37</sup> Na Lamek Metuselabë bowene. Na Metusela Enokbë bowene. Na Enok Jaretbë bowene. Na Jaret Mahalalelbë bowene. Na Mahalalel Kenanbë bowene.

<sup>38</sup> Na Kenan Enosbë bowene. Na Enos Setbë bowene. Na Set Adambë bowene. Na Adam Gotobë bowene.

## 4

### *Satan bu Jisame tëbo loweneme fene susu totle*

<sup>1</sup> Gotobë Amtëtomba, Jisas mëta telutabetle na bu Jordan tu mago ita tuju. Na Gotobë Amtëtomba bume ho jwa tabo elë tlelule.

<sup>2</sup> Na Satan bume niliafewe olë tëbo loweneme fene susu totokwefle.

Na kë nalë, Jisas hi hana tle na bu foneme gli tle.

<sup>3</sup> Satan bume gali tlole, “Ju Gotobë nëba nëgebë kwe, ju ebë anijime gali eolëme na bu bletë nageme fata naeglamëme. Na ju hi elëme.”

<sup>4</sup> Kwe Jisas bume gali tafu têtatle, “Gotobë bogo megali lala, ‘Hi wesibiwa, onehome, lale tafame hana lëgaitameme.’”

<sup>5</sup> Na kwe Satan bume kë mago mana tilekole. Na bume iniwa tatako lifate lalebotanewa totometle.

<sup>6</sup> Na gali tlole, “Bo jume tako afutukume nëgaitëme, kë iniwa lifatebë onehome eso ho tafa naegletëmeme na ju tako eso home tafa elëme. Na bo kë lifatebë iniwa lale wesibi jume yo noglëme. Kë iniwa lifate na wesibi ebë bobë, bu bome wayo tlonë. Na bo li home yo noglolëbëme tole nëgelëna, kwe bo lalowa yo noglolëme.

<sup>7</sup> Ju bome sëkefo miti tafa eletenëna na bome megali eglonëna, ‘Ju bobë lale tako eso ho tafa eletenë, bo jume tako tole nanëletë,’ kwe bo kë iniwa lifate na iniwa wesibi jume yo noglëme.”

<sup>8</sup> Kwe Jisas bume gali tafu têtatle, “Gotobë bogo megali lala, ‘Goto buwa jubë eso home tafa lëletë. Ju bume fwa satole eletle na saesogo elelële.’”

<sup>9</sup> Na Satan Jisasmë Jerusalem lifatewa tlelule na tako lotu lo leli elë tilekole. Na bume gali tlole, “Ju Gotobë nëba nëgebë kwe, ju lalowa emagowa okli etëkake na ju tëbo hana eglitame. Hanane mu.

<sup>10</sup> Gotobë bogo megali eglamëme nëgëme, ‘Goto, bubë enselme jine lëglëmetëme, na bu jume ululu mëgëtome.’

<sup>11</sup> Na bu mata megali lala, ‘Bu jume fa mëgëmalitome bubë tobana, na jume aniji yo hana sle eglëme.’”

12 Na Jisas bubë gali tafu têtatle, “Gotobë bogo megali lala, ‘Jubë tako Gotobë afutuku asa su etatle.’”

13 Satan bu Jisame memelë wesibina wasusu têtetëfale, na bume kile totle, li olë nalë ita su nalogotleme.

*Jisas bu Gotobë lale gali, Galili provins mago onehome afina të têtatëme*

14 Jisas bu, Gotobë Amtëtombabë afutukuna, Galili provinswa ita tuju. Na Jisas kë tafa tëglebë gali, Galili provinsbë li life li life mago onehome fifiji mëtlagutëma.

15 Na bu li life li lifebë lotu lo mëta, Gotobë gali onehome okokwe tlagukefëme. Na iniwa oneho bume fleflesu mëtletla na bibita mototla.

*Nasaret life mago oneho Jisame enisusu memëtletla*

16 Jisas bu Nasaret lifewa tuju. Ètani bu kë lifeme sigli tle. Na bubë tafawa olëna, bu lotu lowa təkaklu, bu ëbame fene tlekëfe. Na bu hujuna tlibe, Gotobë gali hwi naloglotëmeme.

17 Na bogo kë ululu sle logotokwefëmebë ho, Gotobë lowene mago gali të totokweflebë, Aisaiabë bogo, bume tlële. Na bu bogo ya têtamë. Na këme kë galibë hwi tlome, kë gali melë lëgëbelalële,

18 “Gotobë Amtëtomba bo mëta têtabe. Këme nëgeme, Goto bu bome waaniji tlonë, bubë lale gali, wesibi jwa onehome të nanëgëtatëmeme. Na bu bome këme jine tlënë, kalabusu mëta kë tafa mëglabë onehome megali nanoglomëme, ‘Sobo kalabusu lo lalowa kile elo.’ Na naba titiki tabo

onehome megali nanoglomëme, ‘Sobo lalowa hwi elo.’ Na bu bome këme jine tlënë, gëglë kë mëglelëmabë onehome nanëgaitamëme na bubë afowelili sle nanogotometemëme.

<sup>19</sup> Na bu bome jine tlënë, onehome megali nanoglomëme, ‘Goto, bubë onehome kë lëgaitamebë olë, ekë folokoketle.’”

<sup>20</sup> Na Jisas bogo geni tëta, na bogo kë ululu sle logotokefëmebë home tlële na mana tafa tle. Na iniwa oneho, lotu lo mëta kë tafa mëtelulabë, Jisame fwa wëya mëtlelëla.

<sup>21</sup> Na kwe bume gali tlome, “Ebë gali, sobo Gotobë bogo mago kë aholokwane egelobë, bu ëje iniyafememu ekë fata lële.”

<sup>22</sup> Lale gali të totleme nëgeme na bume këme fleflesu mëtletla na bibita mototla. Na bume kë të tëtätëmebë gali mana lowene mëtletla. Kwe, bu megali mëtla, “Bu ebë galime, kë gali loglonabë, habelëme gali lëlene? Bu seme kë gali loglonabëye, kwe Josepbë nëba tekwe nëge.”

<sup>23</sup> Na Jisas bume gali tlome, “Bo walowene sle nëletëyo. Tokwafe sobo kë ëtanifu anebo gali bome të egëtatëname, ‘Dokta, jubë ato elili sle egotleme, na ilawa mago hobë ato elili mata sle etome tëmeme.’ Na sobo mata gali egloname, ‘Ju Kaperneam lifeku mëta wesibi melë kë totomebë sebo waaholokwane tletëyo. Na sebo metole nanëla, ju ebë lifekume mata, kë wesibi melë egotomeme.’

<sup>24</sup> Bo some iniyafeme gali nolëyo, bubë life mago oneho, Gotobë lowene mago gali të mototokweflabë hobë gali aholokwaneme, tole hana mëtla.

<sup>25</sup> Bo some iniyafeme gali nolëyo, Gotobë lowene mago gali të totokweflebë ho, Elaija mana têtabela, na seiju one feilawa, Israel provins mëta tafa mêtëkouja. Na kë nalë wanagli tako temotëme na aona tlibutu na tobali ita jowa yeme tu hana teto. Na tako fone iniwa lifateme fata tokoutëme.

<sup>26</sup> Kwe Goto bu Elaijame Israelbë ilawa mago seiju mëse belë hana jine tletëme. Weye. Bu li ilawa mago seiju mëse belë fwa jine tlëtë, bume lëgaitame nalëgleme. Kë mëse bu Saidon provinsbë tokwëfo lifeku Sarefat mago mëse na bu Israelbë ilawa mago nane.

<sup>27</sup> Na kë mata, Gotobë lowene mago gali të totokweflebë ho, Elisa mana têtabela, na feilawa ato juba jubawa kë mêtëgeholabë oneho, Israel lifate mëta mêtëtabëya. Kwe, Elisa kë mago juba jubawa onehome li hana sle totle. Weye. Bu Siria life mago ho, Namanme fwa sle totle. Naman bu Israelbë afenëbo nane, li afenëbo mago ho.”

<sup>28</sup> Na oneho, lotu lo mëta kë tafa mêtelulabë, bu kë gali aholokwane mëtla na melowene mëtla, “Bu seme, Israelbë afenëbome, gali lëlefe” na tako enisusu memëtletla.

<sup>29</sup> Na fe mêtëkaka na Jisame fa mototla, na bume lifeku tiniju elëme so mëtlagula, fatini mleibu elëme so namëtëlëkaklame fene. Bubë lifeku fatini mëta tobetëme.

<sup>30</sup> Kwe bu kukuwa lateiwa tëttagwi na latugujuwa.

### *Jisas ahwane hobë ato mago hehë tletëme*

<sup>31</sup> Na kwe Jisas Galili provinsbë tokwëfo life, Kaperneamwa tëmatale. Na bubë tafawa olëna, onehome Gotobë gali të tëtatëme.

<sup>32</sup> Bubë gali aholokwane motlola, na klelego memëtla. Bubë gali flesu hobë galiha nëgeme, kalëlegona tlëme.

<sup>33</sup> Na kë nalë, li ho lotu lo mëta tafa tle na ahwane bubë ato mëta telutabetle. Na bu feilawa aflei tle,

<sup>34</sup> “Nasaret life mago Jisas, ju seme habelë egëtaname esine? Ju seme tëbo naegëtaname esine? Bo jume wafi lowene nëletë, ju kë ho kë nëgebë, Goto jume kë jine tëglëbë homu. Ju Gotobë lale homu.”

<sup>35</sup> Kwe, Jisas kë ahwaneme anisasana gali tlole, “Ju kuju ebe na ebë home kile etoleme.” Na ahwane kë home life elëme so telëkakle na masana ku mëta titigo. Na kë ahwane, bume li atoha hana tëbo tëtatile na bume kile togotlena.

<sup>36</sup> Na iniwa oneho klelego memëtla na blalo gëgali mëtla, “Euowe! Ebë fëye galine? Bubë gali flesu hobë gali fene, kalëlegona tlëme. Bu ahwaneme anisasana gali tlome na bu home lakilewa mototome.”

<sup>37</sup> Na iniwa wesibi, Jisas melë kë totomebë, kë galibë, Galili provinsbë li life li life mago onehome fifiji mëtletëtëma.

### *Jisas bu Saimonbë bokokame sle tëta*

<sup>38</sup> Jisas lotu lo kile tle, na Saimonbë lowa tëkaklu. Saimonbë bokokabë ato, tako ahojute latletë. Na bu Jisame takune motlola, sle nalëgëtamë.

<sup>39</sup> Na kwe, Jisas bu loliwa tujutë, na kë ahojuteme anisasana gali tlole, bume kile nalëgëtamëme. Na ahojute bume lakilewa tëta na bu lahujuwa tëkake na hi wesibi ahojume tletëme.

### *Jisas feilawa onehome sle totome*

<sup>40</sup> Atome hwi olë, oneho bubë yabenime, ato elili kë mëtlabë, Jisas belë mëtlesuma. Na bubë toba iniwa ato elili enëneme gogwa tokoutëme na bu iniwa sle tëtagume.

<sup>41</sup> Na bu ahwane hehë tletëme. Na bu feilawa onehome hune mëtëtagume na meafëflei lamëttele, “Ju Gotobë nëbafë.” Kwe Jisas bume anisasana gali tlome, na gëgalime lëkle totome. Kë ahwane bu melowene mëtleme nëgëme, “Bu Goto kë aniji toglolebë ho, onehome nëno nalëgleme.”

### *Jisas li life li life asë tëbelëfa*

<sup>42</sup> Olobalë mu, Jisas kë life kile tle na ho jwa tabo elë tuju. Na oneho bume hohwi mëtëtatla na bume mana hwi motlola. Na bume yafe lëkle mototla, bume kile jwa nalogotomeme.

<sup>43</sup> Kwe bume gali tlome, “Goto onehobë eso home kë tafa lëgletëmebë lale gali, fli lifateme mata të nëtagutemëme. Goto bome këme jine tlënë.”

<sup>44</sup> Na bu Judia provinsbë, li life li life measë tëbelëfa na lotu lo mëta gali të tëtagutëme.

## 5

### *Jisas mo fafa home gali tlome, na bume nagi mëtlëla*

<sup>1</sup> Li olëna, Jisas, Genesaret lake tu helefome tlibe, na feilawa oneho mitisiya na bume lolime loko mëtlelëtla, Gotobë gali aholokwane namëglame.

<sup>2</sup> Na Jisas bu lake tu helefo mëta, tële ihe, hwi tlome. Kë ihe, mo fafa enënebë ihe. Kwe ihe

bolijaya enëne bu ihe wahune mëtla na solo swa mototoma.

<sup>3</sup> Na Jisas bu Saimonbë ihe mëta fe tle. Na bu Saimonme gali tlole, “Ju iheme fe elëme na so elëkakëme, helefo tokwëfo kilewa naegotleme.” Na Jisas iheme tafa tle, na mana onehome gali të têtatëme.

<sup>4</sup> Bu gali watë têtatëme, na Saimonme mana gali tlole, “Te, ku tako elë yegu ekake na sobo solo sike etëkakome, mo fafa naegelome.”

<sup>5</sup> Na Saimon gali tlole, “O tako ho, ëje klabë yafe sike sike nëla na olë feti na loko menëlebla, kwe sebo mo liha hana buhe notla. Kwe lalowa, jubë gali esogo nëgletëyome na solo sike nëglame.”

<sup>6</sup> Na bu melëmëtla, na mo feilawa tëkeji bubuhe mëtla, na solo ëjeha holëye mëleme.

<sup>7</sup> Këme nëgeme bubë weife wege ho flime, li ihe mëta kë tafa mëgelobëme, we motlomo, bume mëgaitamo namëgelome. Na bu mitisi temo, na mo, kë tële ihe mëta sisike mëtla. Na ihe mo hobota manogwa, ëjeha flu mëleme.

<sup>8</sup> Na Saimon Pita këme hwi tlole. Na Jisasbë elebo lime sëkefo bubusu totometle na gali tlole, “O, tako ho, ju bome kile etanë. Bo tëbo homu.”

<sup>9</sup> Saimon na kë tafa mëtlabë ho, kë feilawa mo hwi motloma na klelegomu memëtletëma.

<sup>10</sup> Na Saimonbë yabe, Jems na Jon, Sebedibë nëbale, bu mata klelego memëtelo. Kwe Jisas Saimonme gali tlole, “Ju tutune asa ele. Ëje ju mo fafa ele, kwe tokwafe ju onehome bo belë eglesumetenëme, bome esogo namëglenëname.”

<sup>11</sup> Na kwe bu yegu motokouja na yenëba mëta fla mëtla na ihe yenëbawa kiki motokwaka na

bubë iniwa wesibi këme hune mëtla na Jisame nagi mëtlëla.

*Jisas bu ato juba jubawa kë tëgehlebë home sle totle*

<sup>12</sup> Li olëna, Jisas li lifate mëta tafa tle. Na ato juba jubawa kë tëgehlebë ho kë mëta tafa tle. Bu Jisame hwi tlole, na bu belë tisi tle na sëkefo miti bubusu totometle na gali tlole, “Tako ho, ju tole eglena, ju bobë ato lalowa sle etatenëmene na bo Gotobë naba lime lalowa nanëtabëme.”

<sup>13</sup> Na Jisas toba gwa totatle na gali tlole, “Bo tole nanelë, ju lalowa etabeme.” Na kë juba juba lalujuwa mëtletle. Na bu lalowamu tëtabe.

<sup>14</sup> Na Jisas bume anيسانamu gali tlole, “Jubë ato lalowa kë lëgëbetëbë, ho lime asa gëgali elëlele. Matëbe. Ju ejume na jubë ato, lotu lome wege lëglebë home lebotane eoutatleme. Na ju bume wesibi ejuwelëleme, Moses fene gali tle. Na bu kë wesibi Gotome lëlëleme. Na iniwa oneho melowene namëgletëyome, ‘Jubë ato lalowa lëbetë.’”

<sup>15</sup> Na iniwa wesibi, Jisas melë kë totomebë, kë gali, li life li life feilawa fifiji mëtlagutla. Këme nëgëme, lebutako onehomu mitisitla, bubë gali aholokwane namoglolame na bubë tëbo sle nalogotometëme.

<sup>16</sup> Kwe bu lebutako olë, onehome hune tlekëfe na ho jwa tabo elë, Gotome gëgalime, tuju këfë tle. Na Jisas bubë lowene wahwi tlotëme na kë ato mogowa home gali tlole, “O nëba iko. Bo jubë tëbo aholokwana wafi ti nëletë.”

*Jisas ato mogo tabo home sle totle*

17 Li olëna, Jisas onehome gali mana okokwe tlome. Na Farisi ho\* na Gotobë galime okokwe moglomabë hona kë mëta tafa mëtla. Bu Galili provins mago, na Judia provins mago, na Jerusalem lifate mago, na li life li life mago mitisiya. Na Gotobë afutuku Jisas mëta mana tëbe, na bu onehome këbë afutukuna sle totome.

18 Na fli ho, ato mogo tabo home sanënena mëtlesula. Na bume lowa mëglelukakulame yafene, Jisasbë elebo lime gwa namugujetlame fene.

19 Kwe lebutako oneho lo mëta tafa mëtlame nëgeme, na lo wake tle, na bu loliwa hana mëtehila. Këme nëgeme, bu lo leli elë mëtehilikola, na anabali tatë mototaya, na ni labuku mëta kë ni tëgëbebë ato mogo tabo home onehobë ku mëta alabujuwa gwa mëtëmalitala, Jisasbë li mëta.

20 Kë enëne melowene mëtla, “Jisas ebë ato mogowa home lalowa sle logotlemefe.” Na Jisas bubë lowene wahwi tlotëme na kë ato mogowa home gali tlole, “O yabe. Bo jubë tëbo lowene aholokwana wafi ti nëletë.”

21 Na Gotobë galime okokwe moglomabë ho fli, na Farisi ho fli bubë gali aholokwane motlola na blalo gëgali mëtla, “Èèè! Bu habëtabo hone, Gotoha kë fata lëglebëye? Bu këha gali fëyeme gali lëlene? Bu tëbo homu. Bu Gotome fëyeme boblo lotlene? Ho kwe hobë tëbo lowene aholokwana hana ti lëgletleme. Hanane mu. Goto bu kwe fëyemene, tëbo lowene aholokwana lalewa ti lëgleme.”

22 Na Jisas bubë lowene walowene tletëme. Na

---

\* **5:17** Farisi ho bu Mosesbë gali feilawa esogo mëglelëtlabë hobë weniji. Bu metole lamëtla, Gotobë naba li mëta lale tafa namëglame. Bu Jisasbë olë mëta tafa mëtla.

bume takune tlome, “Sobo këha lowenena fëyeme lowene elone?”

<sup>23</sup> Bo bume megali noglolëna, ‘Bo jubë tëbo aholokwana wati nëletë,’ sobo habë lowene lalone, bo bubë tëbo lowene aholokwana wati nëletelë? Sobo kë wesibi hwi hana elolo. Kwe bo bume megali noglolëna, ‘Ju huju ele, na jubë lowa ejume.’ Na bu huju lëleme, kwe sobo melowene egelome, ‘Bo Gotobë kalëlegona ho, na bo tëbo atona ho lalowa sle nogotlëme. Na bo mata hobë tëbo lowene aholokwana lalowa ti nëgletemëme.’

<sup>24</sup> Kwe bo metole nanelë, sobo melowene egelome, ‘Bo, Gotobë life mago ho, bo ebë life mëta, kalëlegona homu nëtabë. Na bo tëbo lowene aholokwana lalowa ti nëgelëme.’” Na Jisas ato mogo tabo home hwi tlole na gali tlole, “Bo jume gali nolë, ju huju eleme, na jubë ni labuku glo eleme na jubë lowa ejume.”

<sup>25</sup> Na kë ho, kë ni tęgëbebë, onehobë naba li mëta lahujuwu tle, na këme ni tęgëbebë ni labuku glo tle, na Gotome fleflesu tletle na bibita totle na bubë lowa tuju.

<sup>26</sup> Na iniwa oneho bu klelego memëtla, na Gotome fleflesu mëtletla na bibita mototla. Na megali mëtla, “Èje sebo lale klelegowa wesibi fli hwi noloma.”

*Jisas Livaime gali tlole, “Ju bome nagi enënë”*

<sup>27</sup> Tokwafe, Jisas tuju, na takis baliti kë glo lëglekefëtëmëbë home hwi tlole. Bu takis lo mëta tafa telule. Bubë weniji Livai. Na Jisas bume gali tlole, “Ju bome nagi enënë.”

<sup>28</sup> Na Livai huju tle, na iniwa wesibi hune tle, na Jisasmë nagi telëkakle.

29 Na kwe Livai Jisame lebutako hi wesibimu bubë lo mëta ahojume tletle. Na lebutako takis baliti kë glo mëglekefëyabë ho na fli ho mata, buna tafa mëtla na hi mëtla.

30 Na Gotobë galime okokwe moglomabë ho, na fli Farisi ho, Jisasbë lowene esogo mëglelëtlabë home momata mëtlelëma na megali motloma, “Sobo, takis baliti kë glo mëglekefëyabë ho na fli tëbo lowene kë esogo mëglelëlabë enënename fëyeme hihi elelëkefëmone? Bu tëbo enëne mu.”

31 Na Jisas bubë gali tafu tëtätëme, “Dokta bu tëbo jwa mëglabë home hana sle logotomeme, hanane mu. Ho tëbo mëglabë kwe fëyemene, dokta bume fwa sle logotomeme.

32 Na bo kë fenene. Oneho bu meweniji lamëtla, ‘Sebo, Gotobë naba li mëta, lale enënefe,’ bo këha onehobë lowene sleme nane tisi. Weye. Kwe oneho bu melë lowenena kë tafa mëglabë, ‘Sebo Gotobë naba li mëta tëbo enënefe,’ kwe bo këha onehobë tëbo lowene sleme tisi, bubë tëbo lowene aholokwana ti namëglame na Gotobë lale lowenewa esogo namëglelëlame.”

### *Jisas bu hi wesibi kë yo yo mëglabë lowenebëme gali tle*

33 Na fli ho Jisame gali motlola, “Lebutako olë, Jonbë lowene esogo mëglelëtlabë ho bu hi wesibi yo yo mëtlekefëya, Gotome lowene sle namëgletlame na Gotome gëgali mëtlelëkefla. Na Farisibë lowene esogo mëtlelëtëtabë ho, bu mata melamëtla. Kwe jubë lowene esogo mëglelëtëyobë howe, bu kë lale lowene esogo hana mëlelëla, bu hihi melekefëya.”

<sup>34</sup> Na Jisas wafle gali tlome, “Ho bu mese sei legleña, na mese sei leglebe hi wesibi sale fata logotlena, na ke ho buna mana tafa meglana, kwe bu hi wesibi yo meglamene? Weye. Hanane mu.

<sup>35</sup> Kwe tokwafe, wame ho bu ke mese sei home meglelulana, na bu bubë yabe hona tafa jwa meglana, kwe ke olëna bu hi wesibi mana yo meglame.”

<sup>36</sup> Jisas bume wafle galime gali tlome. Bu megali latlome, “Ho li tiho gelowa ëho hana ka logotleme, na ke tiho ëho katabo hëno gelowa ëho mëta hana susu logotleme. Weye. Bu melë leglëna, kwe bu tiho gelowa ëhome tëbo logotleme, na ke tiho ëho ka tabo na hëno gelowa ëhona weife weniyanëna hana mëgebome.

<sup>37</sup> Na ho li bu tiho wain taba liji tu, ëtanifu mëmë kleli jibona ke blëge blëge mototlabë botolo mëta hana wë logotleme. Bu melë leglëna, na ke tiho wain taba liji tu sëse leglëna, kwe ëtanifu mëmë kleli jibo botolome bule logotleme na wain taba liji tu lifewa owë lëkakeme.

<sup>38</sup> Këme nëgeme, ho li bu tiho wain taba liji tu, tiho mëmë kleli jibo botolo mëta wë logotleme na bu hana bule legleme.

<sup>39</sup> Onëho bu hëno wain taba liji tu wahi meglabë, kwe bu tiho wain taba liji tu tole hana mletëma. Bu megali lamla, ‘Hëno wain taba liji tu ebë lalowa mu.’”

## 6

*Jisas, tafawa olëna wege jwa meglala galibëme gali tlome*

<sup>1</sup> Jisas tafawa olëna, witi liji nuju kukuwa bule mëtëtagujaya. Na bubë lowene esogo mëglelëtlabë ho, witi liji tëtälë mëtla, na sosa mototoma, jibo foke namëgletëmeme. Na mana afabo hi mëtla.

<sup>2</sup> Na Farisi ho fli, bume hwi motloma na këme takune mëtla, “Euowe! Ebë kwe sobo sogëna lalo. Ebë kwe tafawa olë fe. Sobo tafawa olëna, hi wesibi, fëyeme tëtälë elone? Fëyeme wege elone? Moses bu ëtani kë lowenebëme tako hehë latle.”

<sup>3</sup> Na Jisas bubë gali tafu tëtatëme, “Sobo, sebobë ëtanifu eso ho, Devitbë gali, Gotobë bogo mago, hwi sle hana elolone? Bo melëme gali nolëyo. Ëtani Devitna, kë tafa mëtëglabë ho, foneme gigli memëtla.

<sup>4</sup> Na Devit Gotobë lowa təkaklu, na bu Gotobë naba li mëta kë gogwa mëtlabë bletë nage glo telule. Kë bletë nage, oneho hana hihi mëtla, lotu lome wege mëglabë ho, buwa hihi mëtla. Kwe Devit wali hi tle na bume kë tafa tëglelëmebë home wali sa tëtatëme na bu hi mëtla. Sobo kë gali hwi hana elolone? Eëë?”

<sup>5</sup> Na Jisas bume ita gali tlome, “Kwe bo, Gotobë life mago ho, bo tafawa olëbë tako ho.”

*Tafawa olëna, Jisas toba mogo tabo home sle totle*

<sup>6</sup> Li tafawa olëna, Jisas lotu lowa təkaklu, na onehome gali tē tëtatëme. Na tobamu toba mogo tabo ho këme tafa telule.

<sup>7</sup> Na Gotobë galime okokwe moglomabë ho, na Farisi ho, Jisame mana hwiwa motlola. Bu melëme hwi motlola, bu tafawa olëna, onehome sle logotomemene o hanane? Bu melowene namëglame, “Jisas bu tafawa olëna onehome sle logotomena, kwe bume onehobë gali

aholokwane moglomabë letitabo hobë naba li elëme mëglelula namëglame, bume tëbo namogotlame. Bu tafawa olëna wege lëgleme nëgeme.”

<sup>8</sup> Kwe Jisas bubë lowene walowene tletëme. Këme nëgeme, kë toba mogo tabo home gali tlole, “Ju bo belë esime na emëta elikakime.” Na kë ho bu belë taju tle na bubë lime tlibetle.

<sup>9</sup> Na Jisas bume takune tlome, “Sebobë semle Mosesbë gali habelë lëgëbetle lalëlene? Sebo tafawa olëna lala lowene lalowa esogo nëglelëlamene o tëbo lowene esogo nëglelëlamene? Sebo onehome lalowa nëgaitamamene, bu lala tafa namëglame o tëbo nogotomame?” Kwe bubë gali tafu hana mëtëtatla.

<sup>10</sup> Na Jisas bume hwi tlagume, na kë home gali tlole, “Jubë toba elili etokwakle.” Na bu melë totle, na bubë toba lalowa tëbetle.

<sup>11</sup> Kwe Gotobë galime okokwe moglomabë ho, na Farisi ho, bu tako enisusu memëtletla, na blalo gëgali mëtla, “Euowe, Sebo Jisasme habelë nogotlamene?”

### *Jisas bu we ita tële home aniji tlome*

<sup>12</sup> Na kë nalëwa, Jisas fatiniwa tokwale, Gotome gëgali nalëglelëleme. Na bu klabë tako, Gotome gëgali tëgëmailalebë na mana feti na loko metleble.

<sup>13</sup> Kliji fe tole, na bubë lowene esogo mëglelëtlabë home gali telokwakëme, bu belë migisitla namëglame. Na bu belë mitisitla. Na bu

we ita tële home aniji tlome, na Aposel\* wenijina fëfë totome.

<sup>14</sup> Bu Saimonme aniji tlole. Na Jisas bume li tiho weniji fë totle, “Pita.” Na bu Saimonbë bolijamo, Andrume mata aniji tlole. Na bu Jems, Jon, Filip, Bartolomyu,

<sup>15</sup> Matyu, Tomas, Alfiusbë bowene Jems, Saimon name aniji tlome. Saimon bu Selot ho.†

<sup>16</sup> Na bu Jemsbë bowene Judas name aniji tlome. Na Judas Iskariot name mata aniji tlome. Judas Iskariot bu Jisasme wamehome kë yo toglomebë ho.

### *Jisas lebutako onehome sle totome*

<sup>17</sup> Jisas, bu kë aniji toglomebë ho name, fatini mago kle mëtëmalitaya. Na buna fli lowene esogo mëglelëtlabë hona, lale tabo mëta tlebime. Na feilawa oneho, Judia provinsbë li life li life mago, na Jerusalem lifate mago, na Tair na Saidon nutu helefo li mago, bu mata kë mëta mëtëtabëya.

<sup>18</sup> Bu këme loko mëtëlelëta, Jisasbë gali aholokwane namoglolame na bubë tëbo sle nalogotometëmeme. Na ahwane kë tëbo mototomebë onehome, sle totome.

<sup>19</sup> Na iniwa oneho bume yafe lu mototla. Tako afutuku bu mëta tëgëbetleme nëgeme, na kë afutuku bume laslewa totome.

### *Atwati enëne fleflesu matla*

---

\* **6:13** Aposel weniji ebë Jisasbë wege kë fa nogotlabë enënebë weniji. Jisas, Gotobë gali tëme kë jine tëglëmebë enënebë weniji.

† **6:15** Selot enëne bu metole lamla, li life mago ho bu seme eso home asa tafa malëletëna.

<sup>20</sup> Jisas swaya tletëme na bubë lowene esogo mëgleletlabë home hwi tlagume na këme gali tlome, “Sobo tëlewa wesibina enëne, kwe fleflesu egelome. Sobo Gotobë oneho etabetelo, na Goto bu some eso home tafa lëletëyo.

<sup>21</sup> Sobo fonoba kë tafa egelobë enëne, kwe fleflesu egelome. Tokwafe sobo hi wesibina memelë wesibina matahëna fe egelome.

Sobo ye kë eglekefobë enëne, kwe fleflesu egelome. Tokwafe sobo soso egelome.

<sup>22</sup> Sobo bome, Gotobë life mago home, esogo eglenëname nëgeme, bu some tëbojiwa këme mëglëyome, na këme hehë mletëyome na këme klëi galina gali moglëyome na këme sobobë weniji sisile mogotometëyome. Oneho bu some këha melë mëgëtona, kwe sobo fleflesu egletemome.

<sup>23</sup> Sobo fleflesu elome na tëtane ebome. Tokwafe, Goto some heven life mëta feilawa wesibi lëglëyome. Ètani bubë bosemnenino, bu Gotobë lowene mago gali të mototokweflabë home mata melamototokwefëma.

<sup>24</sup> Kwe sobo feilawa balitina enëne. Sobo hai! Sobo, sobobë lale wesibi wafi glo elo na sobobë lale tafa wafi fa etlo. Sobo tokwafe naba lalawa egotome.

<sup>25</sup> Sobo hi wesibi mëta kë egemulubë na imo feilawa kë tëtafu egotomobë enëne. Sobo hai! Kwe tokwafe sobo fone egelome na naba lalawa etome.

Sobo sostonawa kë egëtabobë enëne. Sobo hai! Tokwafe sobo ye egelome. Na naba lalawa etome.

<sup>26</sup> Na iniwa oneho some fleflesu mëgletëyona na bibita mëgëtona. Sobo hai! Ètani bubë

bosemlenino bu Gotobë lowene mago gali të mototokwefëmabë sosogëna enëneme kë fene melë lamototoma.”

*Some kë wame moglëyobë enëneme tole sle egletemome*

<sup>27</sup> Jisas ita gali tlome, “Sobo bobë gali kë aholokwane egletë nabë enëneme gali nolëyo, some kë wame moglëyobë enëneme tole sle egletemome. Na ho some gëglë mëglëyona, sobo bume tole sle egletemome na maninibo egletemome.

<sup>28</sup> Fli ho some hana mëglëyona, sobo Gotome gali elëlome, bume lëgaitame nalëgleme na bume lale wesibi lëglëme nalëgleme. Some kë gëglë mëglëyobë enëneme, Gotome gali elëlome, bume maninibo nalëgletëmeme.

<sup>29</sup> Na ho jume ahino elë bu lëglëna, kwe bu malële, ju bume kofaya asa tëke elole. Weye. Ju jelë ahino elë obwelë etatleme, bu jubë jelë ahino elë mata bu nalëgleme. Na ho jubë gelowa ëho li fa logotlena kwe fa malotle, na kwe li gelowa ëho mata elëleme.

<sup>30</sup> Ho fli jume wesibime takune mëglëyona, ju bume eglëmewa egleme. Na ho jubë wesibi fa logotlena, ita lëgleme asa takune elole.

<sup>31</sup> Iniwa wesibi sobo fenene tole eletemo, some melë lamëto, sobo kë wesibiwa bume melë egotomome.

<sup>32</sup> Ho some kë tole mëgletëyobëme fwa tole egletemona, kwe ho sobobë lakaleme habëna lowene mëgletëyomene? Tëbo lakalena enëne mata bume kë tole mëgletëmabë enëneme, bu tole lamëletëma.

<sup>33</sup> Ho some kë mëgaitobë, sobo bume fwa egaitamona, kwe ho sobobë lakaleme habë lowene mëgletëyomene? Tëbo lakalena enëne mata, bume kë mëgaitamabë enëneme memaitama.

<sup>34</sup> Sobo melowene egelona, ‘Bu sebobë baliti seme kofayame lalowa mëglënamefe.’ Na sobo bume fwa baliti esokwaneme eglëmona, kwe ho sobobë lakaleme habëna lowene mëgletëyomene? Tëbo lowene enëne bu fli tëbo lowene enëneme baliti esokwaneme memelë melëma. Bu melowene mëgletëmame nëgeme, ‘Kofaya seme mata mëglënamefe.’

<sup>35</sup> Kwe sobo, sobobë wame home tole eletemome na lale lowenenawa yonane elelëmome. Sobo bume baliti elëmome, na melowene asa elo, ‘Bu seme tokwafe ita mëglëname.’ Weye. Sobo melë lalowa, kwe tokwafe sobo lale wesibi fa egotlome, na sobo tako kalëlegona Gotobë nëbale egëtabome. Gotome fleflesu jwa mëglekefëtlabë enëneme, na tëbo enëneme mata, Goto bume lalowa lëgaitameme.

<sup>36</sup> Sobobë heven life mago blijaya, fli enëneme fene maninibo lëletëme, sobo mata melë maninibo egletemome.”

### *Sobo fli enënebë lakale asa hwi eletemo. Matëbe*

<sup>37</sup> “Sobo fli enënebë lakale asa hwi eletemo na megali asa elomo, ‘Bu tëbo enëne.’ Sobo melë egelona, kwe kofaya Goto mata sobobë lakale hwi sle lëgletëyome, na megali lëlëyome, ‘Sobo tëbo enëne.’ Sobo fli hobë tëbo lakale aholokwana ti egletemome na lowene asa elekefëtemo. Na Goto

sobobë tēbo lakale mata aholokwana ti lēgletēyome na hana lowene lēglekefētēmeme.

<sup>38</sup> Sobo ho lime wesibi elēlome na Goto bu mata some kofayame wesibi lēlēyome. Bu some feilawa wesibimu lēglēyome. Bu wesibi ēfomemu kale lotomeme, owē mēkaketleme. Na some lēlēyome. Sobo wesibi home kēniji elēmowe, kwe Goto mata some kēnijiwa lēglēyome.”

<sup>39</sup> Jisas bume waflē galime gali tlome, “Naba titiki tabo ho, li naba titiki tabo home alēge lalowa lebotane lēgētagutlemene? Weye. Bu melē mēgelona kwe bu iniwa fulujuwa mitigwēyome.

<sup>40</sup> Tisa kē okokwe loglalebē nēba bubē tisabē lowene hana sigli lētatileme. Kwe tokwafe bu tisabē lowene, lowene sle lēletlena, kwe bubē tisabē lowene fene lēbetle, bu kēha melē lēgleme.

<sup>41</sup> Ju hwetiki tokwēfo, blijahabē naba mēta kē egēbatlebē, fēyeme hwi elotlene na kwe jubē naba mēta tako ti bule tabo tako kē lēgēbetēbē, lowene jwa fēyeme eletlene?

<sup>42</sup> Ju tako ti bule tabo tako jubē naba mēta kē lēgēbetēbē hwi hana eglolena kwe ju li afame habē gali eglollemene, ‘O afa, bo jubē naba hwetiki tokwēfo, lalowa tufiji nēgētātēmene?’ Weye. Ju sosogēna ho. Tako ti bule tabo, jubē naba mēta kē lēgēbetēbē afina tufiji etokwakleme. Na tokwafe ju hwi sle ekakeme na tokwēfo hwetiki, blijahabē naba mēta kē egēbatlebē, mana lalowa tufiji gētatleme.”

*Tēbo ti, tēbo liji mogwalēme*

<sup>43</sup> Jisas ita wafle gali tle, “Lale ti, tebo liji hana mogwaleme. Na ke fenene, tebo ti mata, lale liji hana mogwaleme.

<sup>44</sup> Ho bu ti liji afina hwi molola na weniji lowene mletla. Ho bu atowai liji, walelaba ti mago hana tetle legleme na bu wain taba liji, ikiji taba mago hana tetle legleme.

<sup>45</sup> Lale ho bu feilawa lale lowene bubu lowene meta lebetle. Keme negeme bu lale lowenena keme tafa lele. Kwe tebo ho bu feilawa tebo lowene bubu lowene meta lebetle keme negeme bu tebo lowenena keme tafa lele. Tebo lowene bu meta lebetlena, kwe tebo galime gali lele. Kwe lale lowene bu meta lebetlena, kwe lale galime gali lele.”

### *Lale lo gliji ho na tebo lo gliji ho*

<sup>46</sup> “Sobo bome mefe feyeme etanane, ‘Sebobu tako ho,’ kwe bobu gali esogo jwa feyeme eleletenane?

<sup>47</sup> Ho bu bo bele ligisina na bobu gali aholokwane leglena na esogo leglelena, bo keha hobu lowene some gali nogleyome.

<sup>48</sup> Ke ho bu lale lo gliji leglebu ho fenene. Bu life afina kake yefi lele, na mesebahiha ti keme le letame. Na lo ke matawa gliji lole. Na tokwafe haliji tu ligisina na ke lo yafe bebbe logotlena kwe bu hana fli logotleme, bu lale kallego lo gliji tegleme negeme.

<sup>49</sup> Kwe ho bobu gali aholokwane leglena na esogo hana leglelena, bu tebo lo gliji leglebu ho fenene. Bu life hana yefi legleme na kallego jwa ti le sle hana legetame. Tokwafe haliji tu ligisina na

kë lo bēbē logotlena kwe bu lafliwa lotleme na tēbo lēleme.”

## 7

*Jisas bu wame home boblo mogotomabē enēnebē eso hobē wege home sle tētatlē*

<sup>1</sup> Jisas onehome gali watē tētātēme na Kaperneam lifewa tuju.

<sup>2</sup> Na wame home boblo mogotomabē enēnebē eso ho kē life mēta tētabe na bubē wege ho jowa. Bu kē wege home tako tolemu latlekefētēle, kwe bu tako tēbomu latletle na ējeha gli lēletleme.

<sup>3</sup> Na wame home boblo mogotomabē enēnebē eso ho Jisas kē tafa tēglebē gali aholokwane tle, na kwe bu Israelbē afenēbonibē letitabo enēne fli, Jisas belē jine tlēme, bume takune namoglolame, bu ligisi nalēgleme na bubē wege home sle nalēgētatlēme.

<sup>4</sup> Bu Jisas belē mutuju tla na bume anisasana gali motlola, “Kē wame home boblo mogotomabē enēnebē eso ho, bu lale homu. Ju lalowa egaitalēmene?”

<sup>5</sup> Bu seme, Israelbē afenēbonime, tole latletēna, na bu sebobē life mago lotu lo gliji tletēna.”

<sup>6</sup> Na kwe Jisas buna mutuja na loliwa fwa mutula na kē wame home boblo mogotomabē enēnebē eso ho, bubē yabe home Jisas belē jine tlēme, bume megali namoglolame, “Tako ho, matēbe, menuju asa kēkē ele. Bo lale ho nane, ju bobē lowa kē ekaklime. Weye. Bo tēbo ho.

<sup>7</sup> Na bo mata, bo lale ho nane, ju belē kē nigisime. Weye. Bo tēbo ho. Kwe, ju galiwa elēme, na bobē wege ho lalowa nalēgetabetenēme.

<sup>8</sup> Bo ebëha gali këme gali nelë. Fli eso ho bu bome tafa mlelëna na bo mata wame home boblo mogotomabë enëneme tafa nëlelëmë. Na bo ho lime megali noglolëna, ‘Ju eiju,’ kwe bu lalugujuwa. Na bo ho lime megali noglolëna, ‘Ju esi,’ kwe bu laligisiwa. Na bobë wege home megali noglolëna, ‘Te, ju wege ele,’ kwe bu lawegewa lële.”

<sup>9</sup> Jisas kë hobë gali aholokwane tlotle, na klelego metletle, bume tako lowene sle lëgletleme nëgeme. Na bume kë esogo mëtlelëlabë onehome swaya tletëme na gali tlome, “Bo some gali nolëyo, bo Israelbë afenëbo ku mëta, këha lowene sle lëgletenëbë home hana hwi nololë. Kë wame home boblo mogotomabë enënebë eso ho bu bome tako lowene sle lëletënë kwe Israelbë afenëbo bu iniwa këha nane, bu bome tokwëfo lowene slewa lamletëna.”

<sup>10</sup> Na kë ho, kë jine tëglëmebë, bu kë eso hobë lowa ita mitisiya, na kë wege home yafe hwi motlola, kwe wasle tle.

### *Jisas bu seiju mësebë nëba huju tëtätë*

<sup>11</sup> Tokwafe, Jisas bu li lifekuwa tuju. Kë lifekubë weniji Nain. Na bubë lowene esogo mëglelëtlabë hona na fli feilawa onehona, bu nani iniwa mutuja.

<sup>12</sup> Na bu kë lifekubë lëgleso ino elëme loliwa fwa mëtëkakija, na bu u mogo kë mëtlelëkakilabë home esune mëtlëma. Na kë u mogobë bota, nëba jowa na bu seiju tafa ele. Na feilawa oneho kë lifeku mago, bu kë seiju mëseme nani mëtlesujaya.

<sup>13</sup> Jisas kë mëseme yafe hwi tolë na tako maninibomu metletë na gali tolë, “Asa ye ele.”

14 Na bu loliwa tuju tle na u mogo kë lëgëbebë sanëne lu totome. Na u mogo kë mëtehilabë ho mana këme fwa mitlija. Na Jisas gali tle, “Falake, bo jume gali nolë, ju mana huju ele.”

15 Na gli këtëglebë falake, huju tle na tafa tle na mana gëgali tle. Na Jisas botame tlë.

16 Na iniwa oneho klelego memotokouja na Gotome fleflesu mëtletla na bibita mototla na gali mëtla, “Goto bubë lowene mago gali kë të togotlebë ho tako kalëlegona ekë jine lëletëna. Goto bu wafi lisi tëna, bubë onehome lëgaitame nalëgleme.”

17 Na Jisas kë nëba kë huju totlebë gali, Judia provinsbë li life li life fifiji mëtlagula na kakë elë mago life mata fifiji mëtlagutla.

*Tu mëta kë baptais totokwefëmebë Jon, bubë lowene esogo mëtleletelobë ho, Jisas belë jine tlëme*

18 Jonbë lowene esogo mëgleletlabë ho, iniwa wesibi Jisas kë sle totomebë, Jonme gali motlola.

19 Na Jon bubë lowene esogo mëtleletelobë home, gali telokwakëme, na bu mitisijo. Na bu kë tlemalë home Jisas belë jine telokwakëme, bume metakune namoglolome, “Goto jine gali kë lëglelebë ho, kë ho ju ekënëne, o kwe sebo li home hwi nëgletlamene?”

20 Na kë tlemalë ho, Jisas belë mitisijo. Na bume gali motlolo, “Tu mëta, kë baptais totokwefëmebë Jon, seme ju belëme jine lëlëbakëno, na bu jume metakune lalolë, ‘Goto jine gali kë lëglelebë ho, kë ho ju ekënëne o kwe sebo li home hwi nëgletlamene?’”

21 Kë nalëwa, Jisas, bu lebutako onehobë memelë ato elili sle sle totometëme, na onehobë ato mago lebutako ahwane hehë tletëme. Na bu lebutako naba titiki tabo onehome sle totometëme.

22 Na Jisas Jonbë lowene esogo mëtletelobë hobë gali tafu têtatëme, “Iniwa wesibi sobo kë hwi eglomobë na kë aholokwane egelobë sobo Jonme sagali ejuwelëlo. Naba titiki tabo oneho wahwi mla, na elebo tëbona oneho asë sle mla, na ato juba jubawa kë mëtëbetëmebë oneho, bu lale tafa mla, na aholo titiji tabo oneho bu waaholokwane mla, na gigli kë mëgebëyabë oneho wahuhuju mla, na bu Gotobë lale gali, wesibi jwa enëneme të mëtatëma.

23 Oneho bome kë lowene sle mëgletë nabë lowene kile jwa mëglana kwe bu fleflesu matla.”

24 Jonbë gali kë mëtehilobë ho wamëtëyeu, na Jisas Jonbë gali onehome megali tlome, “Sobo ëbame ho jwa tabo elë kë tëgëyeubë, sobo habëtabo home hwime tëyeune? Sobo lí li lowenena home hwime tëyeune, flelu agosaba fene abeiabei lotome? Weyewa.

25 Sobo fëye wesibi hwime tëyeune? Sobo, lale ëho kë gelo togotlebë home hwime tëyeune? Weyewa. Ho bu lale lale ëho ato mëta kë mëgëbetëmebë na lebutako lale wesibi kë mëgëbetëmebë, bu walujume nane tafa mla. Weyewa. Bu tako lifatebë eso hobë lo mëta tatafa mla.

26 Sobo fëye wesibi hwime tëyeune? Gotobë lowene mago gali të totokweflebë home hwime tëyeune? Kwe nëgali fe? Na bo some gali nolëyo, kë

Gotobë lowene mago gali kë të togotlebë ho bu lalowa mu, kwe fli Gotobë lowene mago gali kë të mogotlabë ho bu sogë lalowaha.

<sup>27</sup> Gotobë bogo, Jonme, megali lalatlle, ‘Aholokwane elo, kwe tokwafë bo ho lime jine nëglëlëme, bobë gali të nalëtaguleme. Na bu jume loutatëme. Na bu alëge jume fu nalëgëtagutëme.’

<sup>28</sup> Bo some gali nolëyo, Iniwa oneho bu ëtani kë tafa motokweijabë na ëje mana kë tafa mokouja, bu letitabo hoha kwe Jonye bu tako letitabo homu. Kwe, Goto eso home kë tafa lëgletëmebë oneho mago, li atwati homu kë tëtatabë, bu letitabo homu kwe Jonye bu sogë letitabo ho.”

<sup>29</sup> Na iniwa oneho na takis baliti kë glo mëglekefëyabë hona bu kë gali aholokwane mëtla na gali mëtla, “Gotobë lowene ebë lale mu.” Jon bume wafi baptais totomeme nëgeme na bu kë galime këme gali mëtla.

<sup>30</sup> Kwe Farisi ho, na Gotobë galime okokwe moglomabë hona bu Jon mëta baptaisme iweniji lamëtla. Këme nëgeme bu, Goto kë lebotane tëtatëmebë lale loweneme, tëboijiwa këme molola.

<sup>31</sup> Na Jisas bu ita gali tlome, “Ebë olëna kë tafa mëglabë oneho bu fëye wesibihane? Bo some wafë galina lëlekuju nëletëyo.

<sup>32</sup> Kë oneho bu fli hobë gali tole hana mletëma. Bu nëbale lifeku kume kë salë mëglabë fenene. Bu fli nëbaleme gali melëkakëma, ‘Iniwa wesibi sebo metole kë nëgletëmabë, sobo kë wesibime tole hana eletemo. Sebo some ifeife nëletëyo, sebo sobona sawa nanëglame kwe sobo sawame tëboijiwa lalo. Na sebo maninibo ye nëla kwe sobo

tëboijiwa lalo na ye hana elo.”

<sup>33</sup> Na Jisas ita gali tlome, “Jon, onehome kë baptais totomebë ho, bu tisi na bu bletë nage na wain tabo liji tu hana hi tle. Kwe sobo gali telo, ‘Ahwane tëbo bu mëta tafa lële.’

<sup>34</sup> Na bo, Gotobë life mago ho, bo tigusibë na bo hi wesibi hi telë na wain taba liji tu hi telë na sobo gali tlekefo, ‘Sobo hwi elo, bu feilawa hi lëglekefëbë ho na feilawa wain taba liji tu hi lëglekefëbë ho. Na bu takis baliti kë glo mëglekefëyabë hobë yabe na tëbo lowene kë fa motokweflabë hobë yabe.’

<sup>35</sup> Sobo këha gali gali elekefo, kwe oneho bu Gotobë lowene kë fa mogotlabë, bu seme melebotane mëtatëname, Gotobë lowene ebë nëgali mu.”

### *Mëse li, Jisasbë juba lëkaluwa tuna swa totometle*

<sup>36</sup> Farisi ho, bubë weniji Saimon, Jisame no tlële, buna hi namëgelome. Na Jisas kë hobë lowa təkaklu na hi labuku mëta tafa tle.

<sup>37</sup> Na lisei lisei tëglebë mëse, li kë lifeku mëta tètabe. Kë mëse, gali meaholokwane tle Jisas Farisi hobë lo mëta kë lètabe. Na bu lala anijina kë blëge blëge mëtëtayabë botolona lëkaluwa tu fa totle.

<sup>38</sup> Na bu Jisas kë mëta tafa lëglebë lowa tlelëkakule, na Jisasbë elebo li mëta tlibetle. Na mana ye tle. Bu ye tlebë na nabatu Jisasbë juba mëta tuha tetotë. Na bubë eslehuba heletanënona, Jisasbë juba mago nabatu sosa totometle. Na bubë juba ëfalëbona itaita momotlë tletle na lala lëkaluwa tu juba mëta wë tëtatlë.

<sup>39</sup> Na kë Farisi ho Jisame bubë lowa hime kë notëglëlebë, kë mëse, Jisame kë fa tëgëtatlebë

wesibi yafe hwi tlole na bubë lowenenawa melowene tle, “Kë ho, Gotobë life mago nëgebë, kwe bu melowene lëgletëme fene, ‘Bu tëbo lakalena mëse.’”

<sup>40</sup> Jisas bu kë hobë lowene walowene tletle na bume gali tlole, “Saimon, bo jume li galime gali nolëme.” Na Saimon bume gali tlole, “Tisa, jubë gali të etle.”

<sup>41</sup> Na Jisas gali tle, “Tlemalë ho bu baliti li hobë toba mago esokwaneme glo mëtelo. Li ho bu we lujuafe we baliti esokwaneme kënji glo tle na liye we lujua balitiwa esokwaneme kënji glo tle.

<sup>42</sup> Kwe tokwafe kë tlemalë ho kofaya baliti mëglëlome fene kwe bu baliti hanane. Na këme nëgëme bu kë tlemalë hobë kofaya baliti glo lëglebë lowene aholokwana ti lëletëmeme na kë balitime ita hana takune loglomeme. Na ju habë lowene lalene, bu mago tlemalë ho ebë kë nëgebë feilawa tole yalë lëgletlemene o sozi tolewa yalë lëgletlemene?”

<sup>43</sup> Na Saimon bume gali tafu tëtatile, “Bo melowene nanelë, we lujuafe we baliti esokwaneme kë tëglëlebë ho, bume tako tole latletle.” Na Jisas bume gali tlole, “Jubë gali nëgali galimu.”

<sup>44</sup> Na Jisas mëseme swaya tokokwetë na Saimonme gali tlole, “Saimon, ju ebë mëse kë eglëbebëme hwi hana eolëne? Bo jubë lowa nëkaklina, kwe ju bobë juba tuna swa hana etometenë. Kwe ebë mëse kë nëgebë, bubë nabatuna bobë juba swa etometenë. Na bubë esolehubana sosa etometenë.

<sup>45</sup> Na ju bome ëfalëbona sësle hana etanë, kwe ebë mëse bobë juba ëfalëbona sësle etometenë.

<sup>46</sup> Na ju bobë eso mëta welë tu hana wë etatenë, kwe ebë mëse, bobë juba mëta lëkaluwa tu wë etatenë.

<sup>47</sup> Këme nëgëme bo jume gali nolë, ebë mëse kë nëgebë, bo bubë feilawa tëbo lowene aholokwana wati nëletë. Këme nëgëme bu bome tako tole këme eletenë. Kwe ho bubë tëbo lowene tokwëfo, na Goto kë tëbo lowene aholokwana wati lëletle kwe bu Gotome tokwëfo tolewa lëletle.”

<sup>48</sup> Na Jisas kë mëseme gali tolë, “Bo jubë tëbo lowene aholokwana wati nëletë.”

<sup>49</sup> Na buna masei li mëta kë tafa mëtlabë ho, bu kë gali aholokwane mëtla na blalo mana gëgali mëtla, “Ebë habëtabo hone? Bu sogëna lalële, tëbo lowene aholokwana habëna ti eglemene?”

<sup>50</sup> Na Jisas kë mëseme gali tolë, “Ju bome lowene sle egletenëme nëgëme, na Goto jubë tëbo lowene aholokwana këme ti lëletë. Jubë lowene wasle nëtatë. Ju fleflesuna eiju.”

## 8

### *Jisasna kë mutujabë one*

<sup>1</sup> Tokwafe, Jisas li life li life asë tëbelëfa na onehome, Goto onehobë eso home tafa lëgletëmebë, lalë gali të tëttagutëme. Na bubë lowene esogo mëgletëtlabë ho we ita tële, buna mutuja.

<sup>2</sup> Na fli one mata, ëbame ahwane tëbo bubë ato mago kë hehë tęgletëmebë na tëbo kë sle totometëmebë, buna mutuja. Liye, Makdala life

mago Maria. Ĕbame Jisas, tobali ita tēle ahwane tēbo, bubē ato mago hehē tletēme.

<sup>3</sup> Na liye Joana na Susana na fli feilawa one mata buna mutuja. Kē one kē nēgebē, bu Jisana bubē lowene esogo mēglelētlabē hona, bubē balitina, hi wesibina mētaitama. Joana ebē Kusabē no. Na Kusa, eso ho Herotbē lo tafa lēlēkefētlebē eso ho.

*Jisas mewaflē gali latlome, “Ho aoba liji nujume sike lēkou”*

<sup>4</sup> Li life li life mago oneho Jisas belē mitisiya. Na feilawa oneho bume loko mētletlētla. Na bume waflē gali tē tētātēme,

<sup>5</sup> “Ho li nujuwa luju, aoba liji sike nalēkoume. Bu aoba liji sike lēkoubē, na fliye alēgeme mititigo tle. Na oneho jubana fēfē melekefēya na fole jiwa mētēkekebē lahiwa mēle.

<sup>6</sup> Na fli aoba lijiye anijina flēke mēta mititigo. Na liji hulu mēle kwe kē flēke tu jwa nēgeme, na lakokowa mēbe.

<sup>7</sup> Na fli aoba lijiye, ikiji taba wayo mēta mititigo. Na kē ikiji tabana aoba liji weife hulu mētletle na kē aobame lamuwa mototome.

<sup>8</sup> Na fli aoba lijiye bu lale flēke mētamu mititigo. Na bu hulu mētletle na bubē liji feilawamu motowalē. Bubē liji kēniji motowalēwagu, we ljuafe we, we ljuafe we.” Jisas kē waflē gali watē tētātēme na onehome gali tlome, “Ebē gali aholokwane lalo, sobo salowene sle eletelo.”

*Jisas bu fēye lowene nane, waflē gali kē tē tētātēmebēye*

<sup>9</sup> Jisabē lowene esogo mēglelētlabē ho bume kē waflē gali wayobēme takune motlola.

<sup>10</sup> Na bu këme gali tlome, “Ëtani, Goto, onehobë eso home kë tafa lëglelëmebë gali olafa hana tletëme. Kwe ebë olëna bu kë ëho gali some waolafa tëtatëyo. Kwe bo fli onehome waflë galinawa gali tlome. Bo waflë galiwa këme gali tlome, bu mana itaita hwi mëglekefëyana kwe wesibi lowene sle hana mëgletlame. Na bu gali itaita meaholokwane mëglekefëyana kwe gali wayobë lowene hana mëgletlame.”

*Jisas bu aoba liji waflë gali wayobë tohwa sle tëtatëme*

<sup>11</sup> Na Jisas ita gali tlome, “Kë aoba liji waflë gali wayobë melë lëgëbetlälälë. Aoba lijiye, Gotobë galime lëlekuju ne.

<sup>12</sup> Na aoba liji alëgeme kë mititigobëye, bu Gotobë gali aholokwane mëglabë enëneme lëlekuju ne, kwe Satan ligisiwa lëglebë na kë gali bubë lowene mago lafawa letokwakëtëme. Satan bu melowene lälële, ‘Gotome lowene sle mëgletlalime na Goto bume nëno lëglelime.’

<sup>13</sup> Na aoba liji, anijina life mëta kë mititigobëye, bu ebëha enëneme lëlekuju ne. Bu Gotobë gali aholokwane mla na hokweinawa lowene mletla na flelesu mletla. Kwe bubë gali bubë lowene mëta lëgëbetëme sle hana lëletëme, olo wesibi fenene tayafo su sle hana motometëme. Këme nëgeme, kë nalëwa këme lowene mletla. Kwe hobota olë yafe fata lëletëme, Gotome aholokwana latiwa mla.

<sup>14</sup> Na aoba liji, ikiji taba wayome kë mititigobëye bu ebëha enëneme lëlekuju ne. Bu Gotobë gali aholokwane mla na lowene mletla, kwe bu ebë life mago hobota wesibime fwa tako

lowene lamletëma, na feilawa baliti glo mëglame fwa lowene mla, na bu ebë life mago lale wesibime fwa fleflesu mla. Na kë wesibiwa Gotobë gali lëlamu mëtatle, na bu Gotobë gali lowene sle jwa këme mletla. Bu tëtetabo hi wesibi fenene.

<sup>15</sup> Na aoba liji lale flëke mëta kë mititigobëye bu ebëha enëneme lëlekuju ne. Bu Gotobë gali aholokwane mla, na bu kë gali bubë lowenena kiki motla. Bubë lowenena maninibona lalowa mëbetëmemu. Na bu kë gali aholokwana hana ti mla na bubë lowene li wesibi mëtaha hana soslo lëletëme na bu lale lowene mëta fwa tafa mla.”

### *Oneho lamo fiji tabo isekuna hana lamu mëgëtayame*

<sup>16</sup> Jisas ita gali tle, “Oneho bu lamo fiji mëtayana, na isekuna hana lamu mëgëtayame o ni labuku lokwalëfe mëta hana ëho mëgëtayame. Hanane mu. Bu masei mëta gwa mëtaya. Na oneho lowa mëkaklijana, bubë elulego hwi namoglotëyame.

<sup>17</sup> Na wesibi elulego mëta fene olafa tletëme, iniwa wesibi ëho kë mëglebë, kwe tokwafe Goto olafa lotomeme. Na iniwa wesibi oneho ëho kë motomabë, kë mata, tokwafe Goto olafa lotometëmeme na oneho bu hwi molomame.

<sup>18</sup> Sobo ululu sle saelo, gali aholokwane sle naegelome. Ho bu Gotobë gali lowene sle lalëletlee kwe ita Goto bume fli lowene lëglëleme. Kwe ho bu Gotobë gali lowene sle hana lëletlee kwe Goto kë hobë tokwëfo lowene ita hijika logotleme na bu kë lowene aholokwana ti lëleme.”

### *Jisasbë bota na bolijahanino na bolijamonino yalëne*

19 Na kë nalëwa, Jisasbë botana bolijamonina mitisiya, bume hwi namoglolame. Kwe feilawa oneho bume loko mëtlelëtlame nêgeme na bubë li elë hana mutuju tla.

20 Na bume gali motlola, “Bitana, blijamonina, jume hwime misiya. Bu lo mëglëbo elë ekë milija.”

21 Kwe bume gali metafu latëtätëme, “Oneho Gotobë gali aholokwane mëglabë na esogo melelëkefëtlabë, buwa bobë beënino na keinëbalenino na afanino.”

*Jisas tu name flelu name gali tlome na latliwa mëtëbe*

22 Na kë nalëwa, Jisasna bubë lowene esogo mëglelëtlabë hona, ihe elë fëfe mëtla. Na megali tlome, “Te, sebo lake tu jelëfo elë mana su manëkaka.” Këme nêgeme bu mutuja.

23 Ihe tigiwabë na Jisas ni tëbe. Na tako flelu lake tu mëta fata tletëme, na lake tu ihe elë okokli tokoke, na tu tëtafu lëgleme kofene, tëbo namigitayame kofene.

24 Na bu Jisasma ni mago huju mototla na gali motlola, “Tako Ho, huju ele. Sebo tëbo niglitayame ekëyo.” Na bu huju tle na tu susugli name, flelu name kale tlome. Na kwe fleluna tu susuglina latliwa mëtëbe. Na tu mëgelimeha latëgemulewa.

25 Na bubë lowene esogo mëglelëtlabë home takune tlome, “Bome lowene sle jwa fëyeme eletënanane?” Kwe bu Jisasbë kalëlego hwi motlolame nêgeme na bu ulina tutunena memëtla na blalo gëgali mëtla, “Euowe! Ebë habëtabo hone? Bu galiwa lëglena, na fleluna tuna bubë gali laaholokwanewa molole.”

*Jisas ahwane tēbo, hobē ato mago hehē tletēme*

<sup>26</sup> Jisasna bubē lowene esogo mēglelētlabē hona Galili provins kile mototla na Galili lake tu jelēfo elē ihena su mētēkaka na Gerasabē walujuwa fwa mutula.

<sup>27-29</sup> Jisas ihe kile tle na helefowa fe tokwake, na ahwane kē tetēbo mogotlebē ho bume esune tlēle. Kē ho bu feilawa olē, ēhona nane tētabekēfe na bu lome fwa nane tatafa tlekēfe. Weye! Bu matēmatē life mēta fwa tatafa tlekēfe. Olēli olēli ho bume itaita fa mototokwefla na bu senē tabana, toba kabana yafe gēgelo mototokwefēmetla, kwe bu laeluluwa totokwefēme. Na kē ahwane tēbo bume ho jwa tabo elē memētēlūkefle lamētle. Kē ho Jisame hwi tlole, na tako afēflei metle na bubē elebo lime latitigotlewa. Na Jisas kē ahwaneme megali tlole, “Ju ebē home kile ele.” Na bu anisasana kēme afēflei tle, “Jisas ju tako kalēlegona Gotobē nēba mu. Ju bome habelē egētanēmene? Masiwafe, ju bome asa tēbo etanē.”

<sup>30</sup> Na kwe Jisas bume takune tlole, “Jubē weniji fē etlemo.” Bume feilawa ahwane mētēkaklu tleme nēgeme na bu metafū kēme tētatlē, “Bobē weniji feilawa ho.”

<sup>31</sup> Na kē ahwane Jisame anisasana itaita gali motlokwefla, “Ju seme ahojuna fuluju elē asa jine enēna. Matēbe.”

<sup>32</sup> Na kwe lebutako kleli bu fatini mleibu li mēta monei mētle. Na ahwane Jisame anisasana gali motlole, “Ju seme kē kleli belē jine elēkakēna, nēkakluja nanēglame.” Na kwe Jisas gali tlome, “Sobo lalowa eyeumo.”

<sup>33</sup> Na ahwane kē home kile mototle na kleli belē mētēkaklutēme. Na bu fatini mago lake tu elē fēka

mëtëmalita na tu mëta lasusugluwa mëtële.

<sup>34</sup> Na kleli mëglëmabë ho bu kë wesibi hwi motlola na mëtëlbouja. Na kë gali li life li life të mëtëtagula.

<sup>35</sup> Na iniwa oneho mutuja kë wesibi hwi namoglomame. Na bu Jisas belë fwa mutula na ahwane bume kë kile mototlebë home mana hwi motlola. Bu lale ëho wateho na bubë eso hana yaya tletle. Na bu Jisasbë elebo lime tafa tletle. Na bu iniwa uli memëtla.

<sup>36</sup> Oneho Jisame ahwane kë hehë tögletëmebëme kë hwi motlolabë, bu tokwafe kë mëtisiyabë onehome kë gali të mëtëtatëma.

<sup>37</sup> Na Gerasa lifate li mago life enëne bu kë gali aholokwane mëtla na bu tako uli memëtla na Jisame këme hehë mëtletla, bubë lifeku mago luguju nalëgleme. Na këme nëgeme Jisas ihe mëta fe tle, muguja namëglame fene.

<sup>38</sup> Kwe ahwane kë kile mototlebë ho Jisame anisasana takune tlole, “Bona lalowa nëgëyeumene?” Na kwe Jisas bume hehë metletle na këme gali tlole,

<sup>39</sup> “Jubë lifekuwa ejumo, na Goto jubë tëbo wesibi kë sle totometëbë gali të eoutatëmeme.” Na kë ho tuju, na kë lifate mago onehome, Jisas bume kë tégaitalebë gali të tutatëme.

*Jisas bu gli këtëglebë nëbame huju tëtamë, na tëbo atona mëseme sle tëtamë*

<sup>40</sup> Na kwe Jisas ihena lake tu jelëfowa ita su mëtëkaka. Na feilawa oneho bume hwi mëtëkefëtla na bume hwi motlola na tako fleflesumu memëtletla.

41-42 Na lotu lo hwi loglokweflebë eso ho tisi, bubë weniji Jairus. Jisame hwi tlole, na elebo lime latitigotlewa. Kë hobë nëba gli egleme kofene na bume anisasana këme takune tlole, bubë lowa lëglelule nalëgleme. Kë ho bu jowa nëbawa. Na kë nemosana nëbabë tlibutu tabei kënjiji, we ita tële.

Na kwe Jisas tuju na feilawa oneho buna gëgeniwa mutuja.

43 Na mëse li kë oneho buna iniwa mutuja. Kë mëse bu we ita tële tlibutuna ko latëkoukëfe. Ho bubë ato yafe sle sle mëtëtatëya kwe wino te hanatle.\*

44 Kë mëse Jisasbë leluju elëme tuju tle. Na bubë heletabo ëho mëta tobana lu totle na ko kë tëglebë latewa tle.

45 Na Jisas gali tle, “Bome ya lu lëtanëne?” Na iniwa oneho bume gali motlola, “Sebo kwe hanane.” Na Pita bume gali tlole, “Tako Ho, ju hwi hana elene, lebutako oneho juna gëgeniwa kë egëyeubë?”

46 Kwe Jisas gali tle, “Bo melowene nanelë, ho li bome tobana lu lëtanë. Bo mesu nanelë, bome fli afutuku wakile mëtanë.”

47 Na kë mëse melowene tle, “Bu walowene lëlefe, bo hana ëho nëgelëmefe.” Këme nëgëme bu lilina metle na tisi tle na Jisasbë elebo lime latitigotlewa. Na iniwa onehobë naba lime gali tle, “Bubë ëho, bo lu nëtatelëfe. Melëme nëgëme, bobë ato sle nalëgletenëme. Na bobë ato elili

---

\* **8:43** Fli lowene ho bu melowene lamëtla, li gali mana lëbe kë gali mëta. Kë gali melë lëgëbelalële, “Bu lili dokta belë yafe asë tëbelëfa kwe bubë baliti dokta enëneme yawe tlotëme.”

laslewa lëletenë.”

<sup>48</sup> Na Jisas gali tolë, “Mola, ju lowene sle egletenëme nëgeme, jubë ato këme titika lëletë. Na ju eiju. Tutune asa ele, lalowa tafa eguleme.”

<sup>49</sup> Jisas mana gëgali tlelëbëë, na ho, lotu lo hwi loglokweflebë eso hobë lo mago nëba wofu mana fata tlelëkakile. Na Jairusme gali tlole, “Jubë nëba wagli elo. Ju tisame ita sosalë asa etle. Matëbe.”

<sup>50</sup> Jisas kë gali aholokwane tle na Jairusme gali tlole, “Ju tutune asa ele, bome fwa lowene sle egletenëme na jubë nëba lalowa egëtabetëme.”

<sup>51</sup> Na Jisas Jairusbë lowa tuju. Na bu onehome buna mëkaklujame hehë latletëme. Bu Pita, Jems, Jon, kë nëba bota, bolijyaname fwa tlelëkakume.

<sup>52</sup> Na kë lo mëta kë tafa mëtlabë oneho bu kë nëbame tako maninibo memëtletëya, na ye mëtlelëkefëya. Na Jisas gali tlome, “Sobo fëyeme ye ye elelëyone? Kë nëba gli hana elo. Ni labe tekwe nëge.”

<sup>53</sup> Kwe bu Jisasme tako soso memëtlëlamu. Bu melowene mëtlame nëgeme, “Kë nëba wagli sle elefe.”

<sup>54</sup> Kwe Jisas kë nëbabë tobame fa tëta na anisasana gali tolë, “Nëba, ju huju ele!”

<sup>55</sup> Na bubë amtëtomba ita tisitë na lahujuwa tëkake. Na Jisas bume gali tlome, “Sobo bume hi wesibi elëyomo.”

<sup>56</sup> Na kë nëba botana bolijyana klelego memëtelo. Kwe Jisas bume anisasana gali tlome, “Sobo ebë wesibime ho flime asa gali elomo. Matëbe.”

*Jisas bubë lowene esogo mëglelëtlabë home jine tëbelëkakëme*

<sup>1</sup> Na Jisas, bubë lowene esogo mëglelëtlabë ho we ita tële kënijime gali telokwakëme na bu mitisitla. Na bu tako afutuku bume tlëme, bu ahwane onehobë ato mago kë afutukuna hehë namëgletëmame na tëbo kë mëglabë onehome sle namogotomame.

<sup>2</sup> Na bu, Goto onehobë eso home tafa lëgletëmabë gali të name na onehobë tëbo ato sle name, jine tëbelëkakëme.

<sup>3</sup> Na bume gali tlome, “Sobo egëyeuna, sobo wesibi asa ehoujo. Sobo liji, musu, hi wesibi, baliti, hihijika ëhona asa ehoujo. Matëbe.

<sup>4</sup> Sobo li lifekuwa tuhu egulona na ho some nëno lëglena, sobo kë lo mëta fwa nini ebekefome. Kë lo mëta nini ebekefobëë, na mana kë magowa eyeume.

<sup>5</sup> Na sobo li lifekuwa tuhu egulona na kë lifeku mago oneho some nëno hana mëglana, kwe sobo kë lifeku lakilewa elome. Sobo kë life mago egëyeuna, kwe sobobë juba mago flëke bubë naba li mëta bu elome. Bu some këme hwi mëglëyona na melowene namëglame, ‘Fëyeme tëbo nilitayane? Goto seme tëbo lëgëtanamefe.’”

<sup>6</sup> Na bubë lowene esogo mëglelëtlabë ho bu mana iniwa lifeku elë mitliwaya. Na bu Gotobë lale gali të mëtëtagumetëma na iniwa onehobë ato elili sle mëtëtagumetëma.

*Herot Jisame yaya tletle*

<sup>7</sup> Galili provins enënebë eso ho Herot, bu Jisas kë totomebë wesibi aholokwane tle, na bu feilawa këme tutune tlekëfe. Fli oneho megali

mëtlame nëgeme, “Ebë kwe, onehome kë baptais togotomebë, Jon, matëmatë mago wahuju tle.”

<sup>8</sup> Na fli oneho megali lamëtla, “Ebë kwe, ëtanifu ho, Elaija tekwe nëge, matëmatë mago huju tlefe.” Na fliye kwe megali lamëtla, “Ebë kwe, Gotobë lowene mago gali ëtani kë të mogotlabë ho li, tekwe nëge, matëmatë mago huju tle.”

<sup>9</sup> Këme nëgeme Herot megali latle, “Ëbame, bo wame home boblo logotomebë home gali tlole, na bu Jonbë eso, mou lokwati iniwa tlë tëtatlë. Kwe kë fëye homune? Bo ho mago meaholokwane nanolokwefëmë, bu klelegowa wesibi blëge lotokwefëme.” Na bu Jisame hwime tole tletle.

### *Jisas bu hi wesibi 5,000 home sa tëtätëme*

<sup>10</sup> Gotobë gali tëme kë jine tëgelëkakëmebë ho, ita loko mëtëkakija na bu iniwa wesibi melë kë mëtlabëme, Jisame të mëtëtatla. Na Jisas bume nëno tle, na bu fli onehome hune mëtla na bume fwa li lifekuwa tlelume. Këbë life weniji Betsaida.

<sup>11</sup> Tokwafe lebutako oneho melowene mëtla, “Bu wafi mujafe.” Na kwe bu nagi esogo mëtlaguma. Bu belë mitisitla na Jisas gali tlome, “Sobo lalowa esijo.” Na bu, Goto onehobë eso home kë tafa lëgletëmebë gali, të tëtätëme. Na bu tëbo atona onehome sle totome.

<sup>12</sup> Na taboklë mu, Jisasbë lowene esogo mëgletëlabë ho we ita tële, bu belë mitisiya na bume gali motlola, “Te, ju onehome mana jine ebelëkakëme, lolime kë mëgëbebë lifeku elë mana migliwaya, hi wesibime hohwi namëtayame na ni lo mata hohwi mëtatlame. Ebë ho jwa life nëgeme.”

13 Kwe Jisas bume gali tlome, “Sobowa hi wesibi elëmo.” Na bume gali motlola, “Sebo feilawa hi wesibi hanane. Sebo tobali bletë nage na mo tële, këwa ekë mëbe. Ju melowene lalene, ‘Sebo hi wesibi kë iniwa onehome balitina glo nanëgletëmamene, hee?’”

14 Ebë hobë tabei kënji 5,000.

Na Jisas bubë lowene esogo mëglelëtlabë home gali tlome, “Sobo onehome gali elomo, 50, 50 mëta tafa namokouja.”

15 Na bu melë mëtla na iniwa oneho tafa motokouja.

16 Na Jisas kë tobali bletë nage na mo tële glo tle, na matafa elë hwi tokwake na Gotome lale gali tlole, “Ebë bletë nagenä mona yaha fëyeme enënanë?” Na bu klelegowa wesibi blëge totome na kë bletë nagenä mona fufu totome na bubë lowene esogo mëglelëtlabë home tlëme, onehome sa namëgëtatëmame.

17 Na bu iniwa hi mëtla na hahana memëtletlëma. Na bubë lowene esogo mëglelëtlabë ho, lëne hi wesibi loloko mëtëtaya na we ita tële kënji basketë musu tëtafu mototoma.

*Pita megali latle, “Jisas, ju ebë ho kë nëgebë, Goto jume kë aniji toglibë ho, onehome nëno naegleme”*

18 Kë nalëwa, Jisas, buwa Gotome gëgali tlelële, na bubë lowene esogo mëglelëtlabë ho bu belë mutuju tla. Na Jisas bume takune tlome, “Oneho bome habë weniji lamlane?”

19 Na bume gali tafu mëtëtatla. “Fli onehowe megali lamëtla, ‘Onehome kë baptais togotomebë Jon, tekwe nëge, matëmatë mago huju tle.’ Na

fliye megali lamëtla, ‘Gotobë gali, ëtani kë tëgehilebë ho, Elaija, tekwe nëge, matëmatë mago huju tle.’ Na fliye megali lamëtla, ‘Gotobë gali ëtani kë mëtehilabë ho li, tekwe nëge, matëmatë mago huju tle.’”

<sup>20</sup> Na Jisas bume takune tlome, “Na sobo bome habë weniji lalone?” Na Pita bubë gali tafu tëtatlë, “Ju ebë ho kë nëgebë, Goto jume kë aniji toglëbë ho, onehome nëno naegleme.”

*Jisas gali tlome, “Bo gli nelëme na huju nëgelëme”*

<sup>21</sup> Na Jisas bume anisasana gali tlome na meheheë latletëme, “Sobo kë galibëme fli onehome asa gali elomo. Matëbemu.”

<sup>22</sup> Na Jisas bubë lowene esogo mëglelëtlabë home gali tlome, “Tokwafe bo, Gotobë life mago ho, lebutako elili na hobota fa nogotlëme. Na letitabo enëne na lotu lome wege mëglabë eso enëne, na Gotobë galime okokwe moglomabë ho, bu bome hehë mëgletëname na bome mogo nalë tëkle mëgëtaname. Na bo matëmatë mëta tële olë nebëme kwe aona olëbëye mana huju nelëme.

<sup>23</sup> Ho bome na bobë loweneme esogome tole lëglena kwe bu ebë life magobë lalë wesibi, bu kë tole lëgletëmebë, aholokwana satimu sle lëletëme na glime uli jwamu lëleme. Ho bume wame gali moglolana na bume mogo nalë tëkleme gali mëglana, bu uli jwa lëgleme na bome iniwa olë mana esogo lëlenënëme.

<sup>24</sup> Ho bu melowene lëglena, ‘Bo Jisame esogo nëglelëläna fli ho bu bome tëbo mëgëtaname.’ Na bu, bubë ato uli lëglelëläna na bome hana esogo lëglenënëna, kwe këha ho bu tëbo liglitame. Kwe

ho bu bome lowene sle lëgletenëna na bubë ato uli jwa lëglelëlena kwe këha ho bu hana tēbo liglitame. Ho bu kë home mogo nalë tēkle mogotlana, kë ho gli sle nane lële. Weye. Bu unaunalëme lale tafa lëgleme.

<sup>25</sup> Ho bu ebë life mago iniwa wesibi glo lëglena, na kë ho bu hel life mëta tēbo liglitana, kwe kë wesibi bume habëna mëgaitalemene? Hanane. Bu blawa glo lële.

<sup>26</sup> Tokwafe, bo, Gotobë life mago ho, bo tako elulegona nigisime. Bo bobë ayabë na bubë enselbë klijiha, kë u lëglebë elulegona nigisime. Na ho li, onehobë naba li mëta bobë galibëme able loglomena na bome able lëglena kwe tokwafe bo nigisina, bo mata kë home kofaya able nëgletelëme.

<sup>27</sup> Bo some nëgali nanolëyo. So mago emëta kë tafa egelobë bu mana neme na Goto onehobë eso home kë tafa lëgletëmebë olë mana fata lëleme. Na bu kë olë mana hwi mololame.”

### *Jisasbë ato li weniyanena fata tletle*

<sup>28</sup> Jisas kë gali wagëgali tle. Na tokwafe tobali ita aona olë mëtlëbou na kwe Jisas, Pita, Jems Jonname nëno tle. Na tako fatini lufuwa tilekome, Gotome gëgali nalogolelëleme.

<sup>29</sup> Bu Gotome mana gëgali tlelëlebëë, na bubë weniyanë li weniyanena mana fata tletle na bubë ëho melë tatiwamu fata tletle na feilawamu u tletle.

<sup>30</sup> Na tlemalë ho lafatawa mëtletelo na bume gëgali mëtletelëlo. Kë tlemalë hobë weniji, Elaija na Moses.

<sup>31</sup> Na bu Gotobë elulegona fata mëtletelo. Na bu Jisame, Jerusalem lifate mëta wesibi fata mëgletlebëme na bu gli lëglebëme na ebë life kile lëglebëme kë galime gëgali mëtletelëlo.

<sup>32</sup> Pita bume kë tafa tēglelēmēbē ho bu feilawa nilafale mëtla na ni mëtebëya. Na bu ni mago huhuju mëtla na Jisasbë elulego, na bume kë mëtletlibobë elulego, hwi motlotëma.

<sup>33</sup> Na tokwafe, kë tlemalë ho, Jisame kile mogotlome kofene kwe Pita gali tole, “O tisa, sebo eme tafa nēglabë, ebë lalowa. Sebo aomalë, aona afeteni tli lo gigliji nēglame. Li jubë lo, na li Elaijabë lo na li Mosesbë lo.” Pita bu yaya hoha gali tle na bu kë gali tēglebë gali lowene hana tletle. Bubë efalëbowa lëleguli tletle.

<sup>34</sup> Pita mana gëgali tlebëë, na oloba mana tetujule na bume iniwa lamu totome. Na bubë lowene esogo mëglelëtlabë ho uli memëtla.

<sup>35</sup> Na Goto kë oloba kweli mana gëgali tle, “Ebë bobë nēba. Bo bume wafi aniji tole, bobë wege fa nalëtatēme. Sobo bubë gali aholokwanewa eglolome.”

<sup>36</sup> Kë gali wayawe tole, na bu Jisaswa tlibe. Na bubë lowene esogo mëglelëtlabë ho, kë olëna, kë hwi motlomabë wesibi, ho flime hana gali motloma.

### *Jisas bu ahwane kë tēbo lotlebë nēbame sle totle*

<sup>37</sup> Li olëna, Jisas na bubë lowene esogo mëglelëtlabë ho aomalëna, fatini mago kle mëtëmalitaya. Na feilawa oneho Jisame alëgeme esune mëtletlëla.

38 Na ho li kë onehobë ku mago we tlole, “Tisa, bo jume anisasana gali nolë, bobë nëba hwi naegloleme. Bobë jowa nëba nëgeme!

39 Ahwane bume itaita lalëkaklukefëtle na bu afëfleina mëtlekëfë. Na kë ahwane bume lilina lalogotlewa na nënafu bubë ëfalëbo elë mowelëbetle. Na këbë ahwane bubë ato tëbo lëtakefëtle na bume hokweinawa hana kile logotleme.

40 Na bo jubë lowene esogo mëglelëtëyobë home anisasana yafe takune tlomë, këbë ahwaneme hehë namëgletlame fene. Kwe bu hana hehë mëtletla.”

41 Na Jisas metafu tëtatile, “Sobo oneho, sobo lowene sle hana elo. Sobo tëbo lowene ehola. Bo sobona li olë tafame tole hana nelë. Bo sobobë hobota ita fa nogotlëbëme tole hana nelë.” Na bolijayame gali tlole, “Te! Jubë nëba ebelë elesutëna.”

42 Kë nëba Jisas belë loliwa tisi tle, na ahwane bume lifewa so telëkakle na life mëta tujetigo, na bume feilawa lili totle. Na Jisas këbë ahwaneme anisasana kale tlole na kë nëbame sle totle na bolijayame tlële.

43a Na iniwa oneho klelego memëtla, Gotobë tako afutuku hwi motlolame nëgeme.

### *Jisas, bubë glime ita gali tle*

43b Jisas kë togotlebë wesibime, oneho mana lowene mëtlekefëya, na Jisas bubë lowene esogo mëglelëtlabë home gali tlome,

44 “Te, sobo ahola bo sle eto. Bo, Gotobë life mago ho, bu bome home yo moglomame.”

45 Kwe bubë lowene esogo mëglelëtlabë ho, këbë gali wayobë lowene hana mëtletla. Goto, kë gali

wayo bume ëho tögëtatëmeme nëgeme na bu kë gali wayo lowene sle jwa këme mëtletla. Bu Jisame uli mëtletlame nëgeme, na bu kë gali wayobëme takune jwa këme motlola.

### *Logouta ho yalëne*

<sup>46</sup> Li olë na, bubë lowene esogo mëglelëtlabë ho, blalo kofaya kofaya megali mëtletlogwaya, “Semago, logouta home, ya tafa lëlene?”

<sup>47</sup> Na Jisas bubë lowene walowene tletëme. Këme nëgeme bu nëba tokwëfo no tlële na bubë lime tlibe.

<sup>48</sup> Na bubë lowene esogo mëglelëtlabë home gali tlome, “Ho bome lowene lëgletenëna, na ebëha nëbame lëgaitalena, kwe bu bome laitane. Na ho bu bome lëgaitanëna, bu bomewa nane laitane. Weye, bome kë jine tëglënëbë ayame laitale. Na ebë nëba fenene, ho somago atwati hoha metafa lëglena kwe kë ho logouta home tafa lëgletëyome.”

### *Ho some wame hana loglëyona, bu sobobë yabe*

<sup>49</sup> Jon bu Jisame gali tlole, “Tako Ho, sebo ho li mehwi latlola, ho jubë wenijina ahwane tëbo hobë ato mago hehë tletëme. Kwe ahwane kë hehë lëgletlebë ho bu sebona jume hana esogo nëglelëyome nëgeme, sebo bume këme fene lëkle totla.”

<sup>50</sup> Kwe Jisas gali tlole, “Sobo këha home asa lëkle etlo. Ho some wame hana loglëyona, bu sobobë yabe.”

### *Samaria provinsbë li lifeku mago enëne, Jisas bu belë ligisime tole hana mëtletla*

<sup>51</sup> Goto, Jisame heven lifekuwa kë no lëglelebë olë nounou lalële. Këme nëgeme, Jisas lowene fa

sle totle, Jerusalem lifatewa nalugujume. Na bu tuju.

<sup>52</sup> Na bu fli home jine tlème, mogoutaya namëglame. Na bu motoutaya na Samaria provinsbë, lifeku tokwëfo elë mëtëkakluja, Jisasbë wesibi sle namogotometlame.

<sup>53</sup> Kwe kë life mago oneho, Jisas bu belë ligisime tole hana mëtletla, Jisas bu Jerusalem lifatewa tugujume nëgeme. Bu melowene lamëtla, “Bu sebona lotume tole hana lëletënawa na bu Jerusalem lifatebë tako lotu lowa këme lujü.”

<sup>54</sup> Na bubë lowene esogo mëtletelobë ho, Jems na Jon, kë lifekubë onehobë lowene hwi motlometemo na Jisame takune motlolo, “Tako Ho, ju metole lalene, sebo Gotome takune nanoglolome, kë onehome heven life mago, ahoju tuku nalëtëkakëtëmeme, temu namëgebëyame?”

<sup>55</sup> Kwe Jisas swaya tëkakëtëme na këkale tlome.

<sup>56</sup> Na bu li lifekuwa mutuja.

### *Jisame esogome tole mëglabë enëne*

<sup>57</sup> Jisasna bubë lowene esogo mëglelëtlabë hona, alëge elë mutuja na ho li Jisame gali tlole, “Iniwa lifeku ju egujuna kwe bo jume nagi nëglagwime.”

<sup>58</sup> Kwe Jisas bume gali tlole, “Mëgali bu ni mëgebebë fuluju nane na fole mata ni tiji nane. Kwe, bo, Gotobë life mago ho kë nëgebë, bo kwe ni nëgebëbë lo hanane.”

<sup>59</sup> Na kwe Jisas li home gali tlole, “Ju bome nagi enënë.” Kwe kë ho gali tlole, “O tako ho, bo bobë ayame matëmatë mëta afina lalowa gwa nugujetlëmene na mana jume nagi nëlëme?”

60 Na Jisas bume gali tlole, “Gigli mëglabë ho, buwa, gigli mëgebëya home lalowa matëmatë motoma. Kwe juwe, Goto onehobë eso home tafa lëgletëmebë gali të etagutëme.”

61 Na li ho Jisame gali tlole, “Tako ho, bo jume nagi nëglëme, kwe bobë weife mago enëneme kaiyo afina lalowa nugujelimëmene?”

62 Na Jisas gali tlole, “Ho bu ihena yegu lëglena kwe bu miti nagi itaita hwi lokoukëfena kwe bu ihe yegu sle hana lëglelëme. Na kë fenene, ho bome nagi lëglënëna kwe bu wesibina honame kë hune tëglebëme lowene lëglekefëtëmena, kwe këha ho bu Goto onehobë eso home tafa lëgletëmebë wege hana fa logotleme.”

## 10

### *Jisas bu 72 home jine tëbelëkakëme*

1 Tokwafe, Tako Ho Jisas, bu 72 home mata aniji tlome. Na bu tlemalë tlemalëme jine tëbelëkakëme, bume mogoutatla namëglame. Iniwa lifate na iniwa lifeku bu kë belëme lugujume kë tole lëglebë, bu kë enëneme kë iniwa lifate na lifeku elëme jine tëbelëkakëme.

2 Na bume wafle gali tlome, “Feilawa hi wesibi bu nuju mago wanigliji mëbe, kwe lebutako wege ho hana mëtabëya, kë hi wesibi fa namogotlame. Këme nëgëme sobo nuju bolijaya, Gotome, sagali elolo, bu wege home jine nalëglëmeme, bubë nuju mago hi wesibi fa namëgëtatlame.”

3 Na bume gali tlome, “Sobo eyeumo. Aholokwane elo. Bo some kë jine nëglëyobëye,

sobo sipsip kleli nëbale, wame tabo amalebë ku mëta fene mëtabe.

<sup>4</sup> Sobo baliti musu o wesibi sisike musu o juba jibo asa ehoujo. Na some alëgeme kë esune mëglëyobë onehome, tafana asa gëgali eelëmo. Weye. Sobo hokweinawa saeyeu.

<sup>5</sup> Na sobo lowa ekaklujona, sobo kë lo mago onehome afina megali eglomome, ‘Sobo ebë lo mëta kë tafa egelobë lowenena sle elo.’

<sup>6</sup> Na tu taba ka ho, kë lo mëta tafa lëglena, kwe sobobë lowene sle gali bu mëta malëbetle. Kwe këha ho, kë lo mëta tafa hana lëglena kwe sobobë lowene sle gali sobelë lukwaiji lëkeketëyome.

<sup>7</sup> Sobo kë lo mëta fwa şani ni ebekefo. Li lo li lo asa elo. Na iniwa hi wesibi some kë lo mago kë mëglëkefëyobë sahi hi elo. Bo ebë galime fëyeme gali nelëne? Ho wege lëglekëfena, kwe bubë wege wesibi lalowa glo lëgleme. Na kë fenene, ho bu Gotobë wege, wege lëgletlana, kwe bubë wesibi glo lëgleme.

<sup>8</sup> Sobo li lifatewa tuhu egelona na ho some bubë lowa no lëglëyona, kë hi wesibi some kë mëglëyobë, sahi elo.

<sup>9</sup> Sobo kë life mago ato elili onehome sasle etomo. Na sobo gali metë saetatemo, ‘Goto bu sobobë eso home natafa lëgletëyobë olë nounou lalëletëyo.’

<sup>10</sup> Na sobo li lifatewa tuhu egelona na kë life mago oneho some nëno hana mëglana, kwe sobo kë lifatebë alëge mëta elibome na megali elëmome,

<sup>11</sup> ‘Sobobë lifate flëke sebobë jubame kë lesili mëglebë sebo sosa nanotoma. Some melebotaneme nëgeme, ebë wesibi sobo kë

egelobë wafi tëbo elito. Kwe sobo lowene sle elo, Goto bu sobobë eso home natafa lëgletëyobë olë nounou lalëletëyo, kwe sobo kë olë tole hana eletelo.’

<sup>12</sup> Bo some gali nolëyo, Goto, iniwa onehobë gali aholokwane loglomebë olë na onehome fufu logotomebë olë fata lëglena, kwe bu ebë lifatebë onehome tako tëbo logotomeme kwe bu Sodom lifatebë onehome sogë tëbowa logotomeme.”

*Jisas, bume lowene sle jwa enëneme, maninibo tletëme*

<sup>13</sup> Na Jisas ita gali tlome, “Sobo Korasin lifate mago oneho na sobo Betsaida lifate mago oneho, masiwafe, tokwafe tëbo wesibi somëta fata mëgletëyome. Èbame, bo sobobë ku mëta Gotobë afutukuna, klelegowa wesibi blëge blëge tëtatëyo, kwe sobobë tëbo lowene aholokwana ti hana elo. Ètani, bo Tair na Saidonbë onehome këha klelegowa wesibi hana blëge blëge tëtatemë. Kwe bo Tair na Saidonbë onehome, këha klelegowa wesibi blëge blëge nëgëtatëmëbë, kwe bu ètani anebo bubë tëbo lowene aholokwana wati mëglame fene na lale lowenewa esogo mëglelëlame fene. Na bu tëbo èho wafi gëgelo motomame fene na atikafa wafi ju mëglame fene, bu melëme lëlekujü mëtla, bubë tëbo lowene wahune mëtla.

<sup>14</sup> Goto, iniwa onehobë gali kë aholokwane loglomebë olë na onehome kë fufu logotomebë olë fata lëglena, bu some tako tëbo lëgëtome kwe bu Tair na Saidon life mago onehome sogë tëbowa logotomeme. Sobo kë klelegowa wesibi hwi toglomome nëgame kwe sobobë tëbo lowene aholokwana hana ti elo.

15 Na sobo Kaperneam life mago oneho, sobo melowene lalone, ‘Sebo lale enënemu nëgeme na Goto seme heven life elë nëno lëgleme.’ Weye. Hanane mu. Goto some tëbo lëgëtome na hel lifewa sike lëtëkakeme.”

16 Na Jisas bubë lowene esogo mëglelëtlabë home gali tlome, “Oneho sobobë gali aholokwane sle lameletëyo bu mata bobë gali aholokwane sle mëgletëname. Na oneho some hehë lameletëyo bu bome mata hehë mëgletëname. Na oneho bome hehë lamëletëna, bu bome kë jine tëglënebë ho, Gotome mata hehë lamletla.”

*Jisas kë jine tëglënebë 72 ho, ita loko mëtëkakija*

17 Tokwafe, Jisas kë jine tëglënebë 72 ho, fleflesuna loko mëtëkakija. Na bu gali mëtla, “O, tako ho, sebo jubë weniji fë tëtona, na ahwane bu sebobë gali aholokwane mëtla na lamëtlëbouwa.”

18 Na Jisas gali tlome, “Sobo melë tugulona, bo kwe, mehwi latelë, Satan heven lifate mago latitigowa, wawaine fene tle.

19 Aholokwane elo! Bo some afutuku wafi tlëyo. Na sobo sebobë wame ho, Satanbë afutuku boblo etatelome. Na sobo wame tabo taiju na mlawalë matawa lalowa asë egolome na iniwa wesibi bu some hana tëbo mëgëtome.

20 Kwe ahwane, bu sobobë gali kë aholokwane mëgletëyobëme na kë mëtlëboubëme, asa fleflesu elo. Weye. Goto sobobë weniji bubë bogo mëta kë yahi tëgletëyobëme fwa fleflesu egelome.”

*Jisas bu fleflesu latle na bubë bolijaya, Gotome gëgali tlelële*

<sup>21</sup> Kë nalëwa, Gotobë Amtëtomba, Jisasbë lowenebë fleflesu têtatle. Na Jisas gali tle, “Aya, ju heven lifate magobë na ebë life magobë Tako Ho. Yaha fëyemene? Bo jume fleflesu nanëletë. Oneho bume fwa melowene lamëtla, ‘Sebo iniwa wesibi lowene sle nëletëma,’ kwe ju jubë afutuku bume ëho têtatëme. Kwe oneho bume fwa melowene lamëtla, ‘Sebo nëbale tokwetokwëha, sebobë lowene afluja lalëletëna, sebo iniwa wesibi lowene hana nëletëma,’ kwe ju jubë afutuku bume waolafa têtatëme. O aya, ju jubë tolewa esogo elelële na ju melë eleme.”

<sup>22</sup> Na Jisas bu ita gali tle, “Bobë aya bu iniwa afutuku na lowene bome watlënë. Iniwa ho bome bubë nëbame lowene sle hana mëletëna. Bolijaya buwa lowene lëletle. Na iniwa oneho, bolijayame lowene hana mletla. Bo bubë nëba na bo ayame lebotane nëtatëmebë, kë oneho buwa lowene mletla.”

<sup>23</sup> Jisasbë lowene esogo mëglelëtlabë ho, bume fwa tafa tlelëme, na bume swaya tletëme na bume fwa gali tlome, “Sobo lebutako lale wesibi wahwi tlomo, na sobo fleflesu egelome.

<sup>24</sup> Bo some gali nolëyo, ëtani, lebutako Gotobë lowene mago gali të mototokweflabë ho na lebutako life mago eso ho bu metole lamëtla, sobo kë hwi toglomobë wesibi, hwi moglomame fene, kwe bu hana hwi motloma, na bu metole lamëtla, sobo kë aholokwane tëgelobë gali, aholokwane mëglame fene, kwe bu aholokwane hana mëtla.”

*Samaria lifate mago ho, bume kë wame toglolebë home taitale*

25 Gotobë galime okokwe toglomebë ho Jisas belë tisi tle, bume tëbo loweneme su nalogotleme fene. Na bu takune tlole, “Tisa! Bo habelë nëgelëmene, lale tafa unaunalëme fa nanogotlëme?”

26 Na Jisas bume takune tlole, “Gotobë bogo mago gali habë gali lalane? Ju habë hwi laeolëne?”

27 Na Gotobë galime okokwe toglomebë ho gali tafu tëtatile, “Sobo tako Gotome anisasana tole egletelomemu. Lowenena, afutukuna, ini tolewa egletelomemu. Na jubë ato fene tole eletle, ju lime mata metole egletleme.”

28 Na Jisas bume gali tlole, “Ebë lalowa. Ju gali tafu sle latle. Ju melë eglena, na ju lale tafa fa egotleme.”

29 Kwe kë Gotobë galime okokwe toglomebë ho bu metole latletle, Jisas bume melowene nalëgletleme, “Lale lowenena hofe.” Këme nëgeme bu Jisame këme takune tlole, “Gotobë bogo mago gali, bobë fëye yabe home gali elane?”

30 Na kwe Jisas metafu tëtatile, “Ëbame, ho li, Jerusalem lifate kile tle na Jeriko lifatewa tëmatule. Bu tematulebëë na wameho alëgeme ëho mëtla, na bu alëgelëme okli mëtelëkukiya na fa mototla na tëkle mototlabëë ëjeha gli lëleme. Na bubë ëho titika mëtletla na bubë iniwa wesibi mata glo mëtletla na mana bume alëge mëglëbo mëta lakilewa mëtëkaka na bu mëtlëbouja.

31 Na kë olë nawa, lotu lome kë wege lëglebë ho mata kë alëge elëme tëmatule. Kwe bu alëge mëglëbome kë lëgëbebë home hwi telokwakle na alëge mëglëbo elë sigli tëtagule na latugujuwa.

<sup>32</sup> Na tokwafe, Livaibë afenëbo, lotu lo mëta kë wege lëglekefëbë, bu mata kë alëge elëme tëmatule na kë home hwi telokwakle, na lolime hwime tuju tle na hwi tlole kwe bu mata sigli tëtagule na latugujuwa.

<sup>33</sup> Kwe Samaria lifate mago ho li, \* bu mata nagi tëmatule. Na bu kë home hwi telokwakle, na bume tako masiwamu metletle.

<sup>34</sup> Na bu loliwa tuju tle, na bu wain taba liji tu, welë tuna, bubë juba këna swa totometle na kë juba, ëho kaka tabona lalei totometle. Na bume huju totle na bubë donki kleli amlebo matawa gwa towetle. Na bume oneho këme ni mëtëbekefëyabë lowa tlelule, na bume ululu sle latotle.

<sup>35</sup> Na li olëna, bu tële baliti kë ni lo bolijaya home tlële na gali tlole, ‘Ju ebë balitina, ebë home këna satafa elelële. Na jubë baliti, bume tafa eglelëlebëme, sike eglena, kwe tokwafe bo nigisina, bo kofaya baliti jume nëglëme.’”

<sup>36</sup> Na Jisas kë Gotobë galime okokwe toglomebë home takune tlole, “Ju habë lowene lalene? Wame ho kë tëkle mototlabë hobë yabe yalëmune?”

<sup>37</sup> Na bu gali tle, “Ebë ho bume kë masiwa lëgletlebë na kë lëgaitalebë, ebë bubë yabemu.” Na Jisas bume gali tlole, “Ju ejume na kë ho fene laitale ju melë egleme.”

*Jisas Marta nabë, Maria nabë lo mëta tafa tle*

<sup>38</sup> Jisasna bubë lowene esogo mëgglelëtlabë hona Jerusalem lifatewa mutujabë na li lifekuwa fwa

---

\* **10:33** Israelbë afenëboni bu Samaria life mago enëneme yonane hana mëtlelogwaya.

mutula. Na kë lifeku mago mëse, bubë weniji Marta, Jisame bubë lowa no tlële.

<sup>39</sup> Martabë bolijamobë weniji Maria. Maria, bu Jisabë elebo lime tafa tletle na bubë gali mana aholokwane tlokwe fle.

<sup>40</sup> Kwe Marta bubë hi wesibi kësle totomebë wegeme tutune tlekëfe na Mariame tēbo lowene fa tētātē. Na bu këme Jisas belë tuju na gali tlole, “O tako ho, bobë keinēba bome wakile etanë iniwa wege bowa no tlë. Ju këme lowene jwa fëyeme elene? Ju bume gali eolë! Bome egaitanë naegleme.”

<sup>41</sup> Kwe Jisas bume gali tolë, “O, Marta, Marta. Ju feilawa wesibime fëyeme tutune elene?”

<sup>42</sup> Maria bu bona kë tafa nēgelobë na kë gëgali nēgelobë wesibi, ebë lalë wesibimufe. Këme nēgeme sebo ebë lalë wesibime bume hana lëkle nēgetayame. Ju ebë wesibime fwa lowene egletleme.”

## 11

*Jisas, Gotome gëgali mëglelëla lowenebëme okokwe tlome*

<sup>1</sup> Li olëna, Jisas Gotome gëgali tlelële. Bu Gotome wagëgali tlelële na bubë lowene esogo tlelëtlebë ho li, bume megali tlole, “O tako ho, ju seme Gotome gëgali nēglelëlabë lowenebëme okokwe enona, ëbame Jon bubë lowene esogo mëglelëtlabë home fene okokwe tlome.”

<sup>2</sup> Na Jisas bume megali tlome, “Sobo Gotome gëgali eglelëlona, kwe megali eglolome. ‘O, Aya, iniwa oneho bu megali samëla, “Ju lalëmu.”

Sebo metole nanëla,  
 ju onehobë eso home tafa egletë nabëme  
 esitëna.

<sup>3</sup> Iniwa olë, ju seme hi wesibi  
 kë olë niyiwa saelëkefëna.

<sup>4</sup> Ju sebo bë tēbo lowene aholokwana sati eletëna,  
 fli enëne seme tēbo lowene kë mëgletë nabë  
 lowene  
 aholokwana fene ti nëletëma.  
 Ju seme su mëgëtanabë wesibi elë asa hwiwa  
 enona.”

<sup>5</sup> Na Jisas bume ita gali tlome, “So mago ho li bu  
 yabena nëgena, na bu klabë kuna bubë yabebë  
 lowa lujuna na gali loglolena, ‘Ju bome hi wesibi  
 eglënëme.

<sup>6</sup> Bobë yabe kakë mago walisi na bo nëglëlëbë  
 hi wesibi hanane.’

<sup>7</sup> Na bubë yabe bume lo mago megali  
 lëgelubaklena, ‘Ju bome asa sosalë etanë. Ino watiji  
 nelë, na bu bobë nëbale labuku mëta wani  
 mebëya. Bo huju hana nëgelëme na jume hi  
 wesibi hana nëglëme.’ Na sobo fëye lowene lalone,  
 kë ho bu habelë lëglemene?

<sup>8</sup> Bo some gali nolëyo, sobo aholokwane elo, kë  
 ho ebë lo bolijayabë yabemu, kwe bu hana huju  
 lële na bume hi wesibi hana lëlële. Kwe bubë yabe  
 itaita takune lëgelulukwakleme nëgeme na hana  
 kile lotle, na bu këme huju lëgleme na iniwa wesibi  
 bubë yabe kë tole lëgletëmebë mana nalëglëlëme.

<sup>9</sup> Bo some gali nolëyo, sobo Gotome wesibime  
 takune elokweflome na bu some wesibi  
 lëglëyome. Sobo wesibi hohwi etakefëtelome kwe  
 sobo hwi eglolome. Sobo inome këke  
 elekefëtelome na Goto some ino tika lëgëtatëyome.

<sup>10</sup> Iniwa oneho Gotome wesibime takune moglokweflana, kwe bu wesibi glo mëglame. Na iniwa oneho wesibi hohwi mëtakefëtëmana kwe bu hwi moglomame. Na iniwa oneho inome këke mëglekefëyana kwe Goto bume ino tika lëgëtatëmeme.

<sup>11</sup> So mogo ho li nëbana lëtabe na kë nëba bolijayame mome takune loglolena, kwe bolijaya bume waiye lëglëlemene? Weye. Hanane mu.

<sup>12</sup> Na bu bolijayame kame takune loglolena, kwe bolijaya bume mlawalë lëglëlemene? Weye. Hanane mu.

<sup>13</sup> Sobo tëbo lowene itaita esogo elelëkeflo kwe sobo lale wesibi sobobë nëbaleme itaita elëkefëmo. Këme nëgeme sobo melowene egelomemu, ‘Sobobë aya heven life mëta kë tafa lëglebë, bu metole lalële, oneho bume kë takune moglolabë, bubë Amtëtomba, bume lëglëmeme.’”

*Bu megali lamëtla, “Jisas Belsebulna wege melo”*

<sup>14</sup> Jisas gali mumu tabo hobë ato mago ahwane hehë tletle. Ahwane wafi kile totle na kë ho mana gëgali tle. Na iniwa oneho hwi motlola na klelego memëtletla.

<sup>15-16</sup> Kwe fli metole lamëtla, Jisasme su namogotlame, na bume këme takune motlola, “Jisas ju klelegowa wesibi li lebotane etatëna. Sebo jume melowene nanëgletëyome, ‘Gotobë afutuku ju mëta lëbetëfe.’” Na fli ho blalo megali mëtla, “Bu, tëbo alibahobë eso ho, Belsebulbë, afutukuna ahwane këna hehë lëlekefëtëme.” (Belsebulbë li weniji Satan).

<sup>17</sup> Kwe Jisas bubë lowene wahwi tlotëme na bume wafle galina gali tlome, “Li lifate mago

enëne, bu bwa bwa lowene mëta tafa mëglana na momogli mëgëtayana kwe bu blalo tafa sle hana mëglame. Na weife mago enëne blalo momogli mëgëtayana kwe bu iniwa tëbo miglitayame.

<sup>18</sup> Na Satanbë ilawa mago alibaho, bu bwa bwa lowene mëta tafa mëglana na momogli mëgëtayana kwe bu afutuku mëglamene? Weye. Bu tëbo miglitayame. Bo walowene nelë, sobo bome melowene laletëna, 'Bu ahwaneme Belsebulbë afutukuna hehë lëletëme.'

<sup>19</sup> Kwe ebë nëgali nëgebë, Belsebul bome lalaitanë na bo ahwane tëbo kë hehë nëgletemëbë, kwe sobobë lowene esogo mëglelëlabë home ya laitamene, ahwane kë hehë mëgletëmabë? Belsebul bu laitamene? Sobobë weife mago enëne bu some melebotane mëtatëyome, sobobë lowene tëbo.

<sup>20</sup> Kwe bo ahwane Gotobë afutukuna hehë nëgletëmëna kwe sobo këme lowene elome, Goto bu sobobë eso home watafa lëletëyo.

<sup>21</sup> Afutuku tabo ho bu wame home boblo wesibi glo lëglëna na bubë lo mëta këna mana sei sle lëglëlena kwe bubë iniwa wesibi mëgëbetle sle mëgleme.

<sup>22</sup> Kwe li tako afutuku tabo ho, bu kë tokwëfo afutuku home wameme ligisi tlena na bume wame loglolenana na bume boblo logotlëna kwe bu kë hobë wame home boblo wesibi bume kë afutuku mëglelëlebë wesibi glo lëgletleme. Na bu kë hobë iniwa wesibi ho flime sa lëtagütëmeme.

<sup>23</sup> Onëho bome yabe hana mëglënenana, bu bome wame moglonabë enëne. Na ho bome onëhome loloko nëgëtëbëme hana mëgaitanana

kwe bu onehome lëlakwanena sisile lamotoma.”

*Ahwane tëbo ita tisi tle*

<sup>24</sup> Jisas gali tle, “Ahwane tëbo home kile logotlena, kwe kë ahwane, lagu lifewa tuju, tafa labume hohwi nalugutame, haha tafu logotlebëme. Kwe haha tafu life hwi hana loglolena kwe bu këme gali lële, ‘Bo ëbame kë tafa tëgelëbë lowa ita nuguwime.’

<sup>25</sup> Na ita luju na lo mehwi lolole, bu wasle motlafe.

<sup>26</sup> Këme nëgeme, bu luju na tobali ita tële yaife tabo ahwane nëno lule. Na bu mëkakluja na këme tafa mla. Èbame kwe kë ho bu sogë tëbowa tètabe kwe tokwafe bu tëbomu lètabe.”

*Fëye enëne fleflesu mëglamene*

<sup>27</sup> Jisas lebutako onehome gali të tètätëme na mëse li, kë onehobë mago bume anisasana gali tlole, “Jume kë fu tëgetabë mëse na maba kë hi tëgletëbë mëse, bu fleflesu matle.”

<sup>28</sup> Kwe Jisas gali tle, “Weye. Oneho bu Gotobë gali aholokwane mëglabë na esogo mëglelëlabë bu kwe fleflesu mëglame.”

*Fli oneho Jisasmë gali motlola, “Ju semë klelegowa wesibi li lebotane etatëna”*

<sup>29</sup> Lebutako oneho bu Jisasmë loko motokweitlabë, na bume gali tlome, “Oneho kë nalë kë mëtëtabëyabë bu tëbo oneho mu. Bu bome takune motlona, ‘Ju Gotobë afutukuna, klelegowa wesibi li lebotane etatëna, sebo melowene nanëglame, “Ju Gotobë wege fa etatle.”’ Kwe bu klelegowa wesibi li hana hwi moglolame. Bu

jowa wesibiwa hwi moglolame. Wesibi Joname kë fata tęgletlebë wesibiwa hwi moglolame.

<sup>30</sup> Ètani, Jona bu mo imo mëta aona olë tafa tle na mana mo imo mago huju tle na Ninive lifate mago onehome gali mana tē tutatēme. Na Goto, kë klelegowa wesibina, Ninive lifate mago onehome, melebotane latētātēme, Goto Joname jine tletēme. Na Jona fenene, bo, Gotobë life mago ho, bo tokwafe, onehome ebë nalë kë mëgëtabëyabë, klelegowa wesibi lebotane nëgëtatēmēme, melowene namëglame, ‘Goto bome jine tlënë.’

<sup>31</sup> Goto, iniwa onehobë gali kë aholokwane loglomebë olë na onehome kë fufu logotomebë olëna, nëgemowe life magobë eso mëse, bu huju egleme, na ebë nalë kë mëgëtabëyabë onehobë tēbo loweneme gëgali egletēmeme. Bu bubë tēbo lowene këme gali egletēmeme. Ètani kë eso mëse bu kakë lifatemu tafa tuglebë kwe bubë life kile totle na eso ho Solomon belë tisi. Na bubë lalë lowene gali gëgali tlelë na aholo bo tētagutle. Kwe ho li somëta kë tafa lëglebë bubë lowene takomu kwe Solomonbë lowene melëha kwe sobo kë tako lowene hobë gali aholokwane hana elolo.

<sup>32</sup> Goto, iniwa onehobë gali kë aholokwane loglomebë olë na onehome kë fufu logotomebë olëna, Ninive lifate mago oneho bu huju mëglame, na ebë nalë kë mëgëtabëyabë onehobë tēbo lowene gëgali mëgletēmame. Bu bubë tēbo lowene këme gëgali mëgletēmame. Kë Ninive lifate mago oneho, bu Jonabë gali aholokwane motlolame nëgeme na bubë tēbo lowene aholokwana këme ti mëtla. Kwe ho li somëta kë tafa lëglebë, bubë

lowene takomu kwe Jonabë lowene bu melëha kwe sobo kë tako lowene hobë gali aholokwane hana elolo na esogo hana elëlételo.”

### *Jubë naba bu lamo fenene*

<sup>33</sup> Na Jisas ita gali tle, “Oneho bu lamo fiji mëtaya na ëho hana mëgëtayame o isekuna hana lamu mëgëtayame. Weye. Bu masei mëta gwa mëtayame. Na oneho lowa mëkaklijana, bubë elulego hwi namoglëyame.

<sup>34</sup> Jubë naba lamo fenene. Jubë naba lalowa nëgena kwe jubë lowene mago lowene elulego lëgëbetëme na iniwa ato mëta elulego lëgëbetëmemu. Kwe jubë naba tëbo nëgena, kwe jubë lowene mago lowene kilego lëgëbetëme.

<sup>35</sup> Sobo ululu sle këme egelome. Elulego ju mëta kë lëgelubetëbë asa kilego malëletë.

<sup>36</sup> Jubë iniwa lowene elulegowa lelubetëna na kilego hana lelubetëna, kwe jubë iniwa lowenebë olëha lelubetëme, lamo elulegoha u eglatëme.”

### *Farisi ho na Gotobë galime okokwe moglomabë ho bu tëbo lowene esogo mëtlelëkefla*

<sup>37</sup> Jisas gali watë tëtatëme, na Farisi ho Jisasmë gali tlole, buna hi namëgelome. Na Jisas kë hobë lowa tëkaklutle na tafa tle, hi namëgelome.

<sup>38</sup> Na kë Farisi ho bu Jisasmë mehwi tlole, bu hime tafa tle kwe bu toba tu afina swa hana totome, Gotobë wegeho Moses fene gali tle. Na bu klelego metletle.

<sup>39</sup> Kwe Jisas bume gali tlole, “Sobo Farisi ho, sobo kabona blete ëhou ato elë fwa swa etokefëmo jubë ato fene swa etole. Kwe waholo kë nëgelujebë

bu memelë tetëbo wesibi sosolo lameluletëyo.  
Sobo kë wesibi hana sle etomo.

<sup>40</sup> Sobo yaya enëne. Ho bu matawa atowa nane blëge blëge totle. Weye. Bu matawa atona waholona mata iniwa blëge blëge totome.

<sup>41</sup> Kwe wesibi, blete ëhou na kabo mëta kë mëgelubebë, sobo wesibi jwa enëneme elëmo, bume egaitamo naegelome. Sobo melë egelona kwe sobobë iniwa wesibi, Gotobë naba li mëta lalowamu mëgëbetëyome.

<sup>42</sup> Sobo Farisi ho, sobo hai! Sobo tëbo eglitome! Sobo memelë inilu welujuwa welujuwa lalei egotokwefomome na welujuwa mëta gwa etlome na jowa leitabo Gotome elëkeflome. Kwe sobo lale lowenebë na Gotome tole egletelobë aholokwana ti lalekefo. Sobo kë lale lowenebë esogo sle eglelëloni na fli lale lowenebë aholokwana ti jwa egelona kwe sobo lale oneho etabome.

<sup>43</sup> Sobo Farisi ho, sobo hai! Sobo tëbo eglitome! Sobo lotu lome tafa egelona, sobo metole lalo, onehobë naba li mëta, eso hobë tafa labume tafa egelome. Na sobo oneho këme kë tafa mëglabë lifeku mëta asë egelona, sobo metole lalo, oneho some megali namëglëyome, ‘O leitabo ho. Lale kliji.’

<sup>44</sup> Sobo hai! Sobo tëbo eglitome! Sobo matëmatë fenene këha meëho lalo. Oneho lowene jwa, na meweniji lamla, ebë lale lifewa, na bu matëmatë matawa measë mogolame na bu Gotobë naba lime tëbowa mëgëtabëyame. Na sobo kë matëmatë fenene. Oneho bu sobobë tëbo lowene hwi hana moglëtëyome na meweniji namëglame, sobo lale enëne.”

45 Na Gotobë galime okokwe toglomebë ho, bu Jisasbë gali aholokwane tle na bume gali tlole, “Tisa, ju kë gali Farisi home gali eglomebë kwe ju seme mata gëglë lalelëna.”

46 Na Jisas gali tle, “Sobo Gotobë gali okokwe eglomobë ho. Sobo hai! Sobo tëbo eglitome! Sobo onehome lebutako tafa sle gali okokwe elokwefomo, esogo namëglelëmame, kwe sobo, kë gali esogo mëglelëmabëme, egaitamo hana elo na këbëna bume hobota gwa etatemo.

47 Sobo hai! Sobo tëbo eglitome! Sobobë bisemlenino bu Gotobë lowene mago gali të mototokweflabë home wamena tètëkle mëtëtakefëya. Na sobo kë hobë matëmatë negli etokwefëmetemo.

48 Sobo matëmatë negli lakalena, onehome melebotane etatemo, sobobë bisemlenibë lakalame helawawa laletemo. Bu Gotobë lowene mago gali të mototokweflabë home wamena tètëkle lamëtëtakefëya.

49 Goto këbë hwi tlolena na bubë lale lowenena megali tle, ‘Bo bobë lowene mago gali të mototokweflabë home na bobë gali tëme jine mëglëmabë home jine nëglëmëme, na bu flime wame ijiwa moglomame na flime mogo nalë tètëkle mëtayame.’

50 Ètanimu na mana ekë lëbe bu Gotobë lowene mago gali të mototokweflabë home mogo nalë tètëkle mëtëtagijayame nëgëme, na Goto, bu ebë olëna kë mëtabëyabë onehome këme tëbo logotomeme.

51 Bu Gotobë lowene mago gali të mototokweflabë home mogo nalë tètëkle

lamëtëtagijaya. Bu ëtani Abel mëta afina oto mutula, na flime mata mogo nalë tètëkle lamëtëtagijaya na Sekaraia belë mana fwa tøkaki na bume mata mogo nalë tëkle mototla. Sekaraia bu, Gotome, wesibi kë mëta ahojume ahojume melekefëtlabë masei jelë, na Gotobë lo jelë, kë afloko mëta tètabe na bume mana mogo nalë tëkle motlola. Na bo some gali nolëyo, ëtanifu oneho bu Gotobë lowene mago gali tē mototokweflabë home mogo nalë tètëkle mëtëtagijayame nëgeme, na Goto bu ebë olëna kë mëtabëyabë onehome, këme tēbo logotomeme.

<sup>52</sup> Sobo Gotobë galime okokwe eglomobë ho. Sobo hai! Sobo tēbo eglitome! Sobo, Gotome kë lowene mëgletlabë lobë inoha tei tiji elo. Na sobowa kë ino hana tika etlome na hana ekaklujome, Gotobë lowene nafa egëtatelobëme. Hanane. Na oneho bu kë lowa mëkaklujame fene, Gotobë lale lowene fa namogotlame kwe sobo lëkleha latokwefomo.”

<sup>53</sup> Na kwe Jisas kë lo mago toho təkake. Na tokwafe Gotobë galime okokwe moglomabë ho na Farisi ho bume tēbojiwamu lamëtletla na memelë tëtakunebëme takune motlola.

<sup>54</sup> Bume melëme fene sosogëna motlola, tēbo galina tafu lëtatëme nawa na bume mana enisusu mletlame na mogo nalë mana tēkle motlame.

## 12

*Sobo Farisi hobë sosogëna lowenebëme ululu sle saelo*

<sup>1</sup> Feilawa onehomu loko mëtletlëya. Na bu ke mëtlame nëgeme na fli onehome jubame fëfe

fëfeha mëtlelogwaya. Na Jisas bubë lowene esogo mëglelëtlabë home afina gali të tëtatëme, “Sobo Farisi hobë bletë nage sëse wesibime ululu sle saelo. Bo kë gali nëgelëbëye, bubë sosogëna lowenebëme gali nelë. Bubë sosogëna lowenebë, sobobë lowene mëta takowa lëbetëyolime. Bo këme gali nelë, sobo ululu sle saelo.

<sup>2</sup> Iniwa wesibi oneho ëho kë motomabë, kwe Goto olafa lotometëmeme na oneho bu hwi molomame.

<sup>3</sup> Na iniwa gali sobo hwelutuwa kë gëgali egelobë, kwe tokwafe ho li kë gali lifeku mëta onehobë aholo li mëta të logotleme.”

### *Sobo Gotome fwa sauli eletelo*

<sup>4</sup> Na Jisas ita gali tlome, “O bobë yabenino, bo some gali nolëyo. Sobo home asa uli eletemo. Weye. Ho some mogo nalë tëke mëglëyome kwe bu some ita hana tëbo mëgëtome.

<sup>5</sup> Bo some megali sle nëlëyo. Sobo Gotome fwa uli egletelome. Goto bu lalowa, home mogo nalë tëbo logotleme na bubë afutukuna kë home hel lifewa lalowa tuku lëgleme. Ho kwe melë hana mogotlame. Bo some gali sle nëlëyo, sobo Gotome fwa uli egletelomemu.

<sup>6</sup> Fli tokwëtokwë fole, ho melowene lamla, ebë lale wesibi nane, ebë tëboha wesibi tekwe nëge. Kwe, Goto bu kë tokwëtokwë foleme aholokwana hana ti lëletëme. Bu tafa lëlelëme na ululu sle lalotome.

<sup>7</sup> Na habenuju eslehuba tabëi sobobë kë nëgebë Goto walowene sle lëletëme na iniwa wesibi mata walowene sle lëletëme. Këme nëgeme bo some gali nolëyo, iniwa wesibi some kë fata mëgletëyobë,

sobo uli asa eletemo. Sobo walowene elo, tokwëtokwë fole bu tokwëfo wesibiha kwe Goto bu kë foleme mana tafa lëlelëme na ululu sle lalotome. Kwe sobowe, sobo tako wesibi na Goto bu some tako tolemu lalëletëyo na itaita metafa lëglelëkefëyome.”

*Sobo megali egelobëme asa able elo, “Sebo Jisame lowene sle nëgletlabë oneho”*

<sup>8</sup> Na Jisas ita gali tle, “Bo some gali nolëyo, ho bu onehome megali loglomena, ‘Bo Jisame lowene sle nëgletelëbë ho.’ Kwe bo, Gotobë life mago ho, bo Gotobë enselbë li mëta megali noglomëme, ‘Bu bome lowene sle lëgletenëbë ho.’

<sup>9</sup> Na ho bu onehobë naba li mëta bome lowene lëgletenëbëme able lëglëna, kwe tokwafe bo Gotobë enselbë li mëta kë home kofaya able nëgletelëme.

<sup>10</sup> Ho bu bome, Gotobë life mago home tëbo gali loglonëna kwe Goto bubë kë tëbo lowene aholokwana ti lëgletleme. Kwe ho bu Gotobë Amtëtombame klëë gali loglolenana, kwe Goto bubë tëbo lowene aholokwana hana ti lëgletlememu.

<sup>11</sup> Bu some lotu lowa sobobë tëbo lowene gëgalime mëglelujona. O gavman ho o tatako letitabo ho belë sobobë tëbo lowene gëgalime mëglelujona, kwe sobo këme metutune asa elo, ‘Sebo bubë gali habë tafu nëtatëmamene? Sebo habë gali nëglamene?’ Weye.

<sup>12</sup> Kë olëna, Gotobë Amtëtomba, sobo bume këna tafu egëtatëmobë gali lebotane lëgëtatëyome.”

*Baliti musuna hobë wafle gali*

<sup>13</sup> Na ho li, kë feilawa onehona mëtëtabëya na bu Jisame gali tlole, “Tisa, bobë aya wagli lële na

bo metole nanelë, ju afame gali elole, iniwa wesibi aya kë hune lëglebë, fulelë lëleme na fli bome lëlënëme.”

<sup>14</sup> Kwe Jisas bume gali tlole, “Ju bome kë galime fëyeme gali enonëne? Ho bome gali aholokwane moglomabë home hana aniji motlona, na bo kë wesibi some hana sa nëgëtatëyome. Weye. Hanane.”

<sup>15</sup> Na bu onehome megali tlome, “Sobo ululu sle saelo, feilawa wesibi mëmaune eglëmolime. Sobo feilawa wesibina nëgebë kwe kë wesibi kwe some lale tafame hana mëgaitomemu.”

<sup>16</sup> Na Jisas wafle galime gali tlome, “Baliti musuna hobë nuju mëta, feilawa hi wesibi mëbekefëtle.

<sup>17</sup> Na kwe kë ho melowene tle, ‘Bobë hi wesibi loloko lo wake melefe na bo li lo hananefe, bobë fli hi wesibi këme gogwa nanëgelëme. Bo habelë nëgelëmene?’

<sup>18</sup> Na bu gali tle, ‘Ai, ta bo melë nëgelëme. Bobë hëno tokwëtokwë hi wesibi loloko lo yayei notomeme na fli tatako wesibi loloko lo gigliji nelëme na bobë hi wesibi na fli wesibi kë mëta loloko nanëgëtëme.

<sup>19</sup> Na bo bowa melowene nelëme, “Bo feilawa wesibina hofe. Bobë lale wesibi feilawa tlibutu niji mëbetenëfe. Ta bo tafawa manelë. Bo tafawa nëlekefëme na fleflesuna hi nëlekefëme.”

<sup>20</sup> Kwe Goto bume megali latlole, ‘Ju yaya homu. Ebë klabëna ju gli egleme. Na iniwa wesibi ju kë loloko egëtabë yalë glo lëgletëmene?’”

<sup>21</sup> Na Jisas gali tle, “Na wesibi kë home fenene fata tletle, ho li Gotome lowene hana lëgletlena na bubë feilawa lalale wesibi loloko loloko lëgëtana,

na kë wesibina fli onehome lëgaitame jwa lëglena kwe këha lakale Gotobë naba lime sle hana lëletle.”

*Sobo tutune asa elo. Goto bubë nëbaleme tafa sle lëglelëmeme*

<sup>22</sup> Na kwe Jisas bubë lowene esogo mëglelëtlabë home gali tleme, “Sobo ebë galibë lowene sle eletelo. Na sobobë tafa lale lëgëbetëyobëme tutune asa elo na megali asa elo, ‘Sebo fëye wesibi hi nëglamene? Sebo ëho hamago glo nëglamene?’

<sup>23</sup> Hi wesibi na ëho bu some lale tafame hana mëgaitome. Jubë lale tafa ebë tako wesibi, kwe hi wesibi ebë tokwëfo wesibi. Na jubë ato ebë tako wesibi, kwe ëho ebë tokwëfo wesibi.

<sup>24</sup> Sobo abagou foleme lowene eletemo. Bu hi wesibi hana tobalo mële na bu hi wesibi loloko hana mëta. Na bu hi wesibi loloko lo hanane. Kwe Goto bume hi wesibi lëläkefëme. Kë fole kwe bu tokwëfo wesibiha kwe sobo oneho tako wesibimu na Goto bu some mata hi wesibi lëglëyome.

<sup>25</sup> Na ho bu ebë life mëta kë tafa lëglebë olëme tutune lëglena kwe bubë olë lalowa kikli lëgetokwaklemene? Weye. Hanane mu.

<sup>26</sup> Sobo ebëha tokwëfo wesibi melë hana egelona kwe sobo fli wesibime blawa fëyeme tutune elone?

<sup>27</sup> Sobo lale ti tahweji lowene eletemo. Bu habëtabo foke melene? Bu këkë hana mëgleme na bubë negli wesibi hana susu motomeme. Kwe bo some gali nolëyo, ëtani eso ho Solomon bu lale lale negli wesibi gëgelo totokwefëme. Kwe bubë negli wesibi bu kwe sogë lalowaha, kwe lale ti tahweji bu lalemu mëbe.

<sup>28</sup> Sobo lifeku mago agosaba tahwejime lowene eletemo. Lifeku mago agosaba tahweji lifekume ëje kë foke mëglebë, ho uniji wege mëglame na ahoju fiji mëtayame. Kwe Goto bu këha lifeku mago agosaba tahwejime negli sle lalotokwefëme. Këme nëgeme sobo lowene sle epletelome, Goto some mata ëhona negli lëgëtome. Sobo Gotome tokwëfo lowene slewa laletelo.

<sup>29</sup> Goto some tafa lëglelëyome. Këme nëgeme sobo hi wesibime metutune asa elo. Sebo fëye wesibi hi nëglamene o sebo fëye tu hi nëglamene?

<sup>30</sup> Gotome lowene jwa mëgletlabë oneho bu kë wesibime feilawa tutune melekefëya. Kwe iniwa wesibi sobo kë tutune epletmobë, sobobë blijaya këbëme walowene lëletëyo.

<sup>31</sup> Sobo wesibime tutune asa elo. Weye. Sobo Gotome fwa melowene eglekefëtélome, ‘Bu sebobë eso ho lëtabetënafe, na bubë tolewa esogo eglelëtélobëme lowene elome. Na kwe bu hi wesibina ëhona some mata lëglëkefëyome.’”

### *Sobo heven life mëta wesibi loloko egëtome*

<sup>32</sup> “Sobo bobë enëne tële. Bo some kë tafa nëglelëyobë, ho sipsip kleli fene lëlëme. Sobo uli asa elo. Sobobë blijaya bu wafi gali tle, bu sobobë eso home tafa lëgletëyome na sobo buna eso hoha onehome tafa elelëmome.

<sup>33</sup> Sobobë iniwa wesibi balitina hihijika elome. Na kë baliti glo elome na wesibi jwa onehome aitamome. Sobo melë egelona, kwe sobo unaunalëme tafa wesibi glo egelome, na sobo heven life mëta lale wesibi loloko egotome. Tokwafe sobo heven life mëta këha wesibi hwi eglomome. Heven life mago wesibi, flawei hana

mëgleme. Na ho toklime glo hana mëglame, na lahwë hana sisile mogotomeme na gu hana mëglelëme.

<sup>34</sup> Sobobë wesibi fëye mëta mëbetëyowe, sobobë lowene mata kë mëta lugubetëyome.”

*Lale wege enëne bu sagli melëlame na walena satafa mla*

<sup>35</sup> “Sobo iniwa wesibi sagli elëlome na walena satafa elo. Sobo ëho gëgelo etomome na lamo fifiji etomome na këna tafa elome.

<sup>36</sup> Sobo këha metafa egelome, ho bubë eso home, bubë tako salë mago ligisibëme fene hwi mletla. Bubë eso ho bu ino mëta këke lëglena kwe bu hokweinawa tika mëtatlame.

<sup>37</sup> Na bu ligisina na mehwi lëglena, bubë wege ho bu ni hana mëgebëyana, kwe kë wege ho bu fleflesu matla. Bo some nëgali gali nanolëyo, kë eso ho bu wege ëho gëgelo lotomeme, na bubë wege home gali lolomeme, ‘Masei mëta tafa elome.’ Na buwa hi wesibi bume lëlëmeme.

<sup>38</sup> Na bu klabë kuna o fole olëna ligisina na mehwi lëglena, bubë wege ho bu ni hana mëgebëyana, kwe kë wege ho bu fleflesu matla.

<sup>39</sup> Sobo ebë wesibi lowene sle eletemome. Ho bu tokli ho ligisibë olë lowene lëgletlana, kwe bu kë tokli home lëkle logotleme na bu lowa hana lëkaklume.

<sup>40</sup> Sobo mata sagli elëlome na mana walena satafa elo. Bo këna nigisibë olë sobo lowene hana eletelo. Sobo melowene jwa elome, ‘Bu ebë olëna hana ligisime, kwe bo, Gotobë life mago ho, kë olëna mana nigisime.’”

*Ebë lale wege hobë na tëbo wege hobë waflë gali*

41 Pita Jisame metakune tlole, “Tako Ho, ebë wafle gali ju seme fwa gali enonane o iniwa onehoname gali elome?”

42 Na bu gali tafu têtatle, “Bo iniwa lale wege kë fa mogotlabë na lale lowenena kë mëtabëyabë wege home gali nëlëyo. Eso ho bu këha lale wege home meaniji loglome, bubë fli wege home tafa nalëglelëmeme na hi wesibi bume nalëglëmeme, eso ho kë gali toglolebë olë mëta.

43 Eso ho ligisina na bubë wege home mehwi loglolena, bubë lale wege mana fa lotokwefëtlefe. Kwe kë wege ho bu fleflesu malële.

44 Bo some nëgali nanëlëyo. Eso ho bu këha lale wege home meaniji lëglëyome, bubë iniwa wesibi tafa nalëglelëmetleme.

45 Kwe kë wege ho bu melowene lëglena, ‘Bobë eso ho hokweinawa hana ligisimefe,’ na bu fli wege onehome têtëke lëglena, na bu feilawa hi wesibi na biaha wesibi hi lëglena,

46 na kwe bubë eso ho ligisibë olë lowene sle jwa lëletleme na bu lili sloşlowa lëleme na bubë eso ho mana lisime. Na bu kë wege home latëbowamu logotleme, na Gotome lowene sle jwa kë mëgletlabë enëne belë jine lelëkakleme.

47 Wege ho bu bubë eso hobë tole lowene lëgletlena kwe bu sagli hana lëgletlena na bubë eso hobë tole hana esogo lëglelëtlena kwe bubë eso ho bume anisanamu feilawamu lola lëgëbetëfaleme.

48 Kwe wegeho bubë eso hobë kë tole lëgletlebë lowene, lowene sle hana lëgletlena na bu wege sle jwa lëleme kwe bubë eso ho bume tokwëfo tëklewa loglotleme. Goto onehome feilawa lowene

lëglëmena kwe tokwafe bume takune loglomeme, ‘Bo some kë tëglëyobë lowenena, feilawa wege fa totlone?’”

*Jisas onehome fufu nalogotomeme këme ligisime*

<sup>49</sup> Jisas ita gali tle, “Bo kë nigisibëye, bo Gotobë wame ahojuha ebë lifekuwa tuku nanëgelëme nisi, iniwa tëbo lowene na tëbo wesibi temu namëgleme. Na bo metole nanelë, Gotobë wame bume ahojuha hokweinawa u nalëgletleme.

<sup>50</sup> Tokwafe feilawa elili na gli bome lamu lëgëtanëme, tu mëta home fene baptais meletëma na bo tako tutune këme nelë. Bo metole nanelë, kë wesibi bome kë fata lëgletenëbë bu hokweinawa tli nalëkaketenëme.

<sup>51</sup> Sobo bome melowene laletënanane, ‘Bo ebë lifeku mago wame sleme tisine?’ Weye. Hanane mu. Bo kë tigusibë, onehome fu nanogotomëme tisi. Oneho bu bobë gali aholokwane mëglana na fu fu mlame. Fli bobë gali lowene sle mletlabë na fli bobë gali lowene sle hana mletlabë.

<sup>52</sup> Ebë olëna na tokwafe, tobalimalë ilawa mago ho jowa lo mëta kë tafa mëglabë, bu bobë lowene esogo mëglelëlabëme momata mëlame na fu fu melelogwayame. Na aomalë bu tlemalëme wame moglomame na tlemalë bu aomalëme wame moglomome.

<sup>53</sup> Bu bobë lowene esogo mëglelëlabëme momata melelogwayame na fufu melelogwayame. Na bolijayani bowenenime wame moglomame na boweneni bolijyanime wame moglomame. Na botamenino bokoninome wame moglomame na bokonino botameninome wame moglomame. Na bolujawani bu boweneninobë noninome wame

moglomame na boweneninobë nonino bolujawanime wame moglomame.”

*Oneho bu wesibi kë fata mëglebë esobëme lowene hana mla*

<sup>54</sup> Na Jisas bu kë feilawa onehome na gali tlome, “Sobo matafa kë tëbo lëtatlebë hwi elolome na megali lalekefo, ‘Tu lëgetomefe.’ Na tu leto.

<sup>55</sup> Na sobo kliji naba mehwi egowelëkaklona, yemeha fata eola kwe megali lalekefo, ‘Eli tako kliji lëgemolemefe.’ Na kliji bu tako lëgemolelele.

<sup>56</sup> Sobo sosogëna enëne. Sobo klijina matafana hwi elomo na sobo melowene eletemome, ‘Wesibi tokwafe fata mëglemefe.’ Sobo këha wesibi kwe walowene eletemo kwe ëje kë fata mëglebë wesibibë waiyo sobo hwi sle jwa fëyeme elëmone?”

*Onehobë gali aholokwane loglomebë ho belë, kë lëgloulibë hona lowene sle etlome*

<sup>57</sup> Jisas bume ita gali tlome, “Sobo lale lowene kë egelobë loweneme lowene sle jwa fëyeme eletelone?”

<sup>58</sup> Ho li, bu jume onehobë gali aholokwane loglomebë ho belë lëgloulina na sobo alëgeme mana asë elome kwe ju kë hobë lowene alëgeme yafe sle etatleme. Ju sle hana etatlona kwe bu jume onehobë gali aholokwane loglomebë ho belë lëgloulime na bu jume plismanë belë lëloulime na bu jume kalabusu lowa tuku lëleme.

<sup>59</sup> Bo jume gali sle nolë, jume këniji kë aniji moglotëyobë balitina sle hana egotlona, kwe ju kalabusu lo mëta mana tafa egleme.

# 13

*Ho bubë tēbo lowene aholokwana ti hana lēglena  
kwe bu tēbo liglitame*

<sup>1</sup> Jisas gali wafi tē tētātēme na fli enēne bu belē mitisiya na megali motlola, “Galili provins mago ho bu Gotome kleli afabo ahojume mētletla. Na eso ho Pailat bubë wame home boblo mogotomabë enēneme jine tlēme, kē enēneme mogo nalë tētēkle namēgētayame. Bu Gotome kleli afabo mana ahojume mētlekefētlabëë, na bume mogo nalë tētēkle mētētaya.”

<sup>2</sup> Na Jisas bume gali tlome, “Sobo melowene lalone, ‘Kē Galili provins mago enēnebë tēbo lowene bu takomu lēbetēme na kwe fli Galili provins mago enēnebë tēbo lowene bu kwe tokwēfoha lēbetēme na kē tēbo wesibi bume kēme fata lēletēme?’ Sobo ebë loweneme melowene lalone, hee?”

<sup>3</sup> Weye. Kē melë hanane mu. Bo some gali sle nēlēyo, sobo tēbo lowene aholokwana ti hana egelona, kwe kē enēneme fene tēbo mototoma, kēha wesibi some fata lēgletēyome.

<sup>4</sup> Na sobo ita lowene elo, ētani, Siloam lifeku magobë akolalo bu mogo nalë 18 home tētafu tle. Na sobo melowene lalone? ‘Kē enēnebë tēbo lowene takomu lēbetēme na kwe fli Jerusalem lifate enēnebë tēbo lowene bu kwe tokwēfoha lēbetēme na kē tēbo wesibi bume kēme fata lēletēme.’ Sobo melowene lalone?

<sup>5</sup> Weye. Kē melë hanane mu. Bo some gali sle nēlēyo, sobo tēbo lowene aholokwana ti hana egelona, kwe kē enēneme fene tēbo mototoma, kēha wesibi some fata lēgletēyome.”

### *Ebë ti liji, logowalë jwabë wafle gali*

<sup>6</sup> Na Jisas wafle gali metë têtatême. “Ho bu niji olo bubë wain taba liji nuju mëta lë lotle. Na kë niji bu sigli lële. Na kë ho itaita lisi, niji hwi naloglokwefleme. Kwe niji logowalë hana lële.

<sup>7</sup> Këme nêgeme bubë nuju tafa lëglelëtlebë home gali lolole, ‘Ju aholo bo eta. Aona tlibutu kë mutujubë bo ebë niji yafe hwi tlokwakikeflë, kwe bu logowalë hana lële. Te ebë niji mana tëka etokwakle. Ebë flëkebë ëflëbo yawe loglotlelime.’

<sup>8</sup> Kwe bubë nuju kë tafa lëglelëtlebë home gali lolole, ‘Eso ho. Awi. Ebë tlibutuna kwe malilibe. Bo waiyo mago flëke yefi nêletelême na ahoju somalëfa u nêletelême.

<sup>9</sup> Bo melë nogotlëna kwe bo melowene nanelë, Li tlibutuna kwe logowalême. Kë tlibutuna logowalë jwa lëglëna na kwe lalowa tëka nogotlême.”

### *Tafawa olëna, Jisas mëseme sle têtamë*

<sup>10</sup> Tafawa olëna, Jisas onehome bubë lotu lo mëta gali okokwe tlome.

<sup>11</sup> Na ahwane kë tëbo têtamëbë mëse këme telutabe. Na kë ahwane bume 18 tlibutu këniji tëbo têtakefême nêgeme na kë mësebë amlebo nemoha busu këme tlatë na lale tiglibe hana tle.

<sup>12</sup> Na Jisas bume hwi telokwakë na gali telokwakë bu belë egisi tle naegleme. Na bu tisi tlee na gali tolë, “Bo jubë tëbo wasle nêtatë.”

<sup>13</sup> Na toba bubë ato mëta gwa totatë na bu tlibe sle tle, na Gotome fleflesu tletle na bibita totle.

<sup>14</sup> Kwe lotu lo hwi loglokweflebë eso ho bu Jisame këme wame tlole, bu tafawa olëna, kë

mëseme sle tégëtamëme nëgëme. Këme nëgëme bu onehome gali tlome, “Tobali ita jowa olë ebë wege olë lëbe. Sobo metole lalo, ho sobobë ato sle lëtatëyome kwe sobo kë wege olëna egisijome. Kwe sobo tafawa olëna home ato sleme asa takune elolo. Matëbe.”

<sup>15</sup> Na kwe Jisas bubë gali tafu tëtatile, “Sobo sosogëna enëne. Sobobë gëgali na sobobë lowene bwa bwa mëbetëyo. Sobo megali elo, ‘Tafawa olëna asa wege elo.’ Kwe sobo tafawa olëna, bulmakau kleli lowa kaiselo eyeukefo, na sobobë bulmakau kleli na donki kleli tu hime kaiselo elelukwefëmo.

<sup>16</sup> Sobo tafawa olëna, bulmakau kleli itaita kaiselo aitakefëmo kwe sobo bome fëyeme gali enonane, tafawa olëna kë mëseme asa sle eta? Sobo hwi elo, ebë mëse kë nëgebëye, Abrahambë afenëbo. Na Satan bume kë yage tēgetabë 18 tlibutu këniji yage tle. Këme nëgëme bo kë tēbo, tafawa olëna lalowa sle nëtatëme.”

<sup>17</sup> Na bume kë wame motlolabë ho, kë gali aholokwane motlola na tiniji na hwë memëtletla. Kwe iniwa oneho bu iniwa wesibi melë kë totomebëme fleflesu mëtletla.

### *Goto bu tokwafe eso home tafa lëgletëmebë wafle gali*

<sup>18</sup> Na Jisas ita gali tlome, “Goto onehobë eso home kë tafa lëgletëmebë, ebë fëyeha wesibine? Bo some ebë wesibime wafle gali nolëyo.

<sup>19</sup> Goto bu onehobë eso home kë tafa lëgletëmebë, bu atowai liji fenene. Atowai liji bu tokwëtokwë mu. Kwe ho bu kë tokwëtokwë atowai liji flëke mëta sike lële. Na bu hulu mële na tatako

tiwa milibe na iniwa fole bubë tikefo mëta, lo gigliji mëkaki.” \*

*Bletë nage këna sëse mëglebë wesibibë wafle gali*

<sup>20-21</sup> Na Jisas ita gali tlome, “Goto bu onehobë eso home kë tafa lëgletëmebë ebë fëyeha wesibine? Bo some ebë wesibime wafle gali nolëyo. Goto bu onehobë eso home kë tafa lëgletëmebë bu bletë nage këna sëse mëglebë wesibi fenene. Mëse, bletë nage këna sëse mëglebë wesibi tëlewa glo ele na lebutako bletë nage obo mëta u etëkake na këna afulu ele. Na bu iniwa flële lëbebokwake na kë bletë nage iniwa feilawa sëse mele.”†

*Sobo tokwëfo ino elëme ekaklujome*

<sup>22</sup> Jisas Jerusalem lifate alëge elë tuju. Na bu li life li life onehome okokwe tlagume.

<sup>23</sup> Na ho li bume takune tlole, “Tako ho, tokwafe Goto jowa jowa onehome nëno lëglemene o feilawa onehome nëno lëgleme?” Na Jisas gali tlome,

<sup>24</sup> “Sobo ino tokwëfo elëme ekaklujome saafutuku elo. Bo some gali nolëyo, feilawa oneho bu heven lifewa mëkaklujame fene, kwe hanane.

<sup>25</sup> Tokwafe, lo bolijaya ho, bu huju lëleme na ino tiji lëleme. Na sobo kë ino ëfo li mëta elibome na ino mëta këke eletelome na mewe elome, ‘Tako ho, ino seme tika etatëna.’ Kwe bu some metafu

---

\* **13:19** Goto bu onehobë eso home kë tafa lëgletëmebë, bu kë atowai liji fenene. Ebë olëna Goto bu tëlewa onehobë eso home tafa lëletëme, kwe tokwafe bu feilawa onehobë eso home tafa lëgletëmeme. † **13:20-21** Bletë nage këna sëse mëglebë wesibi, bletë nage mëta fene flële lëkake, Gotobë afutuku meflële lëbebokwaketleme na Goto bu tokwafe iniwa onehobë eso home tafa lëletëmeme.

lëtatëyome, ‘Bo some lowene hana nëletëyo, sobo hamagobë enënë?’

<sup>26</sup> Na sobo bume megali eglolome, ‘Sebo juna hi tlekefëya na ju sebobë lifeku mëta seme okokwe latlona.’

<sup>27</sup> Kwe bu some megali loglëyome, ‘Bo some lowene hana nëletëyomu, sobo hamagobëne? Sobo tëbo lowene esogo eglelëlobë enëne. Sobo hai! Sobo bo mago eyeu.’

<sup>28</sup> Bu some hehë mëgletëyome na sobo Abraham Aisak Jekopna iniwa Gotobë lowene mago gali të mototokweflabë home mehwi elokwakëmome, bu Goto onehobë eso home kë tafa lëgletëmebë lifate mëta mëtabëya. Kwe sobowa mëglëbo elë egëtabome. Na sobo tako ye eglekefome na enino këkë etokwefomome.

<sup>29</sup> Na iniwa life mago oneho, Goto onehobë eso home kë tafa lëgletëmebë lifewa migisiyame. Bu nogowelë mago na notowelë mago na nëgetujuwelë mago na nëgemowelë mago migisiyame. Na bu kë life mëta tafa mlame na hi melekefëyame.

<sup>30</sup> Sobo aholokwane elo. Fli enëne bu ebë olëna letitabo home kë tafa mëglabë, bu tokwafe kë olëna atwati ho tafa mëglame. Na fli enëne bu ebë olëna atwati home kë tafa mëglabë bu tokwafe kë olëna letitabo ho tafa mëglame.”

### *Jisas Jerusalem lifate mago onehome maninibo tletëme*

<sup>31</sup> Na kë nalë, Farisi ho fli mitisitla na Jisame gali motlola, “Eso ho Herot jume mogo nalë təkeme wahau lëletë. Ju emago li lifewa ejumo.”

<sup>32</sup> Na Jisas bume gali tlome, “Sobo kë kulekule home megali ejuwelölome, ‘Ebë olë na uniji olë bo ahwane, hobë ato mago awi hehë nëletemë na onehobë ato elili awi sle sle notometemë na aona olëbëna bobë wege mana yawe noglolëme.’

<sup>33</sup> Kwe eli olë uniji olë kë olë bo Jerusalem lifatewa nuguwi nuguwiwa awi nelë. Melëme nëgëme, Gotobë lowene mago gali të lotokweflebë ho, li lifate meta mogo nalë hana tëkle mogotlame. Weye. Bubë ko Jerusalem lifate mëta fwa lugujtleme.

<sup>34</sup> O Jerusalem lifate mago enëne. Masiwafe. Sobo Gotobë lowene mago gali të mototkweflabë home mogo nalë tëtëkle etakefëyo na Goto kë jine tëglëkefëmebë home anijina mogo nalë metëtëkle etakefëyo. Bo some sago nanëgëtome fene, tëbo wesibi some tëbo lëgëtolime, tamo kekelo bubë nëbale fene sago etome na hwaklona lamu etome. Kwe sobo tole hana elo.

<sup>35</sup> Sobo aholokwane elo. Goto some hune lëgleme na ita hana lëgaitome. Bo some megali sle nëlëyo. Sobo bome eli hana hwi egloname. Sobo afina gali egelona, ‘Gotobë tolëna afutukuna kë ligisibë ho, Goto bume lëgaitalëme.’ Na sobo bome mana ita hwi enoname.”

## 14

### *Jisas bu ato sëse sëse tabo hobë ato sle tëtatlë*

<sup>1</sup> Tafawa olëna Jisas, Farisi hobë eso hobë lowa hime tuju. Bu kë lo mëta tafa tle, na buna kë hi mëtlabë enëne bume mana hwi mëtëbelëkakla, eli

bu habelë lëglemene? Bu tëbo lowene fa logotlemene?

<sup>2</sup> Na ato sëse sëse tabo ho Jisas belë tisi tle.

<sup>3</sup> Na Jisas kë home hwi tlole na bu Gotobë galime okokwe moglomabë ho na Farisi honame takune tlome, “Sebobë anebo gali habelë lëgëbetëna lalëlene? Sebo tëbo atona home, tafawa olëna, lalowa sle nogotlamene o matëbe?”

<sup>4</sup> Kwe bu mogweliha tafawa mëtla. Këme nëgeme bu kë tëbo atona home no tlële na sle totle na jine tlële.

<sup>5</sup> Na bume gali tlome, “Sobobë nëba o bulmakau kleli tafawa olëna yefi fulujuwa mëtetigotëyona kwe sobo tafawa egelomene? Weye, sobo glo egotolome.”

<sup>6</sup> Kwe bu kë gali tafu hana mëtëtatla.

### *Jisas gali tle, “Ju atwati hoha etabe”*

<sup>7</sup> Na Jisas hime kë mitisiyabë enënebëme hwi tlagume. Fliye eso enënebë tafa labume tafa motokouja. Këme nëgeme bu waflë gali këme të tëtätëme. Bu megali latle,

<sup>8</sup> “Ho bu mëse sei lëglebë olëbëme, fleflesu hi wesibi hime gali lëglëna na ju kë hi wesibi hime egujutlena kwe ju eso hobë tafa labume asa tafa eoule. Ju melë eglëna na bu kë tafa labu li eso home wafi aniji loglotlena,

<sup>9</sup> kwe jume kë hi wesibi hime kë gali loglëbë ho bu jume gali loglëme, ‘Ju ebë tafa labu ebë eso home kile eletle.’ Na ju tako tiniji egleme na ju atwati hobë tafa labume tafa eoule.

<sup>10</sup> Ho bu jume hi wesibi hime gali loglëna na ju kë hi wesibi hime egujuna kwe ju atwati hobë

tafa labume tafa eouleme. Ju melë eglena kwe jume hi wesibi hime kë gali loglëbë ho bu jume gali loglëme, ‘Yabe, ju eso hobë tafa labu mëta tafa eoule.’ Bu jume melë lëgëtana kwe juna kë hi egelobë oneho jume melowene mëgletëyome, ‘Bu lale eso hofe.’

<sup>11</sup> Ho bu megali lëglena, ‘Bo tako afutukuna eso hofe,’ kwe Goto bume megali logloleme, ‘Hanane ju atwati homu.’ Kwe ho bu megali lëglena, ‘Bo kwe, bo atwati hofe,’ kwe Goto bume megali logloleme, ‘Ju eso ho fe.’”

### *Jume kofayame mëglëyo jwa enënebëme sle egotomeme*

<sup>12</sup> Jisas bume hi wesibi hime kë gali loglolebë home gali tlole, “Ju tako salë hi wesibi sagli eglëlena, kwe ju yabe enëneme na blijahanime na weife mago enëneme, na weife life mago feilawa balitina kë nëgebë enëneme migisitëyome asa gali elome. Ju melë eglena kwe bu tokwafe jume kofaya hime gali mëglëyome.

<sup>13</sup> Weye. Këha melë asa ele. Matëbe. Ju tako salë hi wesibi sagli eglëlena, kwe ju wesibi jwa enëneme na yage tabo enëneme na naba titiki tabo enëneme gali elagumeme, kë salë hi wesibi hime migisiya namëglame.

<sup>14</sup> Këha enëne jume kofaya hi mëglelëyobëme hana gali möglëyome. Këme nëgеме ju safleflesu ele. Tokwafe, Goto bu lale enëneme matëmatë life mago huhuju logotomebë olëna, kwe bu wesibi jume kofayame lëglëme.”

*Tako salë hi wesibi waflë gali*

15 Na ho li, Jisas buna kë hi mëtlabë, kë gali aholokwane tle na Jisame gali tlole, “Tokwafe, Goto, onehobë eso home kë tafa lëgletëmebë life mëta kë hi mëglabë oneho, bu flelesu mëglame.”

16 Kwe Jisas mewafle gali tle, “Ho li tako salë hi wesibi sagli lëglëleme. Na bu feilawa onehome gali tuku təkoutëme, tokwafe migisitla namëglame.

17 Na tokwafe kë tako salë hi wesibi olë fata tle. Na bu bubë wege home jine tlële ëbame kë gali toglomebë onehome, megali nalugujelëmeme, ‘Sobo esijomo. Olë ekë fata lëleo. Salë hi wesibi iniwa wasagli lëlële.’

18 Kwe iniwa bu megali mëtla, ‘Sebo hana nigisiyamo.’ Ho li gali tle, ‘Bo balitina nuju wahihijika telë na bo kë nuju hwime nuguwimo. Masiwafe, bo kë salëme hana nigisime.’

19 Na ho li gali tle, ‘Bo jowafe we bulmakau kleli balitina waglo telë na bo bubë afutuku hwime nuguwitemëmefe. Masiwafe, bo kë salëme hana nigisime.’

20 Na ho li gali tle, ‘Bo mëse tokwafe sei nëlëfe na këme nëgeme kë salëme hana nigisime.’

21 Na kwe kë wege ho, kë enënebë gali bubë eso home gali tujuwelële. Na bu kë gali aholokwane tle na tako enisusu metle na bubë wege home gali tlole, ‘Ju hokweinawa kë lifatebë tokwëtokwë alëge elë na tatako alëge elë eiju. Na ju wesibi jwa enëneme na tëbo atona enëneme na kiju tëbona enëneme na naba titiki tabo enëneme nëno eouleme na elesume tenëme na bobë lowa elelëkakime tenëme.’

22 Na kwe kë wege ho melë tle, bu fene gali tle. Na bubë eso home gali tlole, ‘Eso ho, bo melë

wanelë ju fene gali ele kwe oneho lo ke hana mla.’

<sup>23</sup> Na eso ho bume gali tole, ‘Ju ebë lifate tako kile eleme na waluju life elëme asë ebelëfame. Na ju onehome hwi elomena ju bume anisasana sagali elome, bobë lowa migisiya namëglame. Bo metole nanelë, bobë lo ke nalëgleme.

<sup>24</sup> Bo jume megali nolë, ëbame bo kë gali toglomëbë oneho, bu bo kë sagli nëglëlëbë hi wesibi hana hi mëglame.’”

*Ho bu afina lowene sle lëleme na Jisasme mana esogo lëlelëleme*

<sup>25</sup> Lebutako oneho bu Jisasna asë mëtla na Jisas swaya tletëme na gali tlome,

<sup>26</sup> “Ho bobë lowene esogo home fatame tole lëglena, bu bome tako tolewa salëletënë na bubë bolijaya, bota, no, bolijahani, bomoluni, bolijamoniname tokwëfo tolewa salëletëme na bubë atome tokwëfo tolewa salëletle. Bu melë hana lëglena kwe bu bobë lowene esogo home hana fata lëgleme.

<sup>27</sup> Ho bu bobë lowene esogo home fatame tole lëglena, kwe melowene lëglena, ‘Bo Jisasme esogo nëglëlëna kwe ho bome tēbo mëgëtaname,’ kwe bubë ato uli lëglëlëna, na fli hobë wame galime uli lëglena na glime uli lëglena kwe këha ho bu bobë lowene esogo home hana fata lëgleme.

<sup>28</sup> Ho bu kabana lo glijime tole lëglena, bu kë lo gliji baliti afina melowene sle lëletëmeme, ‘Bobë baliti kaba nijine o hanane? Bo ebë balitina lo yawe noglolëmene o hanane?’

29 Bu melë hana lëglena, na bubë baliti yawe loglomena, na bu lo hana yawe loglolena kwe oneho bume sasonatlëtlë memogotlamemu.

30 Na bu megali moglolame, 'Hwi elolo. Ebë ho bu lo yafe gliji lële kwe yawe hana lolole.'

31 Li lifate mago eso ho bu li lifatewa wameme lugujume fene kwe bu afina lowene fa sle lotleme, 'Bobë lifate mago wame home boblo mogotomabë enëne tëlewamufe kwe bubë wame home boblo mogotomabë enëne feilawamufe. Sebo bume boblo nogotomamene o hanane?'

32 Na bu melowene lëglena, 'Sebo bume hana boblo nogotomamefe,' kwe bu melë lëgleme, bume wame moglolabë ho kakë mana neme, kwe bu fli home afina kë lifatebë eso ho belë mana jine lelëkakëmeme, aisenë hi namëglame.

33 Na kë fenene, somago ho li bubë iniwa wesibi aholokwana hana ti lëglena kwe bu bobë lowene esogo home hana tafa lëgleme."

### *Iji jwa kë mëglebë këjibë waflë gali*

34 Këji lale wesibi mu. Kwe këji iji tëbo mëglena, sebo habelë nogotomamene na ita iji namëgletëname? Hananefe.

35 Këha iji jwa këji bu hi wesibi hana sle motomeme watëbomu mële. Sebo sike manëkaka. Sobo ebë gali aholokwane egelona, lowene sle eletelome.

## 15

### *Sipsip kleli kë flawei tëglebë waflë gali*

<sup>1</sup> Takis baliti kë glo mëglekefëyabë ho na fli tëbo lowene kë esogo mëglelëlabë enëne bu Jisas belë

loliwa mitisitla, bubë gali aholokwane namoglolame.

<sup>2</sup> Na Farisi hona, Gotobë galime okokwe moglomabë hona wame gali mëtla, “Kë ho bu tëbo lowene kë esogo mëglëlëlabë enënena fëyeme yonane lëlelëmene? Na buna fëyeme hi mëlekefëyane?”

<sup>3</sup> Jisas bubë gali aholokwane tlome na bu ebë wafle gali këme gali tlome,

<sup>4</sup> “So mago ho li, we lujuafe we sipsip kleli lëglëmena, na jowa flawei lëgletlena, bo melowene nanelë, bu fli 99 sipsip kleli tako ona mëta hune lëleme na flawei kë lëgletlebë sipsip kleli mana hohwi lëtagutleme. Hohwi lëtagutlebëë na hwinaloko lujelëleme.

<sup>5</sup> Bu sipsip hwi lolole na feiji mëta gwa lowetleme na mana bubë lifekuwa fleflesuna lehileme.

<sup>6</sup> Bu lifekuwa lehileme, na bubë yabe name, weife mago enënename gali lëlagumeme, migisitla namëglame. Na bu misitlame, na bume gali lolomeme, ‘Bobë sipsip kleli li flawei tëglebë bo ita wahwi nololë. Sobo bona weife iniwa fleflesu nëla.’”

<sup>7</sup> Na Jisas megali tle, “Bo some gali nolëyo, tëbo lowene kë esogo lëglëlëlebë ho, bubë tëbo lowene aholokwana ti lëglëna na Gotobë lale lowenewa esogo lëglëlëtlena kwe heven life mëta kë tafa mëglabë ensel, bu tako fleflesumu mëglame, sipsip kleli kë hwi toglolebë ho fene fleflesu tle. Kwe 99 enëne bu melowene mëglana, ‘Sebobë lowene lalowa lëbetënafe, sebo sebobë tëbo loweneme ita hana gëgali nëglamefe,’ kwe heven life mëta kë tafa

mëglabë ensel, bu tokwëfo fleflesuwa mëgletëmame.”

*Baliti kë flawei eglabë waflë gali*

<sup>8</sup> Na Jisas ita gali tle, “Mëse libë baliti we këniji mëgëbetëna na jowa flawei eglatëna, bu habelë eglemene? Kwe bu esi fiji etole na iseku enijina lo mago obo sle etagule na kë baliti mana hohwi etatë. Bu hohwi etatëbëë na mana hwinaloko meeolë.

<sup>9</sup> Bubë baliti wahwi eolë na bubë yabe name, weife mago enëname gali elome, migisitëya namëglame. Na bu misitëya. Na bume gali elome, ‘Sobo bona iniwa fleflesu nanëglame. Bobë baliti flawei eglabë, bo ita wahwi nolë.’”

<sup>10</sup> Na Jisas gali tle, “Bo some gali nolëyo, tëbo lowene kë esogo lëglelëlebë ho, bubë tëbo lowene aholokwana ti lëglena na Gotobë lale lowenewa esogo sle lëglelëtlena kwe Gotobë ensel bu tako fleflesumu mëgletlame, baliti kë hwi toglëbë mëse fene fleflesu tle.”

*Falake nëba bolijayame kë kile togotlebë waflë gali*

<sup>11</sup> Na Jisas megali latle, “Ho li iko nëbale tèle.

<sup>12</sup> Na nagi fu nëba bolijayame gali tlole, ‘Aya, bo walowene nelë, ju glime nounou lale, kwe jubë iniwa wesibi seme afana mana fufu egotometëname. Kwe bo metole nanelë, bobë wesibiye, eliwamu eglënëme. Tokwafe kwe matëbe.’ Na këme bolijaya bubë iniwa wesibi tlemalë nëbaleme fufu totometëme na tlëme.

<sup>13</sup> Tako tafa hana tle, na nagifu nëba, bubë iniwa wesibi balitina hihijika tle. Na bu kë baliti glo tle na kakë lifatewa këna tuju na këme tafa

tule. Bu tafa tugulebëë, na memelë tëbo wesibi fafa totle. Na bubë iniwa baliti kë mëta yawe tlome.

<sup>14</sup> Bu baliti wayawe tlome, na kë life mëta, tako fone mana fata tletëme. Kë fone mëta tafa mëtëglabëë na bu foneme ëjeha gli lëleme.

<sup>15</sup> Këme nëgëme, na bu wegëme hohwi tëtagwi. Na kë life mago ho li bubë luku lëglëmetlebë wege fame jine tlële.

<sup>16</sup> Kë luku bu alima jibo hihi mëtlekëfe, na kë falake kë alima jibo hime tako tole latle, bubë imo këna tëtafu nalëgëtame bu foneme tako glimu latle. Kwe ho bume hi wesibi hana mëtlëla. Hanane mu.

<sup>17</sup> Na tokwafe bu lowene fa totle na gali tle, ‘Bobë ayabë wegeho bu kwe feilawa hi wesibi mu mëbetëme, kwe bo foneme kwe gli nelë.

<sup>18</sup> Bo eme hana tafa nëgelëme. Matëbemu. Ita aya belë nuguwime na bume gali nololëme, ‘Aya, bo Gotome tëbo lowenena watëbo totlë na jume mata watëbo tëtë.

<sup>19</sup> Bo lale ho nane ju bome mēfë kë egëtanëme, bobë nëba. Matëbe. Ju bome melë egëtanëme, jubë wegeho fenene.’”

<sup>20</sup> Na kwe bu kë mago, fowa tokokebë na bolijaya belë tuju.

Bu kakë mana asë tëkeke, na bolijaya hwi telokwakle. Na tako maninibo metletle. Na fëkawa tokoutlebë na lahwëwa tlële na këme sësle totle na ahino momotlë tletle.

<sup>21</sup> Na bowene këme gali tlole, ‘Aya, bo Gotome tëbo lowenena watëbo totlë na jume mata watëbo tëtë. Bo lale ho nane ju bome mēfë kë egëtanëme, “Bobë nëba.” Matëbe.’

22 Kwe bolijaya bubë wege home gali tlome, ‘Sobo hokweinawa lale heletabo ëho ehilo na bume gelo etatelome. Na toba baliti lale, toba mëta ehwatelome, na juba jibo mata ehotelome.

23 Na sobo bobë lale bulmakau nëba elesulome na tëke elolome. Sebo hi nanëglame na fleflesu nëlame.

24 Bobë nëba leboha tëgletenëme nëgeme kwe bu mana ekë lëtabetenë. Bu waflawei tlita kwe sebo ita ekë hwi nolola.’ Na kwe bu hi mëtla na tako fleflesu memëtla.

25 Na kë nalë, abwa nëba nuju mëta mana nuje. Na bu nuju mago tisi, na lolime tlibe na mana fleflesu kë mëtletlabë sawa lego aholokwane tlome.

26 Na këme li wege home we tlole na takune tlole, ‘Kë fëye legone? Fëye mëlane?’

27 Na wege ho këme gali tlole, ‘Blijamo wafi lisiyo. Na blijaya lale bulmakau kleli nëba walemitle. Bu boweneme tako fleflesu lalëletle, bu ita ligisi tleme nëgeme na lalowa tutabetle.’

28 Abwa nëba kë gali aholokwane tle na tako enisusu metletle na lowa hana tëkaklu. Na bolijaya tëkaklitle na lale lale galina yafe gali tlole, bubë lowene tli nalëgëbetleme fene.

29 Kwe bu bolijayame kofaya gali tlole, ‘Fëyemene? Wege hoha, jubë wege feilawa tlibutu fa tètakefëtë. Na bo jubë gali momata hana tëtätë. Kwe ju bome mëmë kleli nëba tokwëfoha hana yo tlonë bobë yabenime këna fleflesu nanëglelëmëme. Hanane mu.

30 Kwe jubë nëba kë nëgebëye, jubë baliti lisei oneme fwa yawe tloletëme. Kwe ëje bu lisi na ju bume fëyeme fleflesu eletlene na lale bulmakau

kleli nëba fëyeme emitlene?’

<sup>31</sup> Na bolijaya bume gali tlole, ‘Hëyai! Ju itaita bonawa nëtabekefo. Na bobë iniwa wesibi kë nëgebëye, ebë jubëwa.

<sup>32</sup> Kwe sebo eliye, blijamome fleflesu nëgletlabë olë. Jubë blijamo leboha tëgleme nëgeme kwe bu mana lëtabe. Bu waflawei tlita kwe sebo ita ekë hwi nolola.’”

## 16

### *Ululu sle logotomebë hobë waflë gali*

<sup>1</sup> Jisas bubë lowene esogo mëglelëtlabë home gali tlole, “Ètani, lebutako balitina ho, bubë wege ho jowa tafa tletle. Kë wege ho, kë lebutako balitina hobë wesibi ululu sle totokwefëmetle. Na fli ho kë lebutako balitina ho belë mītisitla na bubë wesibi ululu sle logotomebë hobë wegeme metëtahë lamëtlëla, ‘Jubë wesibi ululu sle logotomebë ho, jubë wesibi fli blawa sisile lotometë.’

<sup>2</sup> Këme nëgeme kë lebutako balitina ho bubë wesibi ululu sle logotomebë home gali telokwakle, ligisi nalëgleme. Na bu loliwa tisi tle, na mana bume gali tlole, ‘Bo ebë gali kë aholokwane nëgletëbë, ju fëye tlene? Bobë iniwa wesibi, ju mëta mana mëgëbena, tabei elëme na laba mëta yahi elëme. Ju bobë wesibi ululu sle egotomebë home hana tafa egleme.’

<sup>3</sup> Na kwe kë ululu sle logotomebë ho mana melowene tle, ‘Bo habelë nëgelëmene? Bobë wege eso ho, bome ebë ululu sle wegebë mago hehë lëgletenëmefe. Bo life yefi wegebë fa nogotlëme fene, kwe bo këha afutuku hana lëbetenë. Na bo fli

onehome balitime na fli wesibime gëgëba  
noglombëme tiniji nanëletemë.

<sup>4</sup> Kwe bo wesibi wafi lowene nelë. Bo kë wesibi  
nëgelëna kwe tokwafe, bobë wege eso ho bu bome  
hehë lëgletenëna kwe fli ho bome bubë lowa no  
mëglëname.’

<sup>5</sup> Këme nëgeme, bubë wege eso hobë mago,  
wesibi manawa kë glo mëtletlabë home gali  
telokwakëme, migisi tla namëglame. Jowa ho bu  
belë afina tisi tle na kë ululu sle logotomebë ho  
takune tlole, ‘Ju manawa, bobë wege eso hobë  
mago, habenuju wesibi glo tlenë?’

<sup>6</sup> Na bu gali tle, ‘Bo we ljuafe we ëflëbo tu  
manogwa dram glo telë.’ Na kë ululu sle  
logotomebë ho gali tlole, ‘Jubë manawa wesibi  
weniji kë gogwa mëtletëyobë laba tuku ekakeme  
na tiho laba mëta hokweinawa meyahi elëme, 50  
dram ëflëbo tu.’

<sup>7</sup> Tokwafe li ho bu belë tisi tle na bume takune  
tlole, ‘Ju manawa, bobë wege eso hobë mago,  
habenuju wesibi glo tlenë?’ Na bu gali tle, ‘Bo we  
ljuafe we witi liji manogwa iseku glo telë.’ Na kë  
ululu sle logotomebë ho gali tlole, ‘Jubë manawa  
wesibi weniji kë gogwa mëtletëyobë laba tuku  
ekakeme na tiho laba mëta hokweinawa meyahi  
elëme, 80 witi liji manogwa iseku.’

<sup>8</sup> Tokwafe, wege eso ho, bubë wesibi ululu sle  
logotomebë ho këtëglebë wesibi hwi toglometlena  
kwe bu kë tëbo wege hobëme fleflesu tletle na  
këme bibita totle. Wesibi kë wege ho melë  
këtëglebë, bu tako lowenena hobë lowenaha  
nëgeme. Ebë life mago wesibime fwa, tako  
lowene kë mëgletëmabë oneho, bubë wege wege

mëglabëme, tako lowene slemu lamëletëma. Kwe Gotobë lowene mëta kë mëtabëyabë oneho bubë wege wege mëglabëme tokwëfo lowene lamëletëma.

<sup>9</sup> Bo some gali nolëyo, sobo ebë life magobë baliti, wesibi jwa enëneme elëmo, sobobë yabe tafa namëgletëyome. Na tokwafe kë baliti glo mëglabë olë yawe lëglena, Goto na bubë ensel some unaunalëme tafa mëglabë lowa nëno mëglame.

<sup>10</sup> Bo some gali nëlëyo, ho tokwëtokwë wesibi ululu sle logotokwefëmena kwe tokwafe bu tatako wesibi mata ululu sle logotomeme. Ho li tokwëtokwë wesibi laboweli logotomena kwe tokwafe tatako wesibi mata melaboweli logotomeme.

<sup>11</sup> Sobo ebë life mago baliti ululu sle jwa egotomona, kwe Goto bu some heven life mago lale wesibi ululu slebë habëna lëglëyomene? Weye. Hanane mu.

<sup>12</sup> Na sobo fli enënebë wesibi ululu sle jwa egotomona kwe sobo sobobë wesibi mata ululu sle hana egotomome.

<sup>13</sup> Wege enëne bu tële eso home hana wege mëgletëmame. Bu melë mëglana kwe bu li eso home fwa tole sle mletlame na lime kwe tëbojiwa moglolame. Bu li eso hobë galiwa aholokwane mololame kwe lime kwe tëbojiwa mletlame. Sobo tële lowene hana esogo eglelëmome. Sobo Gotome lowene egletelobë lowene na baliti fa egotobë lowene sobo këna hana sago egotomome.”

*Jisas bu fli gali mata të tëtatëme*

14 Farisi ho bu baliti tako tole lamëtletëma. Këme nêgeme bu Jisas kē gali tēglebē gali aholokwane motlola, na bu Jisame sasonatlētlē memototla.

15 Kwe Jisas bume gali tlome, “Sobo metole lalo, oneho some melowene namēgletēyome, ‘Bu lale lowenewa esogo mēglelēlabē hofe.’ Kwe Goto bu sobobē tēbo lowene wahwi lolotēyo. Iniwa wesibi oneho melowene mēgletēmame, ‘Lale wesibi mu,’ kwe Goto bu kē wesibime melowene lalēle, ‘Tēbo wesibi mu.’”

16 Jisas gali tle, “Jon bu fata jwa tēglēna, kwe bu Mosesbē gali na Gotobē lowene mago gali tē mototokweflabē hobē galiwa tē mētētakefētēma na bu kē galiwa esogo mētēlētēma. Kwe Jon bu wafata tle na ebē olēna, Goto, onehobē eso home kē tafa lēgletēmēbē lale gali tē mētagutēma. Na oneho bu Goto, onehobē eso home kē tafa lēgletēmēbē lifate elē mēkaklujame kēkē lamla.

17 Matafana, lifena kwe tēbo mēgleme, kwe Gotobē gali kwe iniwa hana tēbo lēgletleme.”

### *Jisas one hehē lowenebēme gali tle*

18 Na bume ita gali tlome, “Ho, nome hehē lēgletēna na li mēseme sei lēglēna, kwe kē ho bu lisei lowene mēta lētabe. Na ho, li ho kē hehē lēgletēbē mēse sei lēglēna, kwe kē ho bu mata lisei lowene mēta lētabe.”

### *Ebē tako baliti musuna ho na Lasarusnabē gali*

19 Jisas megali tle, “Ētani tako baliti musuna ho tētabe. Na olēli olēli bu lale lale ēhomu tehokēfe. Na olēli olēli bu feilawa lale lale hi wesibiwa hi tlekefe.

20-21 Na wesibi jwa ho bu kē tako baliti musuna hobē lo ino ēfo li mēta ni tēbekēfe. Kē wesibi jwa

hobë weniji Lasarus. Bu melëme tole tle, kë tako baliti musuna hobë masei mago kë luklu mëglekëfebë hi wesibi obobo hi nalëgleme fene. Bubë ato juba jubawa. Na amale bubë juba ololë lamototokwefëmetle.

<sup>22</sup> Tokwafe kë wesibi jwa ho gli tle. Na ensel bume heven lifewa mitilekole na Abraham belë sei motowelile. Na kë tako baliti musu na ho mata gli tle. Na matëmatë mutujuwetla.

<sup>23</sup> Na bu hel life mëta tototabe na tako elili mëta tëtabe. Na bu Abrahamme hwi towelëkakle. Na Lasarus buna mëtëtabo.

<sup>24</sup> Na kwe, tako baliti musuna ho we towelëkakle, ‘O semle Abraham, ju bome maninibo eletenë. Ju Lasarusme gali elole, bubë toba ku, tu mëta flu lowetleme na lëhitenëme bobë aleji mëta gwa nalëtatenëme, tli nalëgëbetenëme. Bo ebë ahoju mëta nëgëtabëbë na bo tako elilimu mëta nëtabëfe.’

<sup>25</sup> Kwe Abraham gali tle, ‘O hëyai. Ju wesibi lowene sle eletle. Ju atomuna mana tafa tëglena, kwe ju feilawa lale lale wesibi mëta tëtabe kwe Lasarus bu feilawa tetëbo wesibi mëta tëtabe. Kwe ebë olëna, bu fleflesu mëta lëtabe na ju elili mëta etabe.

<sup>26</sup> Na li wesibi mëtabo. Sebobë ku mëta, Goto tako luju blëge totle. Këme nëgeme, oneho sebona kë tafa nëglabë, bu kë tako luju sobelë habëna su mëkakitëyomene? Hanane mu. Na oneho juna kë tafa egelobë bu kë luju sebelë habëna su mëkakijamene? Hanane mu.’

<sup>27</sup> Na tako baliti musuna ho gali tle, ‘Bu këha nëgebë, kwe, semle, bo jume takune nolë, ju

Lasarusme bobë ayabë lowa lalowa jine egelëkakëlemene?

<sup>28</sup> Bobë keinëbalenino tobali. Na Lasarus bume anisasana sagali lolome, bubë tëbo lowene hihijika melame na aholokwana ti melame. Bu kë elili lifate tëbo elëme nagi migisiyalime.’

<sup>29</sup> Kwe Abraham gali tle, ‘Mosesbë gali na Gotobë lowene mago gali të mototokweflabë hobë gali mana mëbetëme. Jubë blijamoni kë gali lalowa aholokwane mëglame.’

<sup>30</sup> Na tako baliti musuna ho gali tle, ‘O semle, Abraham, bu kwe hanane. Kwe ho bu matëmatë mago huju lëglena na bume luguju tëmena, kwe bubë tëbo lowene lalowa hihijika melame na aholokwana ti melame.’

<sup>31</sup> Kwe Abraham bume gali tlole, ‘Bu Mosesbë gali na Gotobë lowene mago gali të mototokweflabë hobë gali, aholokwane jwa mëglekefëyana, kwe matëmatë mago huju lëglebë hobë gali mëtabo hana aholokwane moglolame. Bubë tëbo lowene hana hihijika mëglame na aholokwana ti hana mëglame.’”

## 17

*Tëbo lowene onehobë, lalë lowene sisile lëtatëme*

<sup>1</sup> Jisas bubë lowene esogo mëglelëtlabë home gali tlome, “Memelë wesibi onehome fata mëgletëmeme, bume tëbo lowene belë ki namëkakeme. Kwe ho bu li home tëbo lowene belë ki lëkakena kwe masiwafe, Goto kë home tëbo logotlememu.

<sup>2</sup> Oneho bome tokwafe lowene sle mëgletë nabë, ho li bume tëbo lowene belë ki lëkakena kwe ebë

tëbo wesibimu. Kwe Goto kë home tako tëbo logotlememu. Kwe fli ho, kë home afina tako aniji mou mëta kesi mëtatlabë na bume nutuwa tuku mëtëkakabë na bu tu mëta suglu lëglebë kë kwe lalowa. Bu kë onehome tëbo lowene belë kiki hana lëkakeme na Goto bume hana tëbo logotleme. Këme nëgeme sobo ululu sle saelo.”

<sup>3</sup> “Sobo bome kë lowene sle egletë nabë oneho, somago ho li tëbo lowene mëta litigona kwe sobo eyeutelome na bubë tëbo lowene sle etatelome. Bu kë tëbo lowene aholokwana ti lëglena kwe sobo bubë tëbo lowene aholokwana ti egletelome.

<sup>4</sup> Na bu jume jowa olëna tobali ita tëlafë tëbo lëgëtakefëna na jume tobali ita tëlafë lisikefëtëna na jume megali lolokwefëme, ‘Masiwafe. Bo tëbo ho. Bo jume tëbo nanëtakefë ebë olëna.’ Kwe ju bubë tëbo lowene aholokwana ti eletleme.”

### *Gotome lowene sle nëgletlabëme Jisas gali tle*

<sup>5</sup> Na Jisas bubë gali tëme kë jine tëglëmebë ho, bume gali motlola, “Ju seme aitana, Gotome kë lowene nëgletlabë lowene takowa nalëgëbetëname.”

<sup>6</sup> Na Jisas bume gali tlome, “Sobo Gotome kë lowene egletelobë lowene bu tokwëfowa nëgena, aoba liji tokwëfo fenene, kwe sobo tako wesibi lalowa egotlome. Sobo time megali eglolona, ‘Ju fli elëme na nutu mëta ejuwelëbeme,’ kwe kë ti sobobë gali esogo lëglelëtëyome.”

### *Lale wege hobëme Jisas gali tle*

<sup>7</sup> “So mago ho li, bubë wege home, nuju wegeme o sipsip kleli lëglëmeme jine lëglëlena na bu wegeme lugujuna na bubë eso ho belë ita

ligisina, bubë eso ho bume megali hana logloleme, ‘Ju hokweinawa tafa elëme na hi elëme.’

<sup>8</sup> Weye. Bubë wege home megali logloleme, ‘Ju bobë hi wesibi ahojume eletenëme na kë hi wesibi mana glo eletenëme. Bo afina hi nelëme na ju mana hi egleme.’

<sup>9</sup> Na kë wege ho bubë eso hobë gali esogo lëglelëtlena kwe kë eso ho bubë wege home yaha gali hana logloleme. Hanane.

<sup>10</sup> Këme nëgeme sobo mata, sobo iniwa wesibi Goto some fene gali tolëyo waegelona kwe sobo megali saelo, ‘Sebo wege howa. Goto seme kë gali toglonabë wege, kë wegewa wawege tla. Këme nëgeme Goto bu seme yaha gali hana logloname.’”

### *Welujuwa ato juba jubawa home Jisas sle totome*

<sup>11</sup> Jisas Jerusalem lifatewa tugujubëë na bu Samaria provins jelëme na Galili provins jelëme na kë ku kuwa tuju.

<sup>12</sup> Bu li lifatewa fwa tule na ato juba jubawa kë mëtehwyabë welujuwa ho, bume alëge mëta esune mëtlëla. Bu kakëwa mëtelëkwëya,

<sup>13</sup> na Jisame feilawa we mëtelokwakla, “Jisas, tako ho, ju seme maninibo eletëna.”

<sup>14</sup> Jisas bume hwi telokwakëme na gali tlome, “Sobo sobobë ato lotu lome wege lëglebë home lebotane ëjuwetëmetelo, bu mehwi naloglëyome sobobë ato juba juba jwa mëbetëyo.” Na kwe, bu mutujabë na bubë ato juba lalowa mëtletëme.

<sup>15</sup> Na bu mago ho li, bubë ato mehwi togloleme nëgeme lalewa lëbetenëfe na bu alëgeme lu tule na

miti nagi tuju. Na bu Gotome feilawamu fleflesu tletle na bibita totle.

<sup>16</sup> Bu Jisame esune tlële na bubë elebo li mëta latitigo tlewa na bume gali tlole, “Yaha fëyeme sle etanëne?” Na kë ho bu Samaria provins mago ho. (Samaria provins mago enëne bu Israelbë afenëbonina yonane hana mëtlelogwaya.)

<sup>17</sup> Jisas kë home hwi tlole na gali tlole, “Bo melowene nanelë bo ëje welujuwa home sle notomë fene. Na fli tobali ita nilinabëye, hameta mëtabëyane?”

<sup>18</sup> Ebë ho bu Israelbë afenëboni nane kwe buwa fëyeme lu lulene Gotome fleflesu nalëgletleme na bibita lotleme? Kwe Israelbë afenëboni fli bu ita lulu jwa fëyeme mëlane?”

<sup>19</sup> Na Jisas kë home gali tlole, “Ju huju elëme na ejume. Ju bome lowene sle egletenëme nëgeme, jubë ato lalowa këme lëbetë.”

*Goto onehobë eso home tafa lëgletëmembë olë fata lëgleme nounou lalële*

<sup>20</sup> Farisi ho bu Jisame takune motlola, “Goto onehobë eso home habenalë tafa lëgletëmemene?” Na Jisas bubë gali tafa tëtätëme, “Goto onehobë eso home kë tafa lëgletëmembë, sobo nabana hwi eglobë wesibi nane.

<sup>21</sup> Na bu megali hana mëglame, ‘Hwi elo, ekë lëbe’ o ‘Hwi elo, ekë lube.’ Weyewa. Sobo aholokwane elo. Goto onehobë eso home kë tafa lëgletëmembë, bu sobobë ku mëta walëtabetëyo.”

<sup>22</sup> Na Jisas bubë lowene esogo mëglelëtlabë home gali tlole, “Tokwafe bo, Gotobë life mago ho, tako afutukuna këna nigisibë olë hwime sobo

tako tole egletelome. Kwe sobo kë olë hwi hana eglolome.

<sup>23</sup> Na bu some megali moglëyome, ‘Hwi elo. Gotobë life mago ho ita walisi na bu ebelë ekë lutabë’ o ‘Hwi elo. Bu eme ekë lëtabe.’ Kwe sobo bubë gali asa aholokwane elotemo.

<sup>24</sup> Sobo wawaine walowene eletelo, wawaine lëglena kwe iniwa oneho mehwi mlagula. Na kë fenene, bo, Gotobë life mago ho, bo nigisina kwe iniwa oneho bome mehwi mëglaguname, wawaine fene hwi mlagula.

<sup>25</sup> Kwe oneho ebë olëna kë tafa mëglabë, bu afina bome tako elili gwa mëtatëname na hehë mëletëname.

<sup>26</sup> Ètani, Noabë olëna, oneho fene mëtla, kwe bo, Gotobë life mago ho, bo nigisibë olëna, bu kë esona melë mëglame.

<sup>27</sup> Ètani Noabë olëna bu melë lamëtla, bu memelë wesibi monei monei mëtlekefëyabëë, na one sesei sesei mëtlabë na mana Noa tako sibu lowa təkaklu. Na tako haliji tu fuflu totome na iniwa oneho këhaliji tu mëta susuglu mëtla.

<sup>28</sup> Na Lotbë olëna, oneho bu Noabë olëna fene mëtla bu këha melë lamëtla. Bu memelë wesibi monei monei mëtlekefëyabëë na bu wesibi balitina hihijika mëtlekefëyabë, na bu nuju toba tobalo mëtlekefëyabë, na lo gigliji gigliji mëtlekefëyabë,

<sup>29</sup> na mana Lot bu Sodom lifate kile tle na kë nalëwa anusesi ahojuha to tëtëkeketëme, na Sodom life mago onehome kë ahoju iniwa latemuwa totome.

<sup>30</sup> Na kë oneho fene mëtlekefëya, kwe bo, Gotobë life mago ho, bo këna ita nigisibë olë mata, bu

melë mëglekefëyame. Bubë wesibiwa lowene mëgletëmame. Na Gotome lowene mëgletlabë lowene hana lowene mëgletlame.

<sup>31</sup> Kë nalë, ho li lo sebatî mëta lëtabena, kwe bu lowa bubë wesibi glome asa malëkaklu. Weye. Bu kë magowa hokweinawa lalëglëboukakuwa. Na kë fenene, ho nuju mëta tafa lëglëna bu lowa asa maluju. Matëbe. Bu kë magowa lalëglëboukakuwa.

<sup>32</sup> Sobo Lotbë mëseme kë fata tëgletëbë tëbo wesibi lowene eletelo.\*

<sup>33</sup> Ho bu melowene lëglëna, ‘Bo Jisame esogo nëglëlëna fli ho bu bome tëbo mëgëtaname.’ Na bu, bubë ato uli lëglëlëna na bome hana esogo lëglënënëna, kwe këha ho bu tëbo liglitame. Kwe ho bu bome lowene sle lëgletënëna na bubë ato uli jwa lëglëlëna kwe këha ho bu hana tëbo liglitame. Ho bu kë home mogo nalë tëke moglolana, kwe kë ho gli sle nane lële. Weye. Bu unaunalëme lale tafa lëgleme.

<sup>34</sup> Bo some gali nolëyo, bo këna nigisibë klabë, tlemalë ho hwëna ni mebome, na Goto lime fwa no lëlëleme na lime kwe kile lëleme.

<sup>35-36</sup> Na tlemalë one nage labume mëtabome na Goto lime fwa no lëleme na lime kwe kile lëleme.”†

<sup>37</sup> Na bubë lowene esogo mëgletëlabë ho, Jisame takune motlola, “Kë tëbo wesibi hameta fata lëglemene?” Na Jisas bume gali tlome, “Sobo fotë bota jiji mëglëna hwi eglomona kwe sobo

\* **17:32** Bu melë latle. Bu bubë wesibi kë hune tëglebëme lowene tletëme na miti nagî swaya tekake na Goto bume tëbo tëtämë.

† **17:35-36** Fli lowene ho bu melowene lamëtla, li gali mana lëbe kë gali mëta. Kë gali melë lëgëbelalële, “Na tlemalë nuju mëta wege melekefome na Goto lime fwa no lëlëleme na lime kwe kile lëleme.”

melowene elo, ‘Wesibi mogo këme lebo.’ Na kë fenene, sobo tokwafe wesibi hwi eglomome na melowene elome, ‘Kë tëbo wesibi këme fata lëgleme.’”

## 18

*Ebë onehobë gali aholokwane loglomebë hobë na seiju mësenabë waflë gali*

<sup>1</sup> Jisas bubë lowene esogo mëglelëtlabë home, li waflë galime gali tlome, bume meokokwe naloglomeme, bu Gotome itaita gali moglokefla namëglame na tëboijiwa jwa namëglame.

<sup>2</sup> Bu megali latle, “Li lifate mëta, onehobë gali aholokwane loglomebë ho këme tètabe. Kë ho bu Gotome uli hana tletle na bubë gali aholokwaneme momata latlokweftële na onehome mata tole hana tletëme.

<sup>3</sup> Na seiju mëse li bu kë lifate mëta mata tètabe. Na bu kë gali aholokwane loglomebë home itaita tisikeftële na gali tlole, ‘Bome wame loglonëbë ho, bome tëbo lëgëtanëme ekëne. Ju bome ebë hobota sleme saaitanë.’

<sup>4</sup> Èbame kë ho, kë mësebë galime iweniji latlekeftë, kwe tokwafe bu melowene latle, ‘Bo Gotome momata nanotokweflë na bubë gali aholokwane hana nolokweflë na onehome mata momata nanotokweftëmë.

<sup>5</sup> Kwe bo këha seiju mëseme uli nanëletë. Bome itaita sosalë latakefënë. Bo melowene nanelë, bo bubë hobota sasle nëtatë. Bo bume nëgaitëme. Bo bume nëgaitë jwa nëgena kwe bu bo belë itaita egisikëfeme na bu bome feilawa sosalë etakefënëlime.’”

<sup>6</sup> Na Jisas megali tle, “Sobo kë gali aholokwane loglomebë tēbo hobë gali lowene sle eletelo. Kë seiju mëse bume itaita yena takune tlokwefle na bume mana taitamë.

<sup>7</sup> Na sobo melowene lalone? ‘Goto bubë oneho, iniwa olēna klabë yena kë gëgali moglokweflabë hana lëgaitamemene? Na totoko lëglemene?’ Weye. Hanane mu.

<sup>8</sup> Bo some gali nolëyo. Bume hokweinawamu lëgaitameme. Kwe bo, Gotobë life mago ho, ebë lifewa ita nigisina, na bo onehome hwi noglokwakimëna, bu bome mana lowene sle mëletëna o hanane?”

*Tlemalë ho Gotome gëgali mëglelëlobë waflë gali*

<sup>9</sup> Wali enëne bu melowene lamla, “Sebo kwe lale onehomu kwe fliye sebo fenene këha hanane, bu kwe tēbo oneho.” Na Jisas bu këha enëneme waflë galina megali tlome,

<sup>10</sup> “Tlemalë ho bu Gotobë lowa mëtëkaklujo, Gotome nagëgali mëglelëlome. Li bu Farisi ho, na liye bu takis baliti kë glo lëglekëfebë ho.

<sup>11</sup> Na kë Farisi ho bu hujuna tlibe na bubë lowene nawa Gotome gëgali tlelële, ‘O Goto bo fli hoha hanane. Weye. Bo kwe lale ho mu. Këme nëgeme bo jume këme gali nolë, “Yaha fëyemene.” Fli ho bu tokli tokli lamelekefëya, na tēbo lowene esogo mëlelëkefla na honaoneme lisei lisei mëglelëmabë. Kwe bo kwe hanane. Na bo takis baliti kë glo lëglekëfebë hoha nane. Weye.

<sup>12</sup> Iniwa wiki, bo tēle olë, hi wesibi hi jwa metafa nanëlekefë, jume fwa lowene nanëgletëme. Na bobë baliti na fli wesibi bo kë glo nëglekefëbë,

bo melë nanëlekefë, bo welujuwa mëta fulelë fulelë nëlekefë, na jowa fulelë tabo jume nëlëkefë.’

<sup>13</sup> Kwe takis baliti kë glo lëglekëfebë ho kakë tujuwelibe na bu heven lifewa hana hwi tokwake. Na bu tako maninibona yako mëta bu tle na Gotome gali tle, ‘O Goto, bo tëbo ho mu, ju bome maninibo eletenë.’”

<sup>14</sup> Na Jisas gali tle, “Bo some gali nëlëyo, kë takis baliti kë glo lëglekëfebë ho bubë lowa ita lugujuna kwe buwa Gotobë naba lime lale ho lëtabeme. Kwe li ho kë kwe hanane. Iniwa oneho bu megali mëglana, ‘Sebo lale oneho mu,’ kwe Goto bume megali loglomeme, ‘Hanane, sobo tëbo enënemu.’ Kwe iniwa oneho bu megali mëglana, ‘Sebo kwe lale enëne nane, sebo tëbo enënemu,’ kwe Goto bume megali loglomeme, ‘Sobo lale enëne.’”

*Jisas gali tle, “Sobo nëbale lëkle asa etomo, bo belë matisiyao”*

<sup>15</sup> Oneho bu tatako na maba mago nëbale Jisas belë metlesumëtla. Bu metole lamëtla, Jisas bubë atome toba gogwa nalëgletëmeme na Gotome takune nalololeme, bume lëgaitame nalëgleme. Kwe Jisasbë lowene esogo mëglelëtlabë ho bume hwi motloma na wame gali motloma na lëkle mototoma, Jisame sosalë mogotlalime.

<sup>16</sup> Kwe Jisas nëbaleme gali telokwakëme, bu belë migisitla namëglame. Na bubë lowene esogo mëglelëtlabë home gali tlome, “Sobo nëbale lëkle asa etomo. Bo belë matisiyao. Oneho Gotome lowene slemu mëgletlana, ebë nëbale fene lowene slemu mletla kwe Goto bubë eso home tafa lëgletëmeme.

17 Bo nēgali gali nanolēyo, ebēha nēbale bu Gotome lowene slemu lamletla. Na oneho bu Gotome lowene sle jwa mēgletlabē, ebēha nēbale fene lowene sle mletla, kwe Goto eso home kē tafa lēglebē lifatewa hana mēkaklujame. Hanane mu.”

*Wesibi lebutakona eso ho Jisasna gēgali mētelo*

18 Na wesibi lebutakona eso ho li, Jisame takune tlole, “O Tisa, ju lale ho. Bo jume takune nolē. Bo habelē nēgelēmene, Gotona unaunalēme lale tafa nanēgelome?”

19 Na Jisas bume gali tlole, “Ju bome lale fē fēyeme etanēne? Ebē life mago ho bu lale nane, Goto buwa lalemu.

20 Ju Gotobē gali walowene eletle. Bubē bogo megali lalamē, ‘Honaone na onenaho sobo lisei lowene mēta asa tafa elo. Sobo onehome mogo nalē asa tētēke elo. Sobo tokli asa elo. Sobo sosogēna galina fli onehome blawa asa soso etatemo. Sobo bita name blijaya name boblo asa etomo. Bubē galiwa esogo elelētēmome.”

21 Na kē ho Jisame gali tlole, “O Tisa. Bo tokwēfome nēgena bo kēbē iniwa gali melē esogo tlagimē na bo ebē olēna mana esogo nēlelēmē.”

22 Jisas bubē gali aholokwane tlole na bume gali tlole, “Ju li loweneme mana afolo ele. Ju melē egleme. Jubē iniwa wesibi balitina hihijika eleme. Na kē baliti, wesibi jwa onehome sa etagutēmeme. Ju melē eglena kwe heven lifate mēta lale wesibimu lamēbetē. Na ju bome mana esogo elenēme.”

23 Kē ho kē gali yafe aholokwane tlole na bu witi tle. Bu lebutako wesibina ho nēgeme.

24 Jisas kë home mehwi tlole, witi lalëlefe na gali tle, “Wesibi lebutakona enëne, Goto bubë eso home kë tafa lëgletëmebëme, ebë kalëlego lalëletëme.

25 Kamel kleli, bu ëho susu nili fulujuwa lëkaklume ebë sogë kalëlego lalële, kwe wesibi lebutakona enëne, Goto onehobë eso home kë tafa lëgletëmebë lifatewa mëkaklujabëme ebë kalëlegomu lalëletëme.”

26 Oneho bu kë gali aholokwane mëtlabë, na klelego memëtla na gali mëtla, “Këha melë nëgena, kwe Gotobë lifateme unaunalëme ya tafa lugulemene?”

27 Na Jisas gali tle, “Oneho wesibi mogotoma jwa kë mëglabë, Goto bu kwe lalowa logotomeme.”

28 Na Pita bume gali tlole, “Aholokwane ele! Sebobë lo na iniwa wesibi wahune tula na sebo jume ekë esogo nëlelëyo.”

29 Na Jisas gali tlome, “Bo nëgalimu nanelë. Oneho Goto, bubë eso home kë tafa lëgletëmebë lowenebëme, lowene mletlana bubë lo o nonino o bolijahani o bolijamoni o botamenino o bolijayani o nëbale hune mëglana,

30 kwe Goto bume lebutako wesibimu lëglëmeme. Bu ebë life mëta mana tafa mëglana, kwe Goto bume lebutako wesibimu lëglëmeme. Ètani kë hune mëtlabë wesibi bu tëlewaha kwe Goto bume kë lëglëmebë wesibi bu lebutakomu. Na tokwafe bu Gotona unaunalëme tafa mokokefëyame.”

*Jisas bu gali tle, “Bo gli nëgelëme na huju nelëme”*

<sup>31</sup> Jisas bubë we ita tële lowene esogo mëglelëtlabë home mëglëbo elëme fo tlelekakëme na gali tlome, “Sobo aholokwane elo, sebo Jerusalem lifatewa ekë nuja. Ëtani, Gotobë lowene mago gali të mototokweflabë ho, bu iniwa wesibi bu tokwafe bome, Gotobë life mago home, mefata mëgletenëbëme, Gotobë bogo mëta wayahi mëtletëna. Na eli kë wesibi bu iniyafemu bome mefata mëgletenëme.

<sup>32</sup> Na bu bome, Israelbë afenëboni mëtabëya jwa mëglabë enëneme yo moglomame. Na bu bome soso na tlë mëgëtaname na tëboijiwa mëgletëname na nagutabana kokose mogloname.

<sup>33</sup> Na bome taba afona feilawa tëkle tëkle mëgëtaname na mogo nalë gwa mëtaname. Na bo matëmatë mëta tële olë nebëme, kwe aona olëbëye këna huju nëgelëme.

<sup>34</sup> Kwe bubë lowene esogo mëglelëtlabë ho bu kë gali wayo lowene sle hana mëtletla. Kë gali wayo bume ëhomu latletëme.”

### *Jisas bu naba titiki tabo hobë naba sle totometle*

<sup>35</sup> Jisas, Jeriko lifate lololi totle na naba titiki tabo ho bu alëge mëglëbo li mëta tafa tle. Kë ho onehome balitime gëgëba latlokwefëme.

<sup>36</sup> Na bu lebutako onehobë lëleguli lego aholokwane tlagime, na bu loli mago onehome takune tlome, “Kë fëye mëlane?”

<sup>37</sup> Na bume gali metafu mëtëtatla, “Nasaret life mago Jisas sigli lële.”

<sup>38</sup> Na kwe kë naba titiki tabo ho, bu feilawa we telokwakle, “Jisas, Devitbë afenëbo, ju bome maninibo eletenë!”

<sup>39</sup> Na motoutayabë enëne, bume wame gali motlola, “Ju kuju ebe.” Bu ita anisasanamu we telokwakle, “Devitbë afenëbo, ju bome maninibo eletenë!”

<sup>40</sup> Na Jisas këme tlikaku na gali telëkakeme, “Sobo kë home elesutëna.” Na bu loliwa tisi tle na Jisas bume takune tlole,

<sup>41</sup> “Bo jume habelë nëgëtëmene?” Na kë ho bume gali tlole, “O tako ho, bo hwi nanëgelëme fene.”

<sup>42</sup> Na Jisas gali tlole, “Ju hwi egleme. Ju bome lowene sle egletenëme nëgëme, jubë naba këme tika meletë.”

<sup>43</sup> Na hokweinawa bubë naba latikawa mëtletle na bu hwi təkake. Na bu Jisame fleflesuna nagi tlële. Na Gotome mana fleflesu tokoutle na bibita tëtagule. Na iniwa oneho buna kë mutujabë kë wesibi hwi motlola na bu mata Gotome fleflesu mëtletla na bibita mototla.

## 19

### *Jisas Sakiusbë lowa tuju*

<sup>1</sup> Na kwe Jisas Jeriko lifate elë fwa tule na lifate kukuwa kë lugujubë alëge, esogo tlagule.

<sup>2</sup> Na ho li bu kë lifate mëta tafa tle bubë weniji Sakius. Bu takis baliti glo mëglekefëyabë eso ho. Na bu feilawa balitina tafa tle.

<sup>3</sup> Bu Jisame hwi naloglolëme fene, habëtabo hone? Kwe bu hwi hana tlole. Bu afolo ho nëgëme na lebutako oneho lilifuha memëtletla.

<sup>4</sup> Këme nëgëme bu afina fëka tokou na ti elë tokwale, kë magowa, Jisame hwi naloglolëme. Bu melowene latle, “Jisas eli ebë alëge elë ligisime.”

<sup>5</sup> Na kwe Jisas kë ti li elë fwa tule na hwi tokwake na Sakiusme hwi telokwakle na gali tlole, “Sakius, ju hokweinawa kle ele. Eli sebo jubë lowa nêgëyeu nanêgelome.”

<sup>6</sup> Kême nêgeme hokweinawa laklewa têtêkakettle na bu Jisame bubë lowa fleflesuna tlelule.

<sup>7</sup> Na iniwa ho kë hwi motlolabë wame galina gëgali mëtla, “Bu têbo lowene esogo lëglelebë hobë lo elë fëyeme lujune?”

<sup>8</sup> Bu lo mêta tafa mêtelo na Sakius hujuna tlibe na Jisame gali tlole, “O tako ho. Eli bo bobë iniwa wesibi fu tèle nogotomême. Na jowa fulelë tabo, wesibi jwa enêneme sa nêgêtatemême. Na bo ho lime sogëna toglolëbë na bubë wesibi tokli têgletelëbë kwe bo bume kofayame niliafe nêglëlë nêgelême.”

<sup>9</sup> Na Jisas bume gali tlole, “Ëje, Goto bu ebë lo mago enêneme walaitame na bubë têbo lowene mago wanëno lële. Kê ho bu mata Abrahambë afenëbo lëtabe.

<sup>10</sup> Bo, Gotobë life mago ho, bo têbo loweneme kë tafa mëglabë onehome hohwi nêtatemë na bume nêgaitamême na têbo lowene mago nêno nanêgelême. Bo këme tisi temë.”

### *Welujuwa wege hobë wafle gali*

<sup>11</sup> Oneho bu Jisabë gali mana aholokwane mêtlagulabëë na bu wafle gali olisina loko metotle na wafle gali metë têtatême. Bu Jerusalem lifate elë lololi tle na oneho bu meweniji mëtla, Goto onehobë eso home kë tafa lëgletêmebë olë, eliwa fata lëglemewa. Kême nêgeme Jisas këbë wafle

galibëme gali tlole, bubë kë yaya lowene sle nalëgëtatëmeme.

<sup>12</sup> Bu megali tle, “Letitabo ho, kakë lifatewa lugujume, bume tako eso home aniji namugujelërame. Na tokwafe bu ita lisime na bubë lifate mago onehobë eso home tafa nalëkakitëmeme.

<sup>13</sup> Bu lugujume kofene na bubë welujuwa wege home gali telokwakëme bu betelë migisitla namëglame. Na bu mitisitla na bume tëlafe we (20) baliti, tëlafe we (20) baliti kënjiji tlëwagume. Na bume gali tlole, ‘Sobo ebë baliti glo elome, na bobë nagi ebë balitina sawege elo. Sobo wege egelobëë na fli baliti kë wegena saboblo etomo. Sobo mana wege elekefobëë na bo mana fata nëkakime.’

<sup>14</sup> Kwe kë hobë weife lifate mago oneho bume wame lamotlola. Këme nëgëme, bu wafi tuju, na bu gali mëtehula home nagi jine mëtelëkakëma, kë lifatebë eso home megali namugujuwelëmame, ‘Sebo kë home sebobë eso home tafame tole hana nëletlamu.’

<sup>15</sup> Kwe bume eso home aniji mutujuwelëla na bu ita tisi. Bu tisi na gali tle, ‘Ëbame baliti këtëglëmëbë wege home gali elokwakëmo, bo belë migisiya namëglame. Bo lowene nanëgelëme, bu kofaya baliti kë balitina habenuju boblo mëtëtayane?’

<sup>16</sup> Na kwe bubë wege ho li afina tisi tle na gali tlole, ‘O eso ho, ju kë tëglënëbë tëlafe we (20) balitina bo wege fa totlë na bo jubë nagi 200 kofaya baliti këna blëge tëtë.’

<sup>17</sup> Na eso ho gali tlole, ‘Ju bobë lale wege ho mu.

Ju bobë nagi lale wege fa totle. Ju kë tokwëfo wesibi ululu sle togotleme nëgeme na bo jume meaniji këme nolë, ju jowafe we lifatebë onehobë eso home tafa egletëmeme.’

<sup>18</sup> Na li wege ho bu mata tisi tle na gali tlole, ‘O eso ho, ju kë tëglënëbë tëlafë we (20) balitina bo jubë nagi wege këna fa totlë na bo we lujuafe we (100) kofaya baliti blëge tëtë.’

<sup>19</sup> Na eso ho bume gali tlole, ‘Bo jume meaniji nanolë, ju tobali lifatebë eso home tafa egletëmeme.’

<sup>20</sup> Na li wege ho bu mata tisi tle na gali tlole, ‘O eso ho. Jubë tëlafë we (20) baliti mana ekë mëbe. Bo këbë baliti afeteni sosa ëhona lei totomë na gogwa telë.

<sup>21</sup> Bo jume uli tëgletëme nëgeme. Bo melowene latletë, “Ju këha lakalena ho nëgeme ju ho libë wesibi lamomanëbawa etatle. Wesibi ho li gogwa lëglebë kwe ju lafawa etokwakle. Na hi wesibi li ho tobalo lëglebë kwe ju lamëmëwa etetle.”

<sup>22</sup> Na kwe kë eso ho bu kë wege home gali tlole, ‘Ju tëbo wege homu. Bo jubë galime fwa jume tëbo nëgëtëme. Ju bome melowene laletenëne, “Bo wesibi momanëba nogotomëbë lakalena ho. Wesibi li ho gogwa lëglebë kwe bo lafawa netokwaklë. Na wesibi li ho tobalo lëglebë kwe bo lamëmëwa nëletelë.” Ju melowene laletenëne? He?

<sup>23</sup> Ju kë lowenebëme walowene egletenëbë, kwe ju bobë baliti, baliti loloko lo mëta gogwa tugule jwa fëyemene? Na bo këngisibë bo fli kofaya balitina glo nanëkakime fene.’

<sup>24</sup> Na bu lolime kë mitlijabë home gali tlome, ‘Sobo bu mago tëlafë we (20) baliti glo elome na

200 balitina kë tafa lëglebë home elëlome.’

<sup>25</sup> Na bume gali motlola, ‘Eso ho. Ju hwi ele. Bu 200 baliti lamëbetlefe. Ju seme fëyeme gali elonane sebo fli baliti mata nëglëlabëme.’

<sup>26</sup> Na bu gali tlome, ‘Bo some gali nolëyo, iniwa oneho, Goto kë lëglëmebë wesibi, ululu sle motomana, kwe Goto bume fli wesibi mata lëglëmeme. Kwe iniwa oneho, Goto kë lëglëmebë wesibi, ululu sle jwa motomana kwe Goto kë wesibi bu mago ita hijika logotomeme.

<sup>27</sup> Na bome bubë eso home fatame tëbojiwa kë mëtletë nabë wameho, sobo eli bume bo belë elesumome na bobë naba li mëta mogo nalë tëtëkle etome.’”

<sup>28</sup> Jisas kë wafle gali wayawe tlole na bu Jerusalem lifatewa mana tokwale. Na bubë lowene esogo mëglelëtlabë ho nagi esogo mëtlagula.

### *Jisas bu eso hoha, Jerusalem lifatewa tëkaklu*

<sup>29</sup> Jisas bu Betfage lifekuwa na Betani lifekuwa loliwa fwa tule. Kë lifeku bu Oliv tiwa fatini li mëta mëtëbe.

<sup>30</sup> Na Jisas bubë lowene esogo mëglelëtlabë ho tlemalëme gali tlome, “Sobo ebë kë lugubebë lifeku elë eyeumo. Sobo eyeume, na kë lifekuwa tuhu egulona, kwe sobo afeku donki kleli, hwi eglolome, ti mëta watakuliji mototla. Ètani ho li kë donki kleli matawa hana tafa tle. Sobo taba tohwa etlome na ebelë elesulome.

<sup>31</sup> Na ho li some metakune loglëyona, ‘Sobo ebë donki kleli fëyeme tohwa etlone?’ Kwe sobo bume metafufu saetatelo, ‘Sebobë tako ho bu këna luguju nalëgleme.’”

32 Na Jisas bu kë tlemalë home jine tlëme, na bu mëtëyeu. Na bu iniwa wesibi hwi motlomo, Jisas fene gali tlome.

33 Na bu kë donki kleli këna këkesi mototlabë taba mago taba, mana tohwa mototokweflobëë na mana kë donki kleli bolijaya ho mana takune telëbakëme, “Sobo ebë donki kleli fëyeme tohwa etlone?”

34 Na bu gali tafu mëtëtatalo, “Sebobë tako ho këna lugujume.”

35 Na kwe bu kë donki kleli Jisasme sei mëtlëkakitelo. Na bubë heletabo ëho donki klelibë amlebo mëta kahëba motoletelo. Na bu Jisasme mëtaitalo, kë donki kleli matawa tafa nalogolebëme.

36 Na bu këna tuju. Na oneho bubë heletabo ëho tothwa motokouja na alëge mëta gogwa motokouja. Bu Jisasme fleflesu mëtletla, eso hoha fata tëgleme nëgeme.

37 Na bu Oliv tiwa fatini kle tëmaitabë nounou totle, na Jerusalem lifatewa fwa tuguleme nounou latotle. Na bubë feilawa lowene esogo mëglelëtlabë enëne fli, bu fleflesu lamëtletla. Na bu, klelegowa wesibi, Jisas kë blëge blëge totomebë, ita lowene mëtletëma na bu Gotome anisasana fleflesu këme mëtletla na bibita mototla.

38 “Yaha fëyeme jine tlëlene? Sebo Goto kë jine tëglëlebë eso home fleflesu nëgletlame. Bu Gotobë afutukuna lisi tëna. Goto kë eso home lëgaitaleme na ululu sle logotleme. Goto bu heven life mëta kë tafa logolebë bu lale na tako mu. Goto sebobë, ebë life mago onehobë lowene lëgëbetëme sle malëletëme.”

39 Na Farisi ho, bu kë feilawa onehobë ku mëta mëtëtabëya na bu onehobë galime tole hana mëtletëma na bu këme gali motlola, “O Tisa, jubë lowene esogo mëglelëlabë home lëkle etome kuju namëgebëyame.”

40 Kwe Jisas bume gali tafu tëtätëme, “Bo some gali nolëyo, ebë oneho bu kuju mëgebëyana kwe aniji buwa momolë mëgleme na Gotobë weniji bibita mëtatileme.”

### *Jisas Jerusalem lifate mago onehome ye tletëme*

41 Jisas Jerusalem lifate lololi totle na bu kë lifate hwi telokwakle na mana bubë onehome naba tu tletëme.

42 Na gali tle, “Oë Jerusalem lifate mago enëne. Bo metole nanelë, iniwa wesibi sobobë lowene kë sle mogotometëyobë, lowene sle egletemome, lalowa tafa naegelome. Kwe kë wesibi ëho lameletëyo na sobo hwi hana elomo.

43 Tokwafe tëbo olë somëta fata lëgleme. Na kë olëna sobobë wame enëne bu some lukume fu sle mëgletëyome na sobobë life mago lëglesu ini sabuwa mogotlame na wameme mokwatëyome.

44 Na kë wame enëne bu some na sobobë lifatena iniwa tëbo mëgëtome. Na li aniji bu li aniji matawa hana egëbamëme. Bu life silijiwa lëgëbeme. Goto some lëgaitome fene tisi tëyo kwe sobo kë olëbëme lowene sle hana tëgletelome nëgeme na kë tëbo olë some këme lisitëyome.”

### *Jisas Gotobë lo mago wesibi balitina hihijika onehome hehë tletëme*

45 Jisas tako lotu lowa tëkaklu. Na bu seuneni fole na sipsip kleli na bulmakau kleli balitina kë

hihijika mëtlegefëyabë onehome kë mago hehë tletëme.

<sup>46</sup> Na bu gali tle, “Gotobë bogo megali lala, ‘Bobë lo, oneho bome këme gëgali mëglelekefë nabë lo.’ Kwe sobo ebë lo tëbo latlo na bu tokli enënebë loha lilibetëme.”

<sup>47</sup> Na iniwa olë, bu tako lotu lo mëta onehome okokwe latlokwefëme. Na lotu lome wege mëglabë eso enëne na Gotobë galime okokwe moglomabë ho na onehobë letitabo enëne, Jisame mogo nalë tëke moglolabë gali fame oto mëtla.

<sup>48</sup> Kwe bu onehome uli mëtletëmame nëgeme. Kë iniwa oneho Jisabë gali aholokwaneme tako tole mëtletlame nëgeme na Jisame mogo nalëme tëkle jwa këme mototla.

## 20

*Bu Jisame takune motlola, “Iniwa wesibi ju melë kë egotomebë, ya aniji tolëne”*

<sup>1</sup> Na kë nalëwa, Jisas onehome tako lotu lo mëglëbo mëta okokwe tlome na bu Gotobë lala gali të tëtatëme. Na lotu lome wege mëglabë eso enëne na Gotobë galime okokwe moglomabë ho na onehobë letitabo enëne bu belë mitisitla,

<sup>2</sup> na takune motlola, “Ju seme gali enona, iniwa wesibi ju melë kë egotomebë, jume ya aniji tolëne? Kë afutuku ya tlënë?”

<sup>3</sup> Na Jisas bume gali tlome, “Bo mata, some li wesibime takune nëlëyome. Sobo bome gali enona,

<sup>4</sup> Jonme ya aniji tlolene, onehome tu mëta kë baptais totomebëye? Goto bu aniji tlolene o ho buwa aniji motlola?”

<sup>5</sup> Bu Jisabë gali aholokwane motlola na blalo gëgali mëtla, “Sebo megali noglolana, ‘Goto bu aniji tlole,’ kwe bu seme megali logloname, ‘Kë nëgali gali nëgebë, sobo bume lowene sle egletelo jwa fëyemene?’

<sup>6</sup> Kwe sebo megali noglolana, ‘Ho, buwa aniji motlola,’ kwe iniwa oneho bu seme anijina tëtëkle mägëtayame. Iniwa oneho Jonme melowene sle mägletlame nëgeme, ‘Bu Gotobë lowene mago gali të totokweflebë homu.’”

<sup>7</sup> Na kwe bu Jisame gali tafu mëtëtatla, “Sebo, Jonme kë aniji toglolebëme, lowene hana nëla.”

<sup>8</sup> Na Jisas bume gali tlome, “Bo mata, iniwa wesibi bo melë kë nogotomëbë bome kë aniji toglonëbëme some hana gali sle noglëyome.”

*Ebë wain taba liji nuju kë hwi motlolarë tëbo enënebë wafle gali*

<sup>9</sup> Jisas, onehome wafle gali latlome, “Ho bu wain taba, nuju mëta tobalo tle. Na tokwafe bu fli home gali tlome, ‘Sobo bobë wain taba nuju hwi elotëna na tokwafe wali wain taba liji lalowa glo elo, baliti këna glo naegelome.’ Na kë nuju bolijaya bu kakë lifatewa tuju.

<sup>10</sup> Feilawa olë tafa tule na kë wain taba liji mana nigliji mëtla. Këme nëgeme nuju bolijaya ho, bubë wege ho lime, bubë nuju kë hwi moglotlabë ho belë jine telëkakle, bubë wain taba liji, kë nuju mago glo nalëgleme. Na bu tuju. Kwe nuju kë hwi moglotlabë ho, bu kë wege home hwi motlola na tëkle mototla na kë mago hehë mëtëkaketla. Na bu toba alujawa tehou.

11 Na ita nuju bolijaya, li wege home jine telëkakëtëme. Kwe kë enëne, bume hwi motlola na bume mata tëkle mototla na unalëme sosalë sosalë sle memototla na kë mago hehë mëtëkaketla. Na bu toba alujawa tehou.

12 Na ita li home jine telëkakëtëme. Kwe këbëme mata unalëme sosalë sosalë sle memototla na kë mago hehë mëtëkaketla.

13 Na nuju bolijaya bu kë wesibi hwi tlome na këme lowene tle, ‘Bo habelë nëgelëmene? Bo melowene nanelë. “Bobë jowa iko nëba jine nëgelëkakëtemëme. Bo bume tako tole nanëletelë. Bu bubë gali aholokwane moglolame na bume hana tëbo mogotlame.”’ Na bu kë nëbame jine telëkakëtëme.

14 Na nuju kë hwi motlotlabë ho bu kë nëbame hwi mëtlagila na blalo gëgali mëtla, ‘Ebë ho kë ligisibë ebë kë nujubë bolijayabë bowene. Tokwafe bolijaya gli lëglena, kwe bu kë nuju bolijayame lëtabeme. Te, mana mogo nalë tëkle manotla na tokwafe bolijaya gli lëglena kwe kë nuju sebo nanëglame.’

15 Këme nëgëme bu tisi tëme na bume nuju mëglëbo elëme hehë motokoutla na mogo nalë mana tëkle motlola.

Sobo habë lowene lalone, kë nuju bolijaya bubë nuju kë hwi moglotlabë home habelë logotomemene?

16 Sobo aholokwane elo, bu ligisi nëgena, na bu kë home mogo nalë tëbo logotomeme. Na ita kë wain taba liji nuju fli home yo lolomeme.” Oneho kë gali aholokwane mëtla na gali mëtla, “Melë asa malële.”

17 Jisas bume hwi tëbelëkakëme na takune tle, “Ebë gali, Gotobë bogo mëta kë tëgëbebë, bubë wayobë habelëne? Kë gali melëgëbelalële, ‘Lo gliji ho, bu lo, anijina gliji mëtla.

Na kwe bu li anijime meweniji lamëtla,  
“Tëbowa.”

Këme nëgëme, mëglëbo elë fo mëtetokwakëya.

Kwe kë aniji mëglëbo elë kë fo

mëtetokwakëyabë

bu lale anijimu ebamë.

Lo bulego kë aniji mëta lotle.

Kë aniji jwa nëgena, kwe lo fli lëgleme.’

18 Iniwa oneho bu kë aniji matawa mitigwëyana kwe bu mogo nalë tëbo miglitayame. Na kë aniji, home matawa etigwatlena kwe bume lëlafowa egotleme.”

19 Gotobë galime okokwe moglomabë ho na lotu lome wege mëglabë eso enëne melowene lamëtla, “Jisas seme fwa wafle gali lolonafe. Bu melowene lalëletëna, ‘Sebo kë tëbo enëne. Sebo nuju kë hwi noglolibë tëbo enëne.’” Këme nëgëme, bu Jisame ëjeha fa motlame. Kwe bu onehome uli mëtletëmame nëgëme, oneho Jisame tako tole lamëtletla. Na bu Jisame fa jwa këme mototla.

*Bu Jisame, takis baliti Sisarme mëglëlabë lowenëbëme, takune motlola*

20 Gotobë galime okokwe moglomabë ho na lotu lome wege mëglabë eso enëne bu Jisame olëli olëli mana hwiwa mëtëbelëkakla. Na bu ho flime jine mëtlëma, Jisame mogweliha hwi namëbelokwaklame. Kë enëne mesosogëna lamotlola, “Sebo jubë gali aholokwaneme tako tole nanëla.” Bu metole lamëtla, Jisame sogëname

takune manolola na bu Rom life mago eso ho, Sisarme, tēbo gali naloglome. Kē tēbo galime fwa bume kēna so namēgēatlame fene.

<sup>21</sup> Na kē mogweliha hwi ho, Jisame kēme takune motlola, “Tisa, sebo lowene nanēla, ju nēgali gali homufe. Ju nēgali galimu iniwa onehome tē tētātēme. Ju lebutako balitina home na baliti jwa home, lili gali hana gali tlome. Weye. Ju iniwa home, jowa galime fwa gali tlome. Ju iniwa onehome, Gotobē gali, iniyafeme fwa okokwe tlome.

<sup>22</sup> Na ju habē lowene lalene? Sebo takis baliti Rom life mago eso ho, Sisarme, lalowa nēglēlamene o hanane? Kēha lowene lalowa nēglamene o hanane?”

<sup>23</sup> Kwe Jisas bubē sosogēna lowene walowene tletēme na bume kēme gali tlome,

<sup>24</sup> “Sobo jowa baliti bome ehitēna, hwi nanoglēme.” Na bu baliti mētēhitla. Na Jisas kēbēme hwi tlome na takune tlome, “Ebē amtētomba yalēbē lēbetlene, na yalēbē weniji lēbetlene?” Na kēme megali motlola, “Ebē Sisarbēyo.”

<sup>25</sup> Na Jisas bume gali tlome, “Te! Sisarbē wesibiye, kwe Sisarme eglēlome. Gotobē wesibiye kwe Gotome eglēlome.”

<sup>26</sup> Bu onehobē naba li mēta bume sogēna galime yafe takune motlola, bu Rom life mago eso home, tēbo gali naloglome fene. Kwe bu tēbo gali hana gali tle. Bu kē tafu tētātēmebē gali yafe aholokwane motlola na klelego memētla na tutune memētla na kēme kuju mētebēya.

*Sadyusi ho, bu Jisame, ho gli mago hujubëme takune motlola*

<sup>27</sup> Na Sadyusi ho fli, Jisas belë mitisiya. Sadyusi hobë lowene metëbetëmelatle, “Oneho lebo mëgebëyana, hana huhuju mëglame.”

<sup>28</sup> Na bu Jisame takune motlola, “Tisa, ëbame, Moses bu ebë gali meyahi latletëna, ‘Ho nëba jwa lebo lëgëbena, na bubë mëse mana tafa eglana, kwe ita bolijamo sasei lëlë, nëbaneni namëgelome. Na kë nëbale, lebo kë lëgëbebë hobë wenijina namëtabëyame. Na bu kë hobë nëbaleha tafa namëglame, na lebo kë lëgëbebë hobë weniji lëgëbagutle nalëgleme.’

<sup>29</sup> Ètani, ho li tobali ita jowa kënji bolijamonime tlebime. Bolijaha mëse bu afina sei tlë na kwe kë bolijaha nëba jwa gli tle.

<sup>30</sup> Këme nëgëme, ita këme këbë, kë mëseme sei tlë, kwe bu mata nëba jwa gli tle.

<sup>31</sup> Na ita këme këbë bu mata, melatle, kë fenene. Bu iniwa bolijamoni melamëtla, kë mëseme fwa sei mëtlekefëya na bu iniwa nëba jwa gigli mëtla.

<sup>32</sup> Na tokwafe kë mëse, bu mata, gli tle.

<sup>33</sup> Na sebo jume metakune nanëlëyo. Tokwafe gigli kë mëglabë oneho huhuju mëglana, kë mëse fëye hobë mëse tafa egletlemene? Ju wafi lowene ele, kë mëseme tobali ita tële ho kënji kë sei mëtlëya.”

<sup>34</sup> Na Jisas bume gali tlome, “Oneho, ebë olëna kë tafa mëglabë bu one sesei melekefëya.

<sup>35</sup> Kwe tokwafe Goto bu fli lebo onehome megali loglomeme, ‘Sobo huhuju egelome na bona tafa nëlame.’ Kë huju mëglabë enëne bu hana sesei mëglame.

<sup>36</sup> Bu heven life mago enselha mëtabëyame nëgeme, na bu ita gigli hana mëglame. Goto bume matëmatë mago wahuhuju logotomeme nëgeme, bubë nëbaleha këme tafa mletlame.

<sup>37</sup> Na bo some lebo enëne huju mëglabë gali li të nëtatëyo. Ètani Moses bu mata seme melebotane latëtatëna. Oneho gigli mëglabë, bu matëmatë mago huhuju mëglame. Ètani Moses bu, ahoju ti abo mëta kë u tëglebë galime meanebo gali latletle. Na bu Gotome melë galina yahi tletle, ‘Tako Ho, bu semleninobë, Abraham, Aisak, Jekopnabë Goto mana ekë tafa lële.’

<sup>38</sup> Kë gali bu seme melebotane lalëtatëna, Goto bu lebo enënebë Goto nane. Weye. Bu mana kë tafa mëglabë enënebë Goto. Gotobë naba lime, iniwa oneho, giglibë na mana kë tafa mëglabë, iniwa bu mana hwi mëtaya.”

<sup>39</sup> Na Gotobë galime okokwe moglomabë ho fli, bu Jisasbë gali yafe aholokwane mëtla na bume gali motlola, “Tisa, ju bume kë tafu ëtatëmebë gali lalëmu.”

<sup>40</sup> Na Sadyusi ho bu Jisame li loweneme takune moglolame fene, kwe bu uli memëtletlamu.

*Jisas, Goto kë aniji toglobë hobë galime, onehome takune tlome*

<sup>41</sup> Na Jisas onehome takune tlome, “Bu megali fëyeme mëlekefëyane, ‘Goto kë aniji toglobë ho, onehome nëno lëglebë ho, kë ho bu Devitbë afenëbo.’ Sobo habelë lowene laletelone, bu kë galime fëyeme gali mëlekefëyane?

<sup>42</sup> Ètani Devit buwa Buk Song mëta meyahi latle, ‘Goto, bu bobë eso home megali lalolole,

“Ju bobë tobamu toba elë tafa egletenëme,  
na ju bona onehome eso home tafa  
nëletemome.

<sup>43</sup> Sebo onehome mana tafa nëlelëmome,  
na bo jume kë wame mëglëyobë home boblo  
nogotomëme  
na bu jubë gali boblo jwa mëtome.”

<sup>44</sup> Sobo hwi elo. Devit kwe kë home mefë latotle,  
‘Bobë eso ho.’ Na bu Devitbë bowene tafa habelë  
lëglemene?”

*Gotobë galime okokwe moglomabë ho bu tëbo  
lowene esogo mëtlelëkefla*

<sup>45</sup> Iniwa oneho bubë gali mana aholokwane  
mëtlagulabëë, na mana bubë lowene esogo  
mëglelëtlabë home gali tlome,

<sup>46</sup> “Sobo Gotobë galime okokwe moglomabë  
home ululu sle saeletemo. Bubë lowene mëta asa  
etabetemo. Bu metole lamla, oneho bume hwi  
molomame na melowene mëletëmame, ‘Bu lale  
enënefe.’ Këme nëgeme, bu heletabo ëho gëgelo  
motokwefëma na asë mla. Na bu këna bume fwa  
fleflesu mla na bibita motoma. Na bu oneho këme  
kë loloko mëglabë lifeku mëta asë mëglana, bu  
metole lamla, oneho bume sësle galina gali  
namoglomame. Bu lotu lome tafa mëglana, bu  
metole lamla, onehobë naba li mëta, eso hobë  
tafa labume tafa mlame. Na hi wesibi salë olëna,  
bu metole lamla, onehobë naba li mëta, eso hobë  
tafa labume tafa mlame, oneho bume melowene  
namëgletëmame, ‘Letitabo enënefe.’ Na bu këna  
bume fwa fleflesu mla na bibita motoma.

<sup>47</sup> Na bu seiju oneme sosogëna moloma, bubë  
iniwa wesibi manawa mëglëma namëglame. Na  
bu memelë lamla, onehobë naba li mëta, Gotome

megëgali gëgali mëglelëlabëë, bubë tëbo lowene këna ëho motoma, oneho bu melowene namëgletëmame, ‘Letitabo enënefe.’ Unina, Goto onehobë tëbo lowene aholokwane loglometëmebë olëna, bu kë Gotobë galime okokwe moglomabë home tëbomu logotomeme.”

## 21

### *Wesibi jwa mëse, baliti Gotome tlële*

<sup>1</sup> Jisas tako lotu lo mëta tafa tle, na bu lebutako balitina onehome hwi tlome, bu Gotome kë sike melekefëtlabë bokis mëta baliti sisike mëtletla.

<sup>2</sup> Na bu mana mehwi tolë, wesibi jwa sei ju mëse, baliti tokwëtokwë tële kë bokis mëta sike tule.

<sup>3</sup> Na Jisas gali tle, “Bo some nëgali nanolëyo. Fli oneho kwe bu kë bokis mëta, tokwëfo balitiha sisike mla, kwe Goto kë wesibi jwa sei ju mëse melowene lalëletë, ‘Bu feilawa balitimu sike ele.’

<sup>4</sup> Fli oneho bubë feilawa baliti mëbetëme kwe tëlewa sike mla na fli mana mëbetëme. Kwe kë wesibi jwa sei ju mëse bu baliti tokwëfo mu, kwe bubë hi wesibi glo baliti iniwa sike ele.”

### *Jisas bu melëme gali tle, “Gotobë tako lotu lo yayei mogotlame”*

<sup>5</sup> Jisasbë lowene esogo mëglelëtlabë ho, bu Gotobë tako lotu lo hwi motlola na gali mëtla, “Ebë lo bu lale klisomu. Bu ebë lo lale lale anijnamu gliji mëtla. Na lale lale wesibina, Gotome kë mëglelëlabë, ebë lo neglina lamëtlëla.”

<sup>6</sup> Na Jisas gali tlome, “Bo ebë wesibi sobo kë hwi eglomobëme gali nolëyo. Tokwafe bu ebë lo iniwa

yayei mogotlame. Fli aniji matawa hana mēgēbēme. Iniwa sisike mēkakame.”

*Jisas gali tle, “Tokwafe tēbo olē fata lēgleme”*

<sup>7</sup> Na kwe bu Jisame takune motlola, “Tisa, bu ebē lo fēye olēna yayei mogotlamene? Sebo fēye wesibi afina hwi noglolamene na kēme lowene nēletlame, kē olē nounou ekē lēle.”

<sup>8</sup> Na Jisas gali tlome, “Sobo ululu sle saelo. Ho some sosogēna moglēyolime. Unina feilawa ho migisiyame na sogēname megali mlame, ‘Bo onehome tēbo lowene mago nēno nēgelēbē ho.’ Na bu gali mēglame, ‘Yawe olē nounou ekē lēle.’ Sobo bubē gali asa aholokwane elomo na bume asa esogo elelēmo.

<sup>9</sup> Na sobo fli lifate enēne tako momogli mētayabē gali aholokwane egelona, sobo uli asa elo. Kē wesibi bu afina melē mēgleme, kwe yawe olē nounou hana lēkeke.”

<sup>10</sup> Na bu gali tlome, “Li life li life mago ho, bu li life hona momogli mēgētayame.

<sup>11</sup> Na tako nano ekoujamēme. Na li life li life oneho tako foneme gigli mēkoujame na tako ato elili mēkoujame. Na sobo tokwafe fli tēbo wesibi matafa mago hwi eglomome na sobo kē wesibime tako uli eglomemu.

<sup>12</sup> Kē tēbo wesibi bu fata jwa mēleme na bu some fafa mlame na tēbo mētome. Bu bubē lotu lo elēme mēlelēkakujome na bubē letitabo enēne belē sei mugujuwelēyome. Na sobobē gali aholokwane molēyome. Na bu some kalabusu lowa sike mlame. Na bu gavman enēne belē na eso enēne

belë sei mugujuwelëyome, sobo bome lowene sle egletëname nëgeme.

<sup>13</sup> Na sobo kë nalë, Gotobë lale gali bume lalowa të egëtatemome.

<sup>14</sup> Kwe sobo tutune asa elo na melowene asa elo, ‘Sebo habë gali noglomamene?’ Weye.

<sup>15</sup> Bo some kë olëna lale lowene nëglëyome. Na sobo kë lale lowenena gali të egëtatemome. Na some kë wame moglëyobë ho kë gali aholokwane mëglëyona, na sobobë gali hana momata mëgëtatëyome na megali hana mëglame, ‘Bu yaya gali lamla.’ Weyewa. Hanane mu.

<sup>16</sup> Na tokwafe, blijayanino, bitamenino, bolijahanino, ilawa magobë, yabeninona, bu mata some kë wame moglëyobë ho belë sei mugujuwelëyome. Na somago wali mogo nalë tëtëkle mëtayame.

<sup>17</sup> Na iniwa oneho some këme gëglë mëglelëyome, sobo bome lowene sle egletëname nëgeme.

<sup>18</sup> Kwe Goto bu some tafa lëglelëyome na some hana kile lëgëtome. Na ho sobobë heven lifate magobë lale tafa hana tëbo mëgëtatëyome.

<sup>19</sup> Sobo kë tëbo olëna bome kë lowene sle egletëname lowene asa elëkëlo. Sobo melë egelona kwe sobo tokwafe unaunalëme lale tafa egelome.”

*Jisas gali tle, “Jerusalem lifate tëbo lëgleme”*

<sup>20</sup> Na Jisas ita gali tle, “Sobo tokwafe mehwi egelona, wame home boblo mogotomabë enëne, Jerusalem lifate lukume fu mëgletlana na ini sabuwa mogotlana, kwe sobo këme lowene elome, kë lifate tëbo lëglebë olë ekë fata lëlefe.

21 Na kë olëna, Judia provins mëta kë tafa mëglabë oneho, bu fatiniwa matlëbouja. Na Jerusalem lifate mëta kë tafa mëgelulabë oneho, bu kë lifate kile mlame na jebelëme mëlëboujame. Na Jerusalem lifate li mëta kë tafa mëglabë oneho, bu lifatewa ita asa matëkakluja.

22 Kë nalë, Jerusalem lifate enëneme, memelë tëbo lowene kë mëglabë enëneme Goto tëbo logotomeme. Na iniwa gali, bu Gotobë bogo mëta kë yahi mëtëglabë, bu iniyafemu mefata mëgleme.

23 Kë olëna, one nëbale imo nabë na one nëbale kolëbo nabë, bo bume tako maninibo nanëletemëmu. Masiwafe, bu habëna mëglënëboujamene? Tëbo olë, kë onehome fata lëgletëmeme. Na Goto bu kë onehome wame loglomeme na tëbo logotomeme.

24 Na wame home boblo mogotomabë enëne bu flime mogo nalë tëbo motomame. Na iniwa tatako lifate ebë life mëta kë mëgëbagubë lifate elë flime mëlelumame na kalabusu lowa sike mokoujame. Na li lifate mago wame enëne, na Gotome lowene jwa kë mëgletlabë enëne, bu Jerusalem lifate hijika motomame na yelukwafe tuku mlame. Bu Jerusalem lifate mana bubë yelukwafe mëta mana lëgebetëmebëë, na mana Goto bume gali lolomeme, ‘Sobo emago eyeu.’ Na bu kë lifate kile motlame na mujame.”

### *Tokwafe Gotobë life mago ho ligisime*

25 Jisas ita gali tle, “Kë nalëwa, tetëbo klelegowa wesibi, kliji, yeme, sëgetobana mëta fata mëgleme. Na iniwa lifate mago oneho, bu nutubë tako

liglinitigo lego aholokwane mëglana, kwe bu tako tutune mëglame na tako ulimu mëglame.

<sup>26</sup> Na feilawa oneho, iniwa tëbo wesibi kë lifateme kë fata mëglebème tako tutune mëglame. Na bu tako uli mëglame na nabasahoba mlame na mogowa mitigwëyame. Iniwa matafa mago wesibi lili mëgleme nëgeme na bu këme uli mëglame.

<sup>27</sup> Na kë nalë, iniwa oneho bu bome, Gotobë life mago home, mehwi mogloname, bo oloba nagi nigisime. Na bo tako lolokwënena, na tako kliji elulego fenene këhana nigisime.

<sup>28</sup> Sobo kë tëbo wesibi hwi eglomona, kwe sobo këme uli asa elo, walena satafa elo. Goto some nëno lëglebë olë nounou lëgleme nëgeme.”

### *Jisas binibwe ti tahweji wafle gali latle*

<sup>29</sup> Jisas wafle gali tlome, “Sobo binibwe time na fli time walowene eletemo.

<sup>30</sup> Bubë laba luklu mëglana na tahweji foke mëglana sobo këbème lowene eletelo, ‘Ebë wanagli tei fe.’

<sup>31</sup> Kë fenene. Sobo kë tetëbo wesibi, hwi eglomona, sobo melowene naegelome, ‘Goto iniwa onehobë eso home natafa lëgletëmebë olë nounou lalëletle.’

<sup>32</sup> Bo some nëgali gali nanëlëyo, fli oneho bu ebë olëna kë tafa mëglabë, bu mana mëtabëyame na kë iniwa tetëbo wesibi, mana fata mëleme.

<sup>33</sup> Lifena matafana tëbo mëgleme, kwe bobë gali unaunalëme melë lëbagukëfeme.”

### *Sobo sagli sle elëlome na walena etabome*

<sup>34</sup> Jisas ita gali tlome, “Sobo ululu sle saelo. Sobo bia na fli biaha wesibi itaita asa hihi elo na këna yaya elome. Na sobo sobobë ato lëgaitalebë wesibime feilawa tutune asa elo. Sobo këha lowene mëta tafa eglekefona kwe bo kë nigisibë olë bu some hokweinawa tafu lotokwakijome,

<sup>35</sup> kole bu klelime fene tafu etole. Kë olë li life li life mago onehome iniwa, lafatawa lokoutëmeme.

<sup>36</sup> Sobo olëli olëli walena satafa elekefo. Na sobo Gotome olëli olëli takune elokweflome, bu some lëgaito nalëgleme na bubë afutuku some lëlëyome. Na tokwafe kë tëbo wesibi somëta, fata mëglena kwe sobo kë afutukuna lalowa boblo egotomome na bu some hana tëbo mëgëtome. Na sobo tokwafe, bome, Gotobë life mago hobë naba lime, tiniji jwa naeglibetëname.”

<sup>37</sup> Na iniwa olë, Jisas tako lotu lo mëta onehome okokwe latlokwefëme. Kwe klabëye, bu Oliv tiwa fatini mëta ni tubekëfe.

<sup>38</sup> Na iniwa oneho, bu olobalë mu, tako lotu lowa mutujukefëya, bubë gali aholokwane namoglolame.

## 22

*Judas bu lotu lome wege mëglabë eso enëneme gali sle tëtätëme, “Bo Jisasmë some yo noglëyome”*

<sup>1</sup> Israelbë ilawa magobë tako lotu olë fata lëgletëmeme nounou tletëme. Israelbë afenëbo, bu kë lotu olëna, sëse wesibi jwa bletë nage hi mëtlekefëya. Na bu kë lotu olë, Goto ëtani bosemnime këna tëgaitamebë olë na Isip lifate këna kile mëtëglabë olë, lowene mëtlekefëtla.

<sup>2</sup> Na lotu lome wege mëglabë eso enëne na Gotobë galime okokwe moglomabë ho bu onehome uli mëtletëmame nêgeme na bu blalo gali këme fa mototla, Jisame hwelutuwa mogo nalë têkle namogotlame.

<sup>3</sup> Judas Iskariot na fli we ita jowa (11) hona, bu Jisabë lowene esogo mëglelëtlabë ho. Na Satan bu Judasbë lowenewa təkaklu tle.

<sup>4</sup> Na bu lotu lome wege mëglabë eso enëneme na lotu lo magobë plismanëme këme tuju tême, Jisame yo naloglomebë galime gëgali nalëglelëmeme.

<sup>5</sup> Na kë enëne bubë gali aholokwane motlolabëë na tako fleflesu memëtletlamu na bu buna gali sle mototla, bume baliti tokwafe namëglëlabëme.

<sup>6</sup> Na Judas bubë galime helawa tletême. Na bu këme melowene tle, “Bo Jisame habelë yo noglomëmene?” Bu melowene tle, “Lebutako oneho Jisasna mëtabëya jwa mlame na bo Jisame mana yo nolomëme.”

*Jisabë lowene esogo mëtlelëtelobë ho hi wesibi loko mëtëto*

<sup>7</sup> Sëse tabo wesibi jwa bletë nage kë hi mëtlekefëyabë olë wafata tletême. Kë olëna Israelbë afenëbo, bu sipsip kleli nëbale tëtêkle mëtëtakefëya na hihi mëtla. Hihi mëtlekefëyabë, na Goto, bubë bosemnime këna taitamebë olë lowene mëtlekefëtla.

<sup>8</sup> Këme nêgeme Jisas Pitaname, Jonname gali tlome, “Sobo eyeumo na tako lotu olëbë hi wesibi loko eoutome. Sebo hi nanëglame.”

<sup>9</sup> Na tlemalë bume gali motlolo, “Sebo kë hi wesibi hameta loko nêgëtomene?”

10 Na bume gali tlome, “Sobo Jerusalem lifatewa eyeume. Na ho li, sospenëna tu lëgehilena some alëgeme esune lëglëyome. Na sobo bume nagi elëkaklome. Na bu lowa lëkakluna, sobo mata kë lowa ekaklujome.

11 Na kë lo bolijaya home megali egelujuwelëlome, ‘Sebobë tisa bu megali lalële, “Hi lo hametane? Bona, bobë lowene esogo mëglelëtë nabë hona, kë hi lo mëta, sipsip kleli hi nanëglelëmëme, Goto bu sebobë semleninome këna taitamebë olë, lowene nanëgletlame.”’

12 Na kwe bu some matawa kë ke logolebë lo ke lebotane lëgëtatëyome. Kë lo bu tafa labuna, na maseina. Sobo kë hi lo mëta sebobë hi wesibi loko etome.”

13 Na bu tlemalëme mana jine telëkakëme. Na bu tako lifatewa mëtëyeu. Na bu iniwa wesibi hwi motlomo, Jisas fene gali tlome. Na bu hi wesibi sagli motlolo.

*Jisas bu bletë nage na wain taba liji tu bubë lowene esogo mëglelët labë home tlëme*

14 Hi olë fata tle, na Jisas matawa kë ke logolebë lo ke masei mëta tafa tle. Na bubë gali tëme kë jine tëglëmebë ho, buna iniwa tafa mëtla.

15 Na bume gali tlome, “Bo ebë hi wesibi sobona hi nëglame, tako tole nanelë, Goto, sebobë semleninome këna tëgaitamebë olë lowene nanëgletlame. Bo sobona ebë hi wesibi afina hi nëlame, na tokwafe bo elili mana fa nogotlëme.

16 Bo some gali nolëyo, bo sobona ebë tako lotu olëbë hi wesibi ita hana hi nëglame. Kwe tokwafe, Goto iniwa onehobë eso home tafa lëgletëmebë

olë fata lëglena, ebë tako lotu olë hi nëglabë wayo mana olafa lëgleme. Na bo ebë tako lotu olëbë hi wesibi ita mana hi nëgelëme.”

<sup>17</sup> Na bu wain taba liji tuna kabo fa tëtamë na Gotome gali tlole, “Ebë wain taba liji tu, yaha fëyeme enënane?” Na bu gali tlole, “Sobo ebë tu fa etlome na sobo lalo hi ekoujome.”

<sup>18</sup> Bo some gali nolëyo, bo wain taba liji tu eliwa sobona tei hi nëla. Kwe tokwafe Goto bu onehobë eso home tafa lëgletëmebë olë fata lëglena kwe bo wain taba liji tu mana ita hi nëgelëme.

<sup>19</sup> Na bu bletë nage fa totle, na Gotome gali tlole, “Yaha fëyeme enënane?” Na fufu totle na bubë lowene esogo mëgletëlabë home sa tëtatëme. Na gali tlole, “Ebë bobë atome lëlekuju ne. Bobë ato kë nëglëyobë some lëgaitome. Sebo ebë bletë nage fene hi nëla, sobo itaita melë sa elekefo, bome lowene eglekefëtë nabëme.”

<sup>20</sup> Bu bletë nage wahi mëtla, na bu wain taba liji tu kabo fa tëta na bletë nage fene tlëme ita metlëme tle. Na bu gali tlole, “Ebë bobë winome lëlekuju lële. Bobë wino kë lugujubë, some lëgaitome. Ètani Goto bu Mosesme megali sle latlole, Israelbë afenëbome lëgaitameme. Kwe bobë wino kë lugujubë këme lëlekuju lëgleme, Goto bu bubë onehome tiho gali sle tëtatëme, bume lëgaitame nalëglebëme.

<sup>21</sup> Sobo aholokwane elo, bome wame ho belë yo loglonëbë ho bu sebona ebë masei mëta weife tafa nëla.

<sup>22</sup> Kwe bo, Gotobë life mago ho, bo gli nëgelëme, Goto ètani fene gali tle. Kwe kë ho bome kë yo loglomebë, masiwafe, bu tëbo liglitame.”

<sup>23</sup> Na bubë lowene esogo mëglelëtlabë ho kë gali yafe aholokwane motlola, na blalo têtakune mëtlelogwaya, “Melë yalë logotlemene?”

*Semago, logouta home, ya tafa lëlene*

<sup>24</sup> Na kwe bubë lowene esogo mëglelëtlabë ho bu blalo momata mëtlelogwaya, “Semago, logouta home, ya tafa lëlene?”

<sup>25</sup> Na Jisas bume gali tlome, “Israelbë afenëboni mëtabëya jwa mëglabë enënebë eso ho, bu memelë lamla, onehome baba tei motoma. Na bu metole lamla, oneho bume megali molomame, ‘Sebobë lale lakalena letitabo ho.’

<sup>26</sup> Kwe, kë eso ho fene mëtabëya, sobo këha lowene asa fa etatemo. Weye. Matëbe. Ho li somago logouta home tafa lëglebëme tole lëglena kwe bu melë salëletëyo, atwati hoha lëtabeme. Na sobobë eso ho bu melë salëletëyo, some wegeme lëgaito hoha tafa lëletëyome.

<sup>27</sup> Sobo walowene elo. Mogoutayame kë tafa mëglabë ho, bu memelë lamla, bu masei mëta wege jwa tafawa tei lële na bubë wege ho hi wesibi tobanawa mehweitëma na masei mëta gogwa mëkakitëma na bu mana hiwa lële. Bo kwe, këha hana nëletëyo sobobë ku mëta. Bo some wegeme nëgaito hoha nëtabetëyo.

<sup>28</sup> Tëbo wesibi bome kë susu mëtëtanëbë, kwe sobo bona tafa tla na hana kile tëtana.

<sup>29</sup> Bobë aya bu bome meaniji latlonë, onehobë eso home tafa nëgletëmëme. Na kë fenene bo some këme aniji nolëyo, onehobë eso home bona tafa nanëgletëmame.

<sup>30</sup> Na bo tokwafe onehobë eso home tafa nëgletëmëna, sobo bona bobë masei mëta tafa

nëglame na hi wesibi hi nëlame. Na sobo eso hobë tafa labu mëta tafa egelome, na sobo Israelbë we ita tële iko nëbalebë bosemnenibë eso home tafa egletemome na bubë lowene mana hwi ebelëkakëtemome.”

*Jisas megali latle, “Pita, ju bome kë lowene egletenëbë lowene able egletëleme”*

<sup>31</sup> Na Jisas Pitame gali tlole, “Saimon, aholokwane ele. Satan bu Gotome watakune tlole, sobobë lowene feilawa susu nalogotometëyome. Bu mehwi naloglëyome, sobo bome kë lowene egletë nabë lowene mëta mana tafa egelomene o aholokwana ti egelome.

<sup>32</sup> Kwe bo Gotome, jume lëgaitame, wagali nololë, ju bome kë lowene egletenëbë lowene iniwa aholokwana ti jwa naegleme. Kwe tokwafe ju bome kë lowene egletenëbë lowene ita lowene egletlena, kwe juna kë tafa egelobë afanime, egaitameme, bu bome kë lowene mëgletë nabë lowene aholokwana ti jwa namëglame.”

<sup>33</sup> Na Pita bume gali tlole, “O tako ho. Bu jume kalabusu lowa mëglelujona, kwe bo juna kalabusu lo mëta weife lalowa tafa nëgelulome na sebo weife lalowa gigli nëgelome. Bo kë wesibime uli hana nëletelë.”

<sup>34</sup> Na Jisas bume gali tlole, “Pita, bo jume gali nolë, eli klabë, kekelo gali jwa lëglena, ju bome kë lowene egletenëbë loweneme aowafe able eglomeme.”

*Jisas megali tlome, “Sobo baliti, musu, wame kosina meegehoyome”*

<sup>35</sup> Na Jisas bubë lowene esogo mëgletlabë home gali tlome, “Ëbame bo some Gotobë gali tëme jine tëglëyona sobo baliti, musu, juba jibona hana tehojo. Na sobo kë tëgëyobë nalë, sobo wesibi jwa tafa tulone?” Na bume gali motlola, “Weye.”

<sup>36</sup> Na bume gali tlome, “Kwe eli, sobo baliti musuna, musumuna meegehajoegelome. Na ju wame kosi jwa nëgena kwe jubë heletabo gelowa ëho, li home balitina hihijikame elëleme na wame kosi kë balitina fa etleme.

<sup>37</sup> Ëtani bu, Gotobë bogo mëta wayahi tle, ‘Oneho bume mehwi lamotlola, tëbo ho fenene.’ Na bo some gali nolëyo, tokwafe oneho bome këha melë mëgëtaname. Ëtani bu Gotobë bogo mëta meyahi mëtla, wesibi bome fata mëgletenëme, na kë wesibi bu iniyafe fata mëgleme ekëne.”

<sup>38</sup> Na bume gali motlola, “Tako Ho, hwi ele. Sebo wame kosi tële ekëne mëbetëna.” Na bu gali tlome, “Ta tei.”

### *Jisas Oliv tiwa fatini mëta Gotome gëgali tlelële*

<sup>39</sup> Na Jisas lifate kile tle na bu Oliv tiwa fatiniwa tokwale, bu itaita fene tokwakefle. Na bubë lowene esogo mëgletlabë ho bume nagi mëtlëla.

<sup>40</sup> Bu kë belë fwa mutula, na bume gali tlome, “Sobo Gotome gëgali eglelëlome, some lëgaito nalëgleme na some su mëgëto wesibi somëta fata jwa namëgletëyome.”

<sup>41</sup> Na bume hune totome. Na ho aniji tuku lëkakeme, kë aniji egujuwetigwabë fenene Jisas këniji mefë latëkake. Na bu sëkefo miti tafa tle na Gotome mana gëgali tlelële,

<sup>42</sup> “O aya. Ju metole eglena kwe ju ebë tëbo wesibi bome kë fata mëgletenëbë, bo mago sike ekaketenëme. Kwe ju bobë tole asa esogo elelëtenë. Matëbemu. Jubë tolewa saesogo elelële.”

<sup>43</sup> Na heven life mago ensel bume tisi tle na bume taitale.

<sup>44</sup> Na Jisas bu tako maninibo latle na Gotome anisasanamu gëgali tlelële. Na bubë afeteni tu, wino fene mesësëbo tletle na life mëta toto tletle.

<sup>45</sup> Bu Gotome wagëgali tlelële, na huju tle, na bubë lowene esogo mëglelëtlabë ho betelë ita tuju. Na bume nina hwi tlome, bu tako hobota mëtletlame nëgeme këme ni mëtebëya.

<sup>46</sup> Na bume gali tlome, “Sobo fëyeme ni ebone? Sobo huhuju elome na Gotome gëgali elelëlome, some lëgaito nalëgleme na su mëgëto wesibi somëta fata jwa namëgletëyome.”

### *Judas Jisame wame home yo tlome*

<sup>47</sup> Jisas mana gëgali tle na feilawa ho mana mitisitla na Judas kë enëneme toutatëme. Judas, ebë Jisabë lowene esogo mëglelëtlabë ho li. Jisabë lowene esogo mëglelëtlabë ho kënjiji, we ita tële. Na bu Jisame loliwa tisi tle, bume sësle nalogotleme.

<sup>48</sup> Kwe Jisas bume takune tlole, “Judas, ju bome, Gotobë life mago home, fëyeme sësle etanëne na këna wame home yo elomeme.”

<sup>49</sup> Na bubë lowene esogo mëglelëtlabë ho, buna kë tafa mëtlabë, bu këme hwi mëtla, bu Jisame fa mogotlame nounou ekënefe. Na Jisame këme takune motlola, “Tako ho, sebo bume wame kosina lalowa tëtëke nëglamene?”

<sup>50</sup> Na bu mago ho li, wame kosi ki tokoke, na lotu lome wege lëglebë letitabo hobë, wege hobë tobamu elë mago aholo sika metëtatle.

<sup>51</sup> Kwe Jisas kë wesibi hwi tlole na gali tlome, “Matëbe. Eme fwa tou elo!” Na bubë toba kë hobë aholome gwa tëtatle na laslewa tëkakettle.

<sup>52</sup> Jisame fame kë mitisitlabë enëne bu melë, lotu lome wege mëglabë eso enëne na lotu lo magobë plismanë, na letitabo enëne. Na Jisas bume gali tlome, “Sobo kosina atobeilana bome fame esijone? Sobo melowene laletënanane, ‘Bo tokli ho, ’ëëë?’”

<sup>53</sup> Itaita, bo sobona tako lotu lo mëta kë tafa tëglekefëyabë na kë nalë sobo bome mana hana fa tëtana. Kwe sobo bome këna fa egëtanabë olë ekënefe. Satan bu tako afutukuna ekë lëtabe.

### *Pita bu Jisame kë lowene lëgletlebë loweneme able tle*

<sup>54</sup> Jisas wagali tlome, na bume mana fa mototla na lotu lome wege lëglebë letitabo hobë lowa mëtelëlula. Na Pita bume nagi hwiwa hwiwa tlagume.

<sup>55</sup> Na bu lotu lome wege lëglebë letitabo hobë lo li mago lëglesli elë tëkaklu. Na fli enëne bu kë mëta ahoju hoho mëtelëlula. Na Pita buna kë ahoju mëta sa mëtla.

<sup>56</sup> Na wege mëse bu Pitame hwi tlole, ahojume sa tle. Na kë wege mëse bume tëselële, na gali tle, “Kë ho bu melë Jisasna kë tafa mëtlabë ho.”

<sup>57</sup> Kwe Pita bu able tle, “Mëse mëtabone. Bo kë home lowene hana nëletelëmu. Hanane mu.”

<sup>58</sup> Na bu sogë tafawa tle na ho li tëselële na megali tlole, “Ju mata, bubë lowene esogo

tëglelëtelobë ho li.” Kwe Pita bu able metle,  
 “Hanane mu. Bo bubë lowene esogo tëglelëtelëbë  
 ho nane.”

<sup>59</sup> Bu tako tafaha tle na ho li anisasana gali tle,  
 “Nëgalimu. Hwi elo. Bu mata Galili provins mago  
 holife. Kë ho buna kë tafa mëtlekefëyabë ho.”

<sup>60</sup> Kwe Pita able tle, “Ju kë gali eglebë gali bo  
 lowene hana nëletelëmu. Hanane mu.” Bu mana  
 gëgali tle, na kekelo mana huju tle.

<sup>61</sup> Na Jisas swaya tletle na Pitame hwi  
 telokwakle. Na Pita, Jisas kë gali toglolebë gali ita  
 lowene tletle. Kë gali melë, “Eli klabë, kekelo gali  
 jwa lëglena, ju bome kë lowene egletenëbë  
 loweneme aowafe able eglomeme.”

<sup>62</sup> Na Pita bu able kë tëglebëme lowene tle na lo  
 li mago lëglesu mago tëkakli, na tako ye kle totle.

### *Bu Jisame sasonatlëtlë memototla na tëkle mototla*

<sup>63</sup> Jisas lotu lome wege lëglebë letitabo hobë lo  
 mëta tafa tle na bume kë fa mototlabë ho bume  
 sasonatlëtlë memototla na bume tëkle mototla.

<sup>64</sup> Na bubë naba ëhona lamu mototometla na  
 bume mana tëkle mototla na takune motlola, “Ju  
 iniwa wesibi lowene egletëmena kwe ju seme gali  
 sle enoname, jume ya tëke lolëne?”

<sup>65</sup> Na bume feilawa tiniji galina gali motlola.

### *Jisame onehobë gali aholokwane moglomabë letitabo hobë naba li elëme mëtlelula*

<sup>66</sup> Oloba olë, onehobë gali aholokwane  
 moglomabë letitabo ho, Gotobë galime okokwe  
 moglomabë ho na lotu lome wege mëglabë eso  
 enëne bu loko mëtlelëya. Na bu Jisame, kë loko  
 mëtlelëyabë enëne belë mëtlelutëma. Na kë enëne  
 Jisame takune motlola,

<sup>67</sup> “Ju seme gali enona, Goto kë aniji toglëbë ho, onehome nëno naeglebëme. Ju kë ho ekëne?” Na bu gali metafu têtatëme, “Bo some megali noglëyona, ‘Bo kë ho ekëne,’ kwe sobo bobë gali lowene sle hana egletelome.

<sup>68</sup> Na bo some fli galime takune noglëyona, kwe sobo bobë gali hana tafu egëtatëname.

<sup>69</sup> Kwe elina, unina, bo, Gotobë life mago ho, bo tako kalëlegona Gotobë tobamu toba elë tafa nëgelëme.”

<sup>70</sup> Na iniwa bume takune motlola, “Ju melowene lalene, ‘Bo Gotobë nëba,’ hee?” Na bume tafu têtatëme, “Sobo nëgali gali gali elo. Bo ta kë ho ekëne.”

<sup>71</sup> Na bu gali mëtla, “Sebo fli enëneme hana gali noglomame, seme kë hobë tëbo loweneme gëgali namëglenëname. Sebo ëje bubë tëbo gali, bubë ëfalëbo mago waaholokwane nolotlame nëgeme.”

## 23

### *Bu Jisame eso ho Pailatbë naba li elëme mëtletlula*

<sup>1</sup> Na kwe, kë onehobë gali aholokwane moglomabë letitabo ho, bu Jisame eso ho Pailat belë mëtletlula.

<sup>2</sup> Na bu Jisas kë tafa lëglebë galime Pailatme megali motlola, “Ebë ho bu sebobë life mago onehobë wame lowene tufiji latotometëme. Bu megali latlome, ‘Sobo takis baliti, Rom life magobë eso ho, Sisarme, asa elëlo.’ Na bu megali latle, ‘Bo Goto kë aniji toglënëbë ho, onehome nëno nëgelëbë ho, bo kë eso ho.’”

<sup>3</sup> Na Pailat Jisame takune tlole, “Ju Israelbë afenëbobë tako eso hone?” Na Jisas tafu tētatile, “Nëgalife. Ju fene gali ele.”

<sup>4</sup> Na Pailat lotu lome wege mëglabë eso enëneme na oneho name gali tlome, “Bo ebë hobë, li fëye wesibiha, hwi hana nolotelë na bo manawa hana tëbo nogotlëme.”

<sup>5</sup> Kwe bu bubë gali anisasana tafu mētētatla, “Bu Judia provinsbë, li life li life asë tëbelëfa na onehome okokwe latlagukefëme. Na bu iniwa onehobë wame lowene tufiji latëtagutëme. Bu Galili provins mëta okli tle na bu li life li life asë tëbelëfa na ebelë mana ekë lisi.”

*Bu Jisame eso ho Herotbë naba li elëme mëtlelula*

<sup>6</sup> Pailat kë gali aholokwane tlome na takune tlome, “Ebë ho, bu Galili provins mago hone?”

<sup>7</sup> Pailat melowene tle, “Jisas Galili provins mago hofe. Bo bume Galili provins mago onehobë eso ho Herot belë jine nëgelëkaklëme.” Na bu Jisame eso ho Herot belë këme jine telëkakle. Herot bu ëbame bubë provins kile tle na kë nalë Jerusalem lifateme esokwaneme tafa tle.

<sup>8</sup> Bu Jisame Herot belë mëtlelula. Herot bu Jisas wesibi kë togotomebë gali waaholokwane tletle na bu anebo Jisame hwi loglome fene kwe bu hwi hana tlole. Këme nëgeme bu Jisame hwi tlole na tako fleflesu këme tle. Bu metole latle, Jisas bubë naba lime klelegowa wesibi blëge blëge nalogotometleme.

<sup>9</sup> Këme nëgeme Herot bu Jisame feilawa wesibime këme tëtakune tlole. Kwe Jisas bubë iniwa gali hana tafu totometle.

<sup>10</sup> Na lotu lome wege mëglabë eso enëne na Gotobë galime okokwe moglomabë ho eso ho Herotme loliwa mutuju tla na bu Jisame blawa kë so mëtëtatlabë galime feilawa gali motlola.

<sup>11</sup> Na kwe Herotna bubë wame home boblo mogotomabë enëne na Jisame sisile lamototla na klëë galina gali motlola. Na eso ho fene mohweya, bu këha lale ëho bume mëtehvatla na bume Pailat belë ita jine mëtelëkakla.

<sup>12</sup> Ètani Herotna Pailatna gëglë lamëtëlekefo. Kë olëna kwe yonanewa lamëtelo.

*Pailat bu gali tle, “Jisabë ato ti mëta nilina bu eletelo.”*

<sup>13</sup> Na Pailat bu lotu lome wege mëglabë eso enëneme na Israelbë afenëbobë eso enëneme na onehome gali telokwakeme na bu belë loko namokweijame na bu mëta loko mëtëkakija.

<sup>14</sup> Na bume gali tlome, “Sobo ebë home bo belë elesulo, na sobo megali lalona, ‘Ebë ho bu sebobë life mago onehobë wame lowene tufiji latotometëme.’ Na bo sobobë li mëta bume kë galime watakune slemu nololë. Kwe sobo aholokwane elo. Bo ebë hobë, li fëye wesibiha, hwi hana nolotelë. Bo melowene nanelë, ‘Sobo bume fene so etatelobë wesibi, bu melë hana totle.

<sup>15</sup> Na Herot bu mata, bubë li fëye wesibiha, hwi hana lolotle, na bu ebë ho sebelë ita këme jine lelëbakle.’ Aholokwane elo, ebë ho bu li fëye wesibiha hana totle na bo megali hana nëgelëme, ‘Bume lalowa, mogo nalë tëke elolo.’ Hanane mu.

<sup>16-17</sup> Këme nëgëme, bo bobë wame home boblo mogotomabë enëneme afina gali nolomëme, bume

taba afona lëlafafa motlame na bo mana jine nelëkaklëme.”\*

<sup>18</sup> Kwe oneho iniwa anisasana gali mëtla, “Ju kë home mogo nalë tëke elole na ju Barabasma kalabusu lo mago jine elëbakëtëname.”

<sup>19</sup> Barabas, ëtani, fli onehobë wame lowene tufiji tëtatëme, na bu gavman enëneme tako wame lamotloma, Jerusalem lifate mëta. Na bu kë nalë, ho lime mogo nalë tëke tlole. Na gavman enëne bume kalabusu lowa këme tuku mëtla.

<sup>20</sup> Kwe Pailat metole latle, Jisasma jine lëgelëkakleme. Këme nëgeme ita gali tlome, Jisasma jine nalëgelëkakleme.

<sup>21</sup> Kwe bubë gali aholokwane hana motlola na anisasana gali mëtla, “Bubë ato ti mëta nilina bu eletelo! Bubë ato ti mëta nilina bu eletelo!”

<sup>22</sup> Na bume ita gali tlome, “Sobo kë gali fëyeme gali elone? Bu fëye tëbo wesibi totlene? Bo ebë hobë, li fëye wesibiha, hwi hana nolotelë na bo megali hana nëgelëme, ‘Bume lalowa, mogo nalë tëke elolo.’ Hanane mu. Këme nëgeme, bo bobë wame home boblo mogotomabë enëneme afina gali nolomëme, bume tëklewa namogotlame na bo mana jine nelëkaklëme.”

<sup>23</sup> Kwe bu Pailatme itaita anisanamu gali motlola, “Bubë ato ti mëta nilina bu eletelo!” Na Pailat bubë wame gali yafe aholokwane tlokwe fëme na bu kwasa metletëme na melowene tle, “Matëbe. Bu melë matotla.”

---

\* **23:16-17** Fli lowene ho bu melowene lamëtla, li gali mana lëbe kë gali mëta. Kë gali melë lëgëbelalële. Li li tlibutuna, bubë tako lotu olëna, eso ho Pailat bu jowa kalabusu lo mago home bu belëme jine latlëkefëmetëme.

24 Këme nëgeme bu bubë lowenewa esogo tlelètème na gali tle, “Jisas gli malële.”

25 Na Pailat, Barabasmë, kalabusu lo mago tuhu totle na jine telëkakëtème, bu fene gali molola. Barabas, ëtani, fli onehobë wame lowene tufiji tëtätème na bu gavman enëneme tako wame lamotloma. Na kë nalë bu ho lime mogo nalë tëke tlole. Na gavman enëne bume kalabusu lowa këme tuku mëtla. Na oneho fene tole mëtla, bu Jisasmë bubë wame home boblo mogotomabë enënebë toba elë gwa tetokwaketème.

*Bu Jisasmë ti mëta nilina bu mëtla*

26 Na wame home boblo mogotomabë enëne Jisasmë lifeku mago mëtlelula, na bu Sairini lifate mago Saimonme alëgeme esune mëtlëla. Saimon bu waluju mago Jerusalem lifatewa tuju fene kwe bume fa mototla na bu Jisasmë këme bu mëglabë ti, bubë feiji mëta gwa mototatla na gali motlola, “Se! Mana ehule na Jisasmë nagi elëkakleme.” Na bu ti fejina nagi esogo tlagule.

27 Na lebutako oneho bume nagi esogo mëtlagula. Na lebutako one bu yena esogo mëtlagula.

28 Kwe Jisas bume swaya tletème na gali tlome, “Sobo, Jerusalem lifate mago one, sobo bome asa ye eletëna. Matëbe. Sobo some fwa ye elome na sobobë nëbaleme fwa ye eletemome.

29 Tokwafe, li tëbo olë fata lëgleme. Kë tëbo olë fata lëglena, kwe bu megali mëglame, ‘One nëbaleme yoneti mëglabë bu fleflesu mëglame.’

30 Kë nalë, oneho megali mëglame, ‘Sebo metole nanëla, ebë fatini kwe seme tëtafu matla na lamu

matëtana, hokweinawa gigli nanëglame na wame ho seme tëbo jwa namëgëtaname.’

<sup>31</sup> Bo li fëye wesibiha hana telë kwe bu bome manawa tëbo mëtana. Bu bome melë mëtanana kwe bu Jerusalem lifate mago enëneme, memelë tëbo lowene mëta kë tafa mëglabë, tako tëbomu mogotomame.”

<sup>32</sup> Na wame home boblo mogotomabë enëne, bu tlemalë memelë tëbo lowenebë home mata mëtleluma. Bume, Jisasname mogo nalë tëtëke namëglame.

<sup>33</sup> Na bu li lifekuwa fwa mutula. Kë lifeku weniji melë, “Eso Elebo.” Na kë fatini lufu mëta wame home boblo mogotomabë enëne Jisasme ti mëta bu mëtla na bu Jisasme kë ti magowa lë mototla. Na bu kë tlemalë memelë tëbo lowenenabë home bubë li mëta mata ola mëtla. Li tobamu toba elë tlibetle na li yemane toba elë tlibetle.

<sup>34</sup> Na Jisas ti magowa gali tëtëkeke, “Aya, ju ebë enënebë tëbo lowene, bome mogo nalë kë tëke moglonabë lowene, aholokwana ti eletëme. Bome melë kë mëgëtanabë wesibi, lowene sle jwa mëgletlame nëgeme.” Na wame home boblo mogotomabë enëne bubë ato mago ëho blalo melëna sa mëtëtaya. Bu satu salë mëtla na ho mana aniji motloma jowa jowa wesibi glo namëglabëme.

<sup>35</sup> Onoho bu mana hwiwa motlokwefëma, na kwe Israelbë afenëbobë eso enëne, Jisasme mana sasonatlëtlë memototla na gali motlola, “Bu fli home taitame. Na bu ebë ho nëgebë kwe Goto bume kë aniji toglolebë, onehome lëgaitameme na nëno lëglebëme, kwe bubë ato lëgaitaleme fene.”

<sup>36</sup> Na wame home boblo mogotomabë enëne, bu mata, bume sasonatlëtlë memototla. Na bu loliwa mutuju tla na bume kaya tabo wain taba liji tu mëglëla namëglame fene.

<sup>37</sup> Na gali motlola, “Ju Israelbë afenëbobë esoho nëgebë kwe jubë ato mana aitale.”

<sup>38</sup> Na bu gali ti ka tabo mëta yahi mëtla na Jisasbë eso lufu elë fla mototatla. Bu kë mëta meyahi lamëtletla, “Israelbë afenëbobë tako eso ho.”

<sup>39</sup> Jisasname iniwa kë bu mëtëglabë tëbo lowenenabë ho li, Jisame tiniji galina megali tlole, “Ju melowene lalene, Goto jume kë aniji toglibë hone, hee? Hanane mu. Kwe melëbë kwe jubë ato aitalëme na seme mata aitanome. Kwe hanane.”

<sup>40</sup> Kwe li tëbo lowene ho, libë gali aholokwane tlole na bume wame gali metlole, “Tokwafe Goto jume kë tëbo lëgëtabë wesibime ju uli jwa fëyeme elene? Ju hwi ele, bu seme iniwa tëtëkle mëtana.

<sup>41</sup> Kwe bu seme kë tëtëkle mëgëtanabë kë kwe lalowa, bu sebobë memelë tetëbo lowenebë niiji tëtëkle mëtana. Kwe ebë ho kë nëgebë, bu li fëye wesibiha hana totle bume blawamu tëkle motla.”

<sup>42</sup> Na bu Jisame gali tlole, “Jisas, ju unina eso home tafa eglena kwe ju bome aholokwana asa ti ele.”

<sup>43</sup> Na Jisas bume gali tlole, “Bo jume nëgalime gali nolë, eli ju bona heven lifeme weife tafa nëgelome.”

### *Jisas gli tle*

<sup>44-45</sup> Kliji ku mëta tlibe na kliji ki tetëfatle na tlukufiniwa tëbe. Na këha tëgemowagulebëë na

taboklë kljina ita fetiha tëbe. Na kë tako ëho, bu tako lotu lo ino mëta këkesi tēgelulebë, lakawa tēmalita kufe lokwati.

<sup>46</sup> Na Jisas anisasanamu afëflei tle, “Aya, bo bobë amtëtomba jubë toba elë ekë gwa netëfaklë.” Bu megali wafi tlole na tuku tēkakë.

<sup>47</sup> Na wame home boblo mogotomabë enënebë eso ho, bu këme hwi tle na Gotome fleflesu tletle na bibita totle na gali tle, “Nëgalimufe. Ebë ho bu lale ho fe. Bu li fëye wesibiha hana tēbo totle.”

<sup>48</sup> Na oneho kë hwime kë mitisiyabë, Jisas kë gli tēglebë yafe hwi motlola na bu tako maninibo memëta na bubë lo elë ye motokouja.

<sup>49</sup> Na Jisasbë yabe enëne na Galili provins mago Jisasna kë mitisiyabë one, bu kakëha mëtelibukëya na iniwa wesibi hwi mëtelëkakëma.

### *Bu Jisas mogome aniji fuluju matëmatë mëta gwa mototla*

<sup>50-51</sup> Arimatea lifeku mago ho bu kë mëta tëtabe. Bubë weniji Josep. Arimatea bu Judia provinsbë li lifeku. Bu lale homu. Bu, Goto iniwa onehobë eso home kë tafa lëgletëmebë olëbëme, hwi lëglekëfebë. Bu onehobë gali aholokwane moglomabë letitabo ho li. Kwe bu onehobë gali aholokwane moglomabë letitabo ho flibë lowenebëme, Jisame mogo nalë kë tēkle mototlabë lowenebëme, helawa hana tletëme.

<sup>52</sup> Na Josep eso ho Pailatme tuju tle na takune tlole, “Bo Jisas mogome ti mago lalowa tohwa nogotlëmene?” Na Pailat gali tlole, “Lalowa tohwa etle.”

<sup>53</sup> Na kwe Josep Jisas mogome ti mago tohwa tëtetëbakle na bu lale tatiwa ëho heletabona lei

totle na tehule na tiho aniji fuluju matëmatë mëta gwa tujuwetle. Kë aniji fuluju, ho tabana go mëtlelëya.

<sup>54</sup> Bu Fraide taboklë mu, Jisas mogome gwa totle, na bubë tafawa mëglabë olë nounou watletëme.

<sup>55</sup> Galili provins mago Jisasna kë mitisiyabë one bu Josepme esogo mëtlagula na bu kë aniji fuluju matëmatë hwi motlëya na bu mata Jisas mogome këme kë gwa tégelujuwetlebë tala hwi motlola.

<sup>56</sup> Bu wahwi motlola na mana bubë lowa mutuja. Na lëkaluwa welë tu na fli lëkaluwa wesibi sle mototoma, Jisas mogome këna tefo namogotlame. Na tafawa mëglabë olë bu tafawa mëtla, Moses bu ëtani fene gali tle.

## 24

### *Jisas bu matëmatë mago huju tle*

<sup>1</sup> Sande, olobalëwa mu, one bu matëmatëwa mutuja. Na lëkaluwa welë tu na fli lëkaluwa wesibi mata mëtehouja.

<sup>2</sup> Bu matëmatëwa fwa mutula na mehwi mëtla. Matëmatë ëfo kë tiji mëtlabë aniji waobobwelë mëtagujayafe.

<sup>3</sup> Na bu kë aniji fuluju matëmatë elë mëtëkakluja. Kwe bu Jisas mogome hwi hana mëtelujelëla.

<sup>4</sup> Na melowene mëtla, “Jisas mogo hameta lëbene?” Bu lowene mëtlabëë, na tlemalë ho, bubë lime lamitlikakijowa. Bubë ëho kliji fene u mëtletëme.

<sup>5</sup> Na kwe one bu tako ulimu memëtla na laibibuwa mëtla. Kë ho bume gali motlomo,

“Sobo tuja ato home, gigli enënebë tala mëta, fëyeme hohwi etatelone?

<sup>6</sup> Bu eme hana lëtabe. Bu wahuju lële. Bu some Galili provins mëta kë gali toglëyobë gali ita lowene egletelome. Kë gali melë,

<sup>7</sup> ‘Bu bome, Gotobë life mago ho, Gotome lowene jwa mëgletlabë enëneme yo moglomame, bome ti mëta bu namëglame. Na bo matëmatë mëta tële olë nebëme kwe aona olëbëna huju nëgelëme.’”

<sup>8</sup> Bu tlemalë hobë gali aholokwane mëtla na bu ëbame, Jisas kë gali tëglebë gali ita lowene mëtletla.

<sup>9</sup> Na bu matëmatë mago mëtëkaklija na ita mutuja. Na bu kë hwi motlomabë wesibi gali, Jisasbë lowene esogo mëglelëtlabë we ita jowa home, na fli onehome, të mututatëma.

<sup>10</sup> Makdala life mago Maria, na Joana na li Maria, Jems bota, na buna kë tafa mëtlabë fli one, bu kë galime, bubë gali tëme kë jine tëglëmebë home yafe gali motloma.

<sup>11</sup> Kwe bubë gali tëme kë jine tëglëmebë ho bu melowene mëtla, “Bu sogëname gali molonafe.” Na bubë gali aholokwane hana motloma.

<sup>12</sup> Kwe Pita hujuwa tëglebë na matëmatëwa fëka tokou. Na bu blou tle na hwi telukwake na bume këna kë lei mototlabë ëhowa hwi tlotle. Na kwe bu ita lowa tugujuna lowene fafa tëtagule.

*Tlemalë ho bu Jisame, Emeus lifebë alëge mëta, hwi motlolo*

<sup>13</sup> Kë olë nawa, tlemalë ho, Jisame kë esogo mëtlelëlobë, Emeus lifeku elë mëtëyeu. Emeus lifeku bu Jerusalem lifate kakëha lëbe.

14 Tlemalë bu mëtëyeubëë na bu iniwa kë fata mëtëglebë wesibime gëgali motokoujo.

15 Bu gëgali motokoujobëë na mana Jisas lafatawa tletëme na buna iniwa mutuja.

16 Kë tlemalë bume hwi motlolo kwe bume mëtëselëlo sle hana mëtelo. Goto bubë mëtëselëlo sle lowenebë obwelë latëtatëme na mëtëselëlo sle jwa këme motlolo.

17 Na Jisas kë tlemalë home takune tlome, “Sobo kë egisijobë, fëye wesibime gëgali ekweijone?” Bu megali watle, na tlemalë mana mitlibo na wabelë mëtletelo.

18 Na bu mago ho li, bubë weniji Kliopas, gali tlole, “Lebutako li life li life mago oneho, Jerusalem lifatewa esokwafe nime fwa mitisiya. Kwe ju Jerusalem lifatewa tokwafe ekë esine. Na juwa kë lifate mëta kë fata mëtëglebë wesibi lowene jwa këme eletëmene?”

19 Na Jisas bume takune tlome, “Fëye wesibi Jerusalem lifate mëta fata mëtlene?”

Na tlemalë metafu mëtëtatelo, “Sebo, Nasaret lifate mago Jisame kë fata tëgletlebë wesibime gëgali nokweijo. Bu Gotobë lowene mago gali të totokweflebë homu na bu Gotobë afutukuna klelegowa wesibi blëge blëge totokwefëme. Bu kalëlego gali të totokwefle ho. Gotona, iniwa oneho mata, melowene lamëtletla, ‘Bu lale homu.’

20 Kwe sebobë lotu lome wege mëglabë eso enëne na sebobë fli eso enëne, bume gavmanme yo motloma, na bu gali fa mëtëtatla, bume mogo nalë tëke namoglolame na bume ti mëta bu mëtla.

21 Sebo ëbame melowene latletla, ‘Jisas kë nëgebë kwe Goto kë aniji toglolebë ho, seme

Israelbë afenëbobë wame hobë mago nëno nalëgleme.’

Na li gali mata lalëbe. Bu mogo nalë kë tëkle mototlabë, aona olë wamujutle.

22-23 Na ëje olobalëwamu semago one fli matëmatëwa muja na bu Jisas mogome, hana hwi molola. Na bu misiya na seme megali lamolona, ‘Sebo, enselme fwa hwi noloma na bu megali lamla, “Jisas tuja ato mana lëtabe.” One seme kë galime gali molona na sebo klelego menëletëma.

24 Na semago ho fli, bu mata matëmatëwa muja, na one fene gali mla, bu mata Jisas mogome hwi hana mujuwelëla.”

25 Na kwe Jisas tlemalëme gali tlome, “Sobo yaya fëyeme eletelone na Gotobë lowene mago gali të mototlabë hobë iniwa gali lowene sleme tole jwa fëyeme eletelone?”

26 Gotobë lowene mago gali të mototlabë ho, bu ëtani Gotobë bogo mëta meyahi lamëtla, ‘Goto kë aniji toglolebë ho, onehome nëno lëglebë ho, bu elili afina fa lotleme na mana Goto bume iniwa afutuku lëlelëme na bu Gotona onehobë eso home weife tafa meletemome.’ Sobo kë gali lowene sle jwa fëyeme eletelone?”

27 Na iniwa wesibi bume, Gotobë bogo mëta kë yahi mëtletlabë, bu kë wayo galime okokwe tlome. Bu ëtanifu ho, Mosesbë gali wayome afina okokwe tlome na Gotobë lowene mago gali të mototlabë hobë gali wayome mata okokwe tlome.

28 Bu mutujabëë, na tlemalë këme ni mëgebobë lifeku loliwa fwa mutula. Kwe Jisas, luguju lugujuwa nalëgleme fene.

29 Na kwe tlemalë bume lëkle mototlo, na gali motlolo, “Eguju egujuwa asa ele. Kliji walëtetigo na ki lëgebeme ekëne. Ju sebona eme ni nebëya.” Këme nêgeme bume lowa mëtletlulo. Na buna lowa mëtëkakluja. Na tafa mëtelula.

30 Na buna hi mëglabë masei mëta tafa mëtla. Na bu bletë nage fa totle na Gotome yaha gali tlole, “Ebë bletë nage yaha fëyeme enënane.” Na bletë nage fufu totle na kë tlemalëme tlëme.

31 Bu melë tēglena, na bubë lowene titika tētātēme na mana bume mētēsēlō sle mētelo. Na bubë naba li mago laēhowa tēkaketēme.

32 Na buwa gēgali mētelo, “Sebo buna ēje alēgēme gēgali nokweijana, na bu Gotobē bogo mago wayo gali seme tē lētatenona kwe sebo bē lowene klelego memeleteno na sebo tako fleflesu menelo.”

33 Bu megali mētelo na fowa motokokobē na ita Jerusalem lifatewa lafēkawa mētēkoujo. Na bu Jisasbē we ita jowa lowene esogo mëglelētlabē ho na buna kë loko mëtletlēyabē onehome hwi mutujuwelēmo.

34 Na kë enēne bu tlemalēme gali motloma, “Nēgalimufe. Jisas matēmatē mago, wahuju lēlefe na Pita wahwi lololefe.”

35 Na tlemalē bume alēgēme kë fata lēgletēmebē wesibime gēgali mëtletlōmo. Na bu gali mētelo, “Bu bletë nage fufu lētatenona sebo bume mana nēsēlō sle nelō.”

*Jisas bubë lowene esogo mëglelētlabē home olafa tletēme*

36 Kë tlemalē ho mana gēgali mētelo na mana Jisas bume ku mëta lafatawa tletēme. Na bu

megali tlome, “Sobobë lowene lëgëbetëyo sle malëletëyo.”\*

<sup>37</sup> Kwe bu meweniji lamëtla, “Alibahofe,” na bu këme tako uli memëtla.

<sup>38</sup> Na Jisas bume gali tlome, “Sobo klelego fëyeme elone? Sobo tutunena fëyeme tafa elone?”

<sup>39</sup> Sobo bobë toba yayahuju na juba yayahuju hwi elokwakimetëna. Ebë bo tekwe nëge. Sobo bobë ato lu etokwakilo lowene naegelome bo afabona, elebona nëtabë. Sobo lowene lalo, alibaho bu afabo jwa na elebo jwa mëtabëya bu kwe fleluwa.”

<sup>40</sup> Bu megali tle na bubë toba yayahuju na juba yayahuju bume lebotane totometëme.†

<sup>41</sup> Na bu klelego memëtletla na tako fleflesu memëtla kwe bu lowene sle hana mëtla na melowene mëtla, “Ebë Jisas nawa, alibaho nawa.” Na Jisas takune tlome, “Sobo hi wesibi fli mana mëbetëyone?”

<sup>42</sup> Na bume muniji mo lëne fa mëtëtatla na mëtlëla.

<sup>43</sup> Na bu hilika totome na bubë naba li mëta hi tletëme.

<sup>44</sup> Na bume gali tlome, “Ëtani bo sobona mana tafa tëglana bo some megali latlëyo, ‘Iniwa wesibi, ëtani Moses na Gotobë lowene mago gali të mototlabë ho, bome kë yahi mëtletë nabë na Buk Song mëta kë yahi mëtletë nabë bu kë iniwa wesibi fata mëglememu.’”

---

\* **24:36** Fli lowene ho bu melowene lamëtla, “Kë gali, bu tële sëgetoba kume kë mëgëbebë, Luk bu nane yahi tle, kwe ho li bubë nagi yahi tle.” † **24:40** Fli lowene ho bu melowene lamëtla, “Kë gali, bu tële sëgetoba kume kë mëgëbebë, Luk nane yahi tle, kwe ho li bubë nagi yahi tle.”

<sup>45</sup> Na bubë lowene ha totometëme, Gotobë bogobë wayo gali iniwa lowene sle namëgletlame.

<sup>46</sup> Na bume gali tlome, “Gotobë bogo megali lalamë, ‘Goto kë aniji tlolebë ho, onehome nëno nalëglebë ho, bu elili fa lotleme na gli lëleme na bu matëmatë mëta tële olë lëbeme na aona olëbëna kwe huju lëgleme.

<sup>47</sup> Na bu bubë wenijina iniwa life mago onehome gali të mëgëtagutëmame, bubë tëbo lowene aholokwana ti namëglame na Gotobë lale lowenewa esogo namëglelëtlame. Bu melë mëglana, kwe Goto bubë tëbo lowene iniwa aholokwana ti nalëgletëmeme. Bu kë gali Jerusalem lifate mëta afina të mëgëtatëmame.’

<sup>48</sup> Iniwa wesibi sobo kë hwi toglomobë iniwa lifate mëta satë etagutemo.

<sup>49</sup> Sobo aholokwane elo. Ètani aya Goto bu megali sle tle, bubë Amtëtomba some lëglëyome na bo bume sobelëme jine nëgelëbakëtëyome. Kwe sobo ebë lifate mëta fwa mana hwi elome na Gotobë Amtëtomba somëta mana letujutëyome na bubë afutuku fa etatelome.”

### *Goto Jisame tilekole*

<sup>50</sup> Na kwe Jisas bume Betani lifate li elë tlelume. Na bubë toba elili tetokwakëme na Gotome takune tlole, kë onehome lëgaitame nalëgleme na ululu sle lotomeme.

<sup>51</sup> Bu Gotome mana gëgali tëglagulebëë, na Goto bume mana heven lifewa alabujuwa tilekole.

<sup>52</sup> Na bu sëkefo miti tafa mëtla na Jisame mana

lotu mëtletla.‡ Na bu Jerusalem lifatewa tako  
fleflesuna mutuja.

<sup>53</sup> Na bu itaita tako lotu lowa mutujukefëya na  
Gotome fleflesu mëtlegefëtla na bibita  
mototokwefla.

---

‡ **24:52** Fli lowene ho bu melowene lamëtla, “Kë gali, bu tële sëgetoba kume kë mëgëbebë, Luk nane yahi tle, kwe ho li bubë nagi yahi tle.”

**Ēhwati Gali**  
**Portions of the Holy Bible in the Yalë language of**  
**Papua New Guinea**  
**Buk Baibel long tokples Yalë long Niugini**

copyright © 2022 Wycliffe Bible Translators, Inc.

Language: Yalë (Yale)

CC BY-SA required by use of Sweet Publishing CC BY-SA licensed illustrations in the printed edition.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-03-12

---

PDF generated using Haiola and XeLaTeX on 11 Jun 2026 from source files dated 12 Dec 2025

4a4fca1d-2276-53e5-95b2-a315846297c3